

Uunga siunnersuut:**Aatsitassanut tunngasunik suliaqarneq pillugu Inatsisartut inatsisaat****Kapitali 1***Siunertaa*

§ 1. Aatsitassarsiorluni misissueqqaarnerup, misissuinerup aamma aatsitassanik piiaanerup aammalu tamatumunnga atatillugu ingerlatassanik suliaqarnerup naapertuuttumik sunniuteqarluartumillu ingerlanneqartarnissaat, Inatsisartut inatsisaanni tunngavissaatinneqarpoq. Tamatuma saniatigut pissutsinik aatsitassarsiorluni ingerlataqarnernut pingaaruteqartunik naapertuuttumik maleruagassiinissaq tunngavissaatinneqarpoq.

Imm. 2. Ingerlatat inatsimmi pineqartunut ilaatinneqartut isumannaallisaanermut, peqqinnissamut, avatangiisinut, isumalluutininik atuinermut aamma inuiaqatigiinni piujuartitsinissamut tunngatillugu isumannaatumik, ilanngullugit innuttaasut inooqatigiinnermut, kulturimut, upperisatigut anersaakkullu naleqartitaat ileqquilu, kiisalu pissutsini taamaaqataanni nunani tamalaani suleriaatsinut pitsaanerpaanut akuerisaasunut naapertuuttumik ingerlanneqartarnissaat, Inatsisartut inatsisaanni tunngavissaatinneqarpoq.

Kapitali 2*Atuuffissai**Nunami sumiiffinni atuuffissai*

§ 2. Inatsisartut inatsisaat, nunami akisussaaffeqarfiusumi aamma imaani akisussaaffeqarfiusumi, nunavittap sumiiffiini aamma Kalaallit Nunaata killeqarfik aningaasarsiornikkut akisussaassuseqarfigisaani, atuuppoq.

Ingerlatassat

§ 3. Inatsisartut inatsisaat ingerlatassanut makkununnga atuuppoq:

- 1) Misissueqqaarneq, aatsitassarsiorluni misissuineq, aatsitassanik piiaaneq aamma aatsitassanik ilisimatuussutsikkut misissuinerit kiisalu ingerlatassat tamatumunnga atasut.
- 2) Ingerlatassanut Inatsisartut inatsisaanni pineqartunut ilaasunut nukissiornermut attuumassuteqartunut kiisalu ingerlatassat tamatumunnga atasut.
- 3) Aatsitassarsiorluni ingerlataqarnerit pillugit nunap iluata toqqorsivittut aamma siunertanut allanut atornerqarnera kiisalu ingerlatassat tamatumunnga atasut.
- 4) Misissuinerit aammalu allatigut ingerlatat, ingerlatanut nr. 1-3-mi taaneqartunut pingaaruteqartut.

Imm. 2. Inatsisartut inatsisaat ingerlatassanut makkununga atuutinnilaq:

- 1) Najukkami aatsitassarsiorluni ingerlatat.
- 2) Ingerlatat ikummatissiasanut tunngasut.
- 3) Nunap iluata toqqorsinermut allanullu siunertanut, aatsitassarsiorluni ingerlatanut imaluunniit ingerlatanut tamatumunnga atasunut tunngassuteqanngitsunut, atorneqarnera.

Sanaartukkat aaqqissuussinerillu

§ 4. Inatsisartut inatsisaat sanaartukkanut aaqqissuussinernullu § 2 naapertorlugu sumiiffinni inissisimasunut, aammallu ingerlatassanik Inatsisartut inatsisaanni pineqartunut ilaasunik suliaqarnermut atatillugu atorneqartunut, atuuppoq.

Sinerissap avataani suliaqarfiit, sinerissap avataani umiarsuit aamma sinerissap avataani suliaqarfiit eqqaanni isumannaallisaanermut killeqarfiit

§ 5. Inatsisartut inatsisaat sinerissap avataani suliaqarfinnut, takuuk § 18, aamma sinerissap avataani umiarsuarnut, takuuk § 19, imaani akisussaaffeqarfiusumiittunut, nunavittap sumiiffianiittunut imaluunniit Kalaallit Nunaata aningaasarsiornikkut oqartussaaffigisaaniittunut, aammalu ingerlatanik Inatsisartut inatsisaat malillugu akuersissummi pineqartunut ilaasunik suliaqarnermut atatillugu atorneqartunut, atuuppoq.

§ 6. Inatsisartut inatsisaat sinerissap avataani suliaqarfinni imaani akisussaaffeqarfiusumiittuni, nunavittap sumiiffianiittuni imaluunniit Kalaallit Nunaata aningaasarsiornikkut oqartussaaffigisaaniittuni isumannaallisaanermut killeqarfinnut, atuuppoq.

Imm. 2. Isumannaallisaanermut killeqarfiup iluani Inatsisartut inatsisaat umiarsuarnut, prammikut, imaatigut angallatinut allanut, timmisartunut, qulimiguulinnut, droninut aamma silaannakkut angallatinut allanut, sinerissap avataani suliaqarfinnut angallattakkanut aamma sanaartukkanut aaqqissuussinernullu angallattakkanut allanut, imaatigut angalaartunut, tissiarlutik ingerlaartunut, kalinneqartunut imaluunniit tamatumunnga atatillugu kisaqqasunut, imaluunniit allatut iliorlutik isumannaallisaanermut killeqarfimmiittunut, kiisalu aalisarnermut atortunut, kisanut, pituttornermut atortunut allanut, atortunut allanut aamma pigisanut allanut, atuuppoq.

Imm. 3. Umiarsuit, imaatigut angallatit, tunisassiornermut atortut aamma silaannakkut angallatit ilaalu ilanngullugit imm. 2-mi taaneqartut Kalaallit Nunaanneersuunersut, Danmarkimeersuunersut, Savalimmiuneersuunersut imaluunniit nunanit allaneersuunersut apeqqutaatinnagu, Inatsisartut inatsisaat atuutissaaq.

Umiarsuit, imaatigut angallatit, tunisassiornermut atortut aamma silaannakkut angallatit allat ilaalu ilanngullugit taakkualu ingerlataat

§ 7. Inatsisartut inatsisaat sinerissap avataani umiarsuarnut allanut, umiarsuarnut allanut, pramminut allanut, imaatigut angallatinut allanut, sinerissap avataani suliaqarfiit angallattakkanut allanut aamma sanaartukkanut aaqquissuussinernullu angallattakkanut allanut aamma timmisartunut, qulimiguulinnut, droninut aamma silaannakkut angallatinut allanut, imaani akisussaaffeqarfiusumiittut, nunavittap sumiiffianiittut imaluunniit aningaasarsiornikkut oqartussaaffigisamiittut imaluunniit taakkua silaannartaanniittunut, aammalu ingerlatanik Inatsisartut inatsisaat malillugu akuersissummi pineqartunut ilaasunik suliaqarnermut atatillugu atorneqartunut, aamma atuuppoq.

Imm. 2. Umiarsuit, imaatigut angallatit, tunisassiornermut atortut aamma silaannakkut angallatit ilaalu ilanngullugit imm. 1-imi taaneqartut Kalaallit Nunaanneersuunersut, Danmarkimeersuunersut, Savalimmiuneersuunersut imaluunniit nunanit allaneersuunersut apeqquataatinnagu, Inatsisartut inatsisaat atuutissaaq.

§ 8. Ingerlatassani Inatsisartut inatsisaanni pineqartunut ilaasuni ilaatigut ilaatinneqarput, imaani akisussaaffeqarfiusumi, nunavittap sumiiffiani aamma Kalaallit Nunaata aningaasarsiornikkut oqartussaaffigisaani taakkualu silaannartaanni ingerlataqarnerit makkua, taamaattoq takuuk imm. 2 aamma 3:

1) Ingerlatanik Inatsisartut inatsisaat malillugu akuersissummi pineqartunut ilaasunik suliaqarneq.

2) Ingerlatanik Inatsisartut inatsisaat malillugu akuersissummi pineqartunut ilaasunik suliaqarnermut atatillugu imaatigut ingerlaarneq aamma umiarsuit aamma angallatit allat atorlugit ingerlatanik allanik suliaqarneq.

3) Ingerlatanik Inatsisartut inatsisaat malillugu akuersissummi pineqartunut ilaasunik suliaqarnermut atatillugu timmisartorneq aamma timmisartut, qulimiguullit, dronit aamma silaannakkut angallatit allat atorlugit ingerlatanik allanik suliaqarneq.

Imm. 2. Ingerlatassat Inatsisartut inatsisaat malillugu akuersissummi pineqartunut ilaasut, ingerlatassat Inatsisartut inatsisaat malillugu akuersissut malillugu pisinnaatitsissummik pigisaqartumit imaluunniit pisinnaatitsissummik pigisaqartup isumaqatigiissuteqarfigisaanit suliarineqarpata, ingerlatassanut imm. 1-imi taaneqartunut ilaatinneqarput.

Imm. 3. Ingerlatanik Inatsisartut inatsisaat malillugu akuersissummi pineqartunut ilaasunik suliaqarnermi, takuuk imm. 1 aamma 2, Inatsisartut inatsisaat malillugu akuersissut malillugu pisinnaatitsissummik pigisaqartumut aamma pisinnaatitsissummik pigisaqartup isumaqatigiissuteqarfigisaannut, taassuma imaluunniit taakkua ingerlataat imaluunniit taakkununga tunngasut Inatsisartut inatsisaanni, aalajangersakkani Inatsisartut inatsisaat malillugu aalajangersagaasuni imaluunniit Inatsisartut inatsisaat malillugu akuersissutini, akuersissuteqarnermi imaluunniit aalajangiinerni atugassarititaasuni maleruagassiivigineqarsimappata, aatsaat Inatsisartut inatsisaat atuuppoq.

Imm. 4. Inatsisartut inatsisaata imm. 1-3-mi nassuiarneqartut atorneqarnerani, Inatsisartut inatsisaat malillugu akuersissut malillugu pisinnaatitsissummik pigisaqartoq imaluunniit pisinnaatitsissummik pigisaqartup isumaqatigiissuteqarfigisai, Kalaallit Nunaanni imaluunniit Danmarkimi inatsisit, ingerlatassanut pineqartunullu imm. 1-3-mi taaneqartunut atuuttut, malinnissaannut pisussaajunnaarsinneqanngillat. Inatsisartut inatsisaat aamma inatsisit allat

imminnut naapertuutinnippata, inatsisit allat atuuttariaqaraluartut immikkut mianerisassat tunngavilersuutaasinnaangippata, Inatsisartut inatsisaanni aalajangersakkat aammalu aalajangersakkat atugassarititaasullu Inatsisartut inatsisaat malillugu aalajangersagaasut atuutissapput.

Avatangiisinik, silap pissusaanik pinngortitamillu allanngutsaaliuineq

§ 9. Inatsimmi allatut allassimasoqangippat, Inatsisartut inatsisaanni avatangiisinik allanngutsaaliuineq pillugu maleruagassani aamma ilaatinneqarput silap pissusaanut tunngasunut illersuinissaq aammalu pinngortitamik illersuinissamut ilaatinneqarput.

Imm. 2. Tamanna aamma taarsiinissamut akisussaaffeqarnermut allatullu mingutsitsinermut aamma avatangiisini allatut sunniinermut akisussaaffeqarnermut aammalu avatangiisini ajoqusiinernut taarsiisarneq pillugu inatsimmi maleruagassat pillugit Inatsisartut inatsisaanni maleruagassanut atuuppoq.

Kapitali 3

Nassuiaatit

Aatsitassat

§ 10. Aatsitassat paasineqassapput tassaasut aatsitassanit atortussiassat allat, ikummatissiassanit (uulia aamma naturgassi) allaanerusut, tamarmik.

Imm. 2. Ikummatissiassat paasineqassaaq tassaasut ikummatissiassat nalinginnaasumik tassaasut C_nH_{2n+2} , tassani $n < 25$.

Ingerlatassat, akuersissutit, pisinnaatitsissummik pigisaqartut, akuersissuteqarnerit aamma pilersaarutit

§ 11. "Aatsitassarsiorluni ingerlataqarnerit" paasineqassapput tassaasut, ingerlatassat Inatsisartut inatsisaanni pineqartunut ilaasut.

§ 12. "Akuersissutit" paasineqassaaq tassaasut akuersissutit imm. 2 – 5-imi taaneqartut ilaat, ingerlatassat Inatsisartut inatsisaanni pineqartunut ilaasut suliarinissaannut akuersissut Inatsisartut inatsisaat malillugu Naalakkersuisunit tunniunneqartoq.

Imm. 2. "Misissueqqaarnissamut akuersissut" paasineqassaaq tassaasoq, aatsitassanut tunngatillugu misissueqqaarnermik suliaqarnissamut akuersissut, takuuk § 28.

Imm. 3. "Aatsitassarsiorluni misissuinissamut akuersissut" paasineqassaaq tassaasoq, aatsitassarsiorluni misissuineramik suliaqarnissamut akuersissut, takuuk § 34.

Imm. 4. "Piiaanissamut akuersissut" paasineqassaaq tassaasoq, aatsitassanik piiaanermik suliaqarnissamut akuersissut, takuuk § 43.

Imm. 5. "Ilisimatuussutsikkut misissuineritut" paasineqassaaq tassaasoq, aatsitassanut tunngatillugu ilisimatuussutsikkut misissuineritut suliaqarnissamut akuersissut, takuuk § 62.

§ 13. ”Pisinnaatitsissummik pigisaqartoq” paasineqassaaq tassaasoq, Inatsisartut inatsisaat malillugu akuersissut Naalakkersuisunit tunniunneqartoq malillugu pisinnaatitsissummik pigisaqartoq, takuuk § 12.

§ 14. ”Akuersissuteqarneq” tassaasoq, ataqatigiinnerani allatut pisoqartussaasimangippat, ingerlatassanik Inatsisartut inatsisaanni pineqartunut ilaasunik imm. 2-3-mi taaneqartunik suliaqarnissamut Inatsisartut inatsisaat malillugu akuersissuteqarneq Naalakkersuisunit nalunaarutigineqartoq.

Imm. 2. ”Ingerlatassanut akuersissuteqarneq” paasineqassaaq tassaasoq aatsitassarsiorfimmuut pilersaarummut, takuuk § 15, imm. 1, matusinissamut pilersaarummut, takuuk § 15, imm. 2, imaluunniit ingerlatassanik aalajangersimasunik suliaqarnissamut akuersissuteqarneq, takuuk § 22, imm. 3, aamma § 120, imm. 1.

Imm. 3. ”Avammut annissinissamut akuersissuteqarneq” paasineqassaaq aatsitassanik Kalaallit Nunaanniit annissinissamut akuersissuteqarneq, takuuk § 22, imm. 3, nr. 1, aamma § 75.

§ 15. ”Aatsitassarsiorfimmuut pilersaarut” paasineqassaaq tassaasoq, pisinnaatitsissummik pigisaqartup aatsitassanik piiaanissaanut aamma piiaanissamut akuersissut malillugu tamatumunnga atatillugu ingerlatassaannut, pisinnaatitsissummik pigisaqartup pilersaarutaa, takuuk § 77.

Imm. 2. ”Matusinissamut pilersaarut” paasineqassaaq tassaasoq, pisinnaatitsissummik pigisaqartup aatsitassanik piiaanermik kingusinnerusukku unitsitsinissaanut aamma matusinissaanut aammalu piiaanissamut akuersissut malillugu tamatumunnga atatillugu ingerlatassaannut, pisinnaatitsissummik pigisaqartup pilersaarutaa, takuuk § 80.

Imm. 3. Ingerlatassanut pilersaarut” paasineqassaaq tassaasoq, akuersissut malillugu ingerlatassanik aalajangersimasunik suliaqarnissamut pisinnaatitsissummik pigisaqartup pilersaarutaa, takuuk § 120, imm. 1, ilanngullugu ilaatigut aatsitassarsiorfimmuut pilersaarut imm. 1, aamma matusinissamut pilersaarut, takuuk imm. 2.

Aalajangersakkat aamma atugassarititaasut

§ 16. ”Aalajangersakkat aamma atugassarititaasut” paasineqassapput tassaasut, ataqatigiinnerani allatut pisoqartussaasimangippat, aalajangersakkat aamma atugassarititaasut Inatsisartut inatsisaat malillugu aalajangersagaasut. Taakkunani ilaatigut ilaatinneqarput nalunaarutini, qinnuteqaatinut suleriaatsini allanilu suleriaatsini Inatsisartut inatsisaat malillugu aalajangersagaasuni aalajangersakkat, akuersissutinut aamma akuersissuteqarnernut Inatsisartut inatsisaat malillugu tunniunneqartunut atugassarititaasut nalinginnaasut, akuersissutinut aamma akuersissuteqarnernut Inatsisartut inatsisaat malillugu tunniunneqartunut atugassarititaasut aamma Inatsisartut inatsisaat malillugu aalajangiinerni aalajangersakkat aamma atugassarititaasut.

Pisinnaatitsissummik pigisaqartup isumaqatigiissuteqarfigisai

§ 17. ”Pisinnaatitsissummik pigisaqartup isumaqatigiissuteqarfigisaa” paasineqassaaq tassaasoq, pisinnaatitsissummik pigisaqartup ingerlatassanik pisinnaatitsissummik pigisaqartumut akuersissummi pineqartunut ilaasunik suliaqarnerani, pisinnaatitsissummik pigisaqartup nioqqutissanik imaluunniit sullissinernik pilersuisua, ilanngullugit sanaartugassanut akigititaasunut sullissinerit imaluunniit siunnersortitut sullissinerit. Pisinnaatitsissummik pigisaqartup isumaqatigiissuteqarfigisaani aamma pisinnaatitsissummik pigisaqartup isumaqatigiissuteqarfigisaata isumaqatigiissuteqarfigisai ilaalu ilanngullugit, pineqartunut ilaatinneqarput.

Sinerissap avataani suliaqarfiit

§ 18. ”Sinerissap avataani suliaqarfiit” paasineqassaaq tassaasut, umiarsuit, prammit, angallatit allat, platformit aamma aaqqissuussinerit allat, imaani sumiiffimmi aalajangersimasumi imaluunniit sumiiffinni aalajangersimasuni arlalinni tulleriinni ingerlatassamik ataatsimik arlalinnilluunniit suliaqarnermut atorneqartut:

- 1) Imaani sumiiffimmi misissueqqaarnek, aatsitassarsiorluni misissuineq aamma aatsitassanik piiaaneq.
- 2) Aatsitassanik, imaani sumiiffimmi imaluunniit nunami sumiiffimmi piiarneqartunik suliareqqineq.
- 3) Aatsitassanik, imaani sumiiffimmi imaluunniit nunami sumiiffimmi piiarneqartunik uninngasuuteqarneq.
- 4) Suliffiup atortuunik, atortussanik, nioqqutissanik imaluunniit pigisanik imaani sumiiffimmi imaluunniit nunami sumiiffimmi ingerlatassanik Inatsisartut inatsisaanni pineqartunut ilaasunik suliaqarnermut atatillugu atorneqartunik tigusineq, uninngasuuteqarneq, allamut usiliussineq imaluunniit nassiussineq.
- 5) Inuit imaani sumiiffimmi imaluunniit nunami sumiiffimmi ingerlatassanik Inatsisartut inatsisaanni pineqartunut ilaasunik suliaqarnermut atatillugu suliaqarnermik imaluunniit ingerlatassanik suliaqartut assartorneqarnerannut, uninngaarfii nut imaluunniit unnuisarfiinut atatillugu tikiffissap sumiiffia, paarlaaffissap sumiiffia imaluunniit aallarfiissap sumiiffia.
- 6) Inuit imaani sumiiffimmi imaluunniit nunami sumiiffimmi ingerlatassanik Inatsisartut inatsisaanni pineqartunut ilaasunik suliaqartut ineqarfii.

Imm. 2. ”Sinerissap avataani suliaqarfiit angallattakkat” paasineqassaaq tassaasut, sinerissap avataani suliaqarfiit suulluunniit, imaatigut angallallugit, tissiartillugit imaluunniit kalillugit inissiffissamut allamut nuunneqarsinnaasut, aammalu piffissami atuuffissaanni sumiiffinni arlalinni imaluunniit assigiinngitsorpassuarni atorneqartussatut eqqarsaatigineqartut.

Imm. 3. ”Sinerissap avataani suliaqarfiit aalaakkaasut” paasineqassaaq, sinerissap avataani suliaqarfiit, sinerissap avataani angallattagaanngitsut, takuuk imm. 2.

Sinerissap avataani umiarsuit

§ 19. “Sinerissap avataani umiarsuit” paasineqassapput tassaasut, umiarsuit, prammit aamma angallatit allat, sinerissap avataani suliaqarfiunngitsut, takuuk § 18, aammalu sinerissap avataani suliaqarfinnut atatillugit ingerlatanik suliarinniffiusut.

Avatangiisini ajoqusiineq

§ 20. Avatangiisini ajoqusiineq paasineqassaaq:

- 1) Nunamik, imaani, immap naqqanik aamma nunap iluanik, imermi imaluunniit silaannarmi mingutsitsineq.
- 2) Silap pissusaanut tunngasunut mingutsitsineq imaluunniit allatigut pitsaanngitsumik sunniineq.
- 3) Pinngortitami, ilanngullugit inuit, uumasut imaluunniit naasut, allatut annertuumik pitsaanngitsumik sunniineq imaluunniit annertuumik akornusersuineq.

Imm. 2. Kapitali 14 malillugu akisussaasuusoq paasineqassaaq tassaasoq ingerlatassamik Inatsisartut inatsisaanni pineqartunut ilaasumik suliaqartoq, aqutsisoq imaluunniit suliarineqarneranik nakkutiginnittoq.

Najukkami aatsitassarsiorluni ingerlatassat

§ 21. Najukkami aatsitassarsiorluni ingerlatat paasineqassaaq tassaasoq, aatsitassat pillugit annikitsumik aatsitassarsiorluni ingerlataqarnerit pillugit Inatsisartut inatsisaat aamma Kalaallit Nunaanni sanaartornernik suliaqarnerit aamma attaveqatigiinnermi suliaassanut ilaalu ilanngullugit atugassanik aatsitassanik paaaneq.

Kapitali 4

Maleruagassat nalinginnaasut

Namminersorlutik Oqartussat aatsitassanut pisinnaatitaanerat aammalu ingerlatassanut akuersissummik tunniussisarnissaq imaluunniit akuersissuteqartarnissaq pillugit piumasaqaatit

§ 22. Namminersorlutik Oqartussat aatsitassanik Kalaallit Nunaanni nunap iluaniittunik atuinissamut paaanissamullu piginnittussaataapput.

Imm. 2. Ingerlatassat makkua akuersissutit Inatsisartut inatsisaanni maleruagassat malillugit Naalakkersuisunit akuerineqartut malillugit taamaallaat Kalaallit Nunaanni suliarineqaqqusaapput:

- 1) Aatsitassanut tunngatillugu misissueqqaarneq § 28 malillugu tamatumunnga akuersissut tunniunneqartoq malillugu aatsaat ingerlateqqusaavoq.
- 2) Aatsitassarsiorluni misissuineq § 34 malillugu akuersissut tamatumunnga tunniunneqartoq malillugu aatsaat ingerlateqqusaavoq.
- 3) Aatsitassanik paaaneq § 43 malillugu akuersissut tamatumunnga tunniunneqartoq malillugu aatsaat ingerlateqqusaavoq.

4) Aatsitassanut tunngatillugu ilisimatuussutsikkut misissuinerit, imm. 3 aamma 4 malillugit allatut pisoqartussaasimangippat, § 62 malillugu akuersissut tamatumunnga tunniunneqartoq malillugu aatsaat ingerlateqqusaavoq.

Imm. 3. Ingerlatassat makkua akuersissuteqarnerit makkua Inatsisartut inatsisaanni maleruagassat malillugit Naalakkersuisunit nalunaarutigineqartut malillugit aatsaat Kalaallit Nunaanni ingerlateqqusaapput:

1) Aatsitassanik Kalaallit Nunaanniit annessineq aatsaat piaanissamut akuersissut aamma Inatsisartut inatsisaat imaluunniit avammut nioqquteqarnissamut akuersissuteqarneq § 75, imm. 1 imaluunniit 2 malillugu tamatumunnga nalunaarutigineqartoq malillugu aatsaat pisinnaavoq.

2) Ingerlatassat allat aatsitassanut tunngatillugu misissueqqaarnermut, aatsitassarsiorluni misissuinerimut, piaanermut imaluunniit ilisimatuussutsikkut misissuinerit tunngassuteqartut, imm. 3, nr. 1 malillugu akuersissummi ilaatinneqanngitsut, ingerlatassanut akuersissuteqarneq malillugu taamaallaat suliarineqarsinnaapput.

Imm. 4. Naalakkersuisut aatsitassat, aatsitassarsiorluni ingerlataqarnerit aammalu ingerlatassat allat taakkununnga atasut pillugit nalinginnaasumik imaluunniit nunap assiliornissatut isikkoqartumik ilisimatuussutsikkut suliaqarnikkullu misissuinerit suliaqarsinnaapput.

Oqartussatut suliarinnineq

§ 23. Naalakkersuisut Aatsitassanut Aqutsisoqarfik aamma Aatsitassanik Suliassa qarfinnut Avatangiisinut Aqutsisoqarfik peqatigalugit aatsitassanut suliassa qarfimmi Inatsisartut inatsisaanni pineqartunut ilaasumi, allaffissornikkut oqartussaapput.

Imm. 2. Imm. 3 naapertorlugu avatangiisinut tunngasut eqqaassanngikkaanni, Aatsitassanut Aqutsisoqarfik allaffissornikkut oqartussaasuvoq.

Imm. 3. Aatsitassanik Suliassa qarfinnut Avatangiisinut Aqutsisoqarfik (Avatangiisinut Aqutsisoqarfik) aatsitassanut suliassa qarfik pillugu avatangiisinut tunngasunut allaffissornikkut oqartussaasuvoq, ilanngullugit avatangiisinik allanngutsaaliuineq, silap pissusaanik allanngutsaaliuineq, pinngortitamik allanngutsaaliuineq, avatangiisinut akisussaaffik aammalu avatangiisinik nalilersuineq. Avatangiisinut Aqutsisoqarfiup nalilersuineri aalajangiinerilu, ilisimatuussutsikkut aamma arlaannaannulluunniit attuumassuteqartunik avatangiisinut sullissivimmit ataatsimit arlalinnilluunniit nalilersuinerit aallaaveqartinneqassapput.

Imm. 4. Aatsitassat, aatsitassarsiorluni ingerlataqarnerit, nunap iluata toqqorsivittut imaluunniit aatsitassarsiorluni ingerlatanut tunngatillugu siunertanut allanut atorineqarnera, nukissiuuteqarnermi ingerlataqarnerit tassunga atasut aammalu ingerlataqarnerit allat tassunga atasut tamaasa pillugit pissutsit Inatsisartut inatsisaanni pineqartunut ilaasut tamarmik, ataatsimoortumik akuutitsiviusumillu oqartussamit suliarineqarnissaasa isumagineqarnissaa, Naalakkersuisut isumagissavaat.

Imm. 5. Aatsitassanut suliassa qarfik Inatsisartut inatsisaanni pineqartunut ilaasoq pillugu

oqartussat suliarinnittarnerat, pisinnaatitsissummik pigisaqartut allallu Inatsisartut inatsisaanni pineqartunut ilaasut, oqartussamut ataasiinnarmut attaveqaqateqartussaannerat aammalu nalunaarutunik, allakkianik aalajangiinernillu ilaalu ilanngullugit oqartussamit tassannga tigusaqartartussaannerat, tunngavigalugu aaqqissuunneqarput.

Imm. 6. Aatsitassanut Aqutsisoqarfik ataqatigiissaarisutut ingerlatsivimmi oqartussaavoq aammalu Avatangiisinut Aqutsisoqarfimmiit oqaaseqaatinik aalajangiinernillu pisariaqartunik piniartarluni. Avatangiisinut Aqutsisoqarfik aamma Aatsitassanut Aqutsisoqarfik suliaassanik suliarinninneq aalajangiinerillu pillugit imminnut ingerlaavartumik ilisimatitseqatigiissapput.

Imm. 7. Oqartussat imm. 1-imi taaneqartut tassaapput, ingerlatassanut pissutsinullu Inatsisartut inatsisaanni pineqartunut ilaasunut tunngatillugu, inatsisit maleruagassallu allat malillugit oqartussat aalajangiisinnaatitaasut. Taamaattoq inatsisit imaluunniit maleruagassat allat malillugit oqartussat allat oqartussat suliarinnittussaasimappata, tamanna atuutissanngilaq.

§ 24. Aatsitassanut Aqutsisoqarfiup imaluunniit Avatangiisinut Aqutsisoqarfiup aalajangiinerata naammagittaalliutigineqarnera Naalakkersuisunut suliaqqiunneqarsinnaavoq. Naammagittaalliorsinnaatitaapput:

1) Suliami pineqartoq.

2) Peqatigiiffiit kattuffiillu malittarisassatik malillugit sukisaarsarneq, avatangiisini pinngortitamilu soqutigisat imaluunniit inuiaqatigiinnut tunngasut pillugit soqutigisanik annertuunik isumaginninnissamut siunertaqartut.

Imm. 2. Naammagittaalliornissamut killigititaq sapaatit akunnerinik 6-inik sivirusseqarpoq. Naammagittaalliornissamut killigititaq naatsorsorneqassaaq, aalajangiineq suliami pineqartumut nalunaarutigineqarsimappat, ulloq nalunaarutigineqarnera aallarnerfigalugu, aammalu aalajangiineq tamanut ammasumik nalunaarutigineqarsimappat, ulloq tamanut nalunaarutigineqarfia aallarnerfigalugu. Naammagittaalliornissamut killigititaq arfininngornermi imaluunniit ullumi nalliuttumi naasimappat, naammagittaalliornissamut killigititat ulluinnarmut tullermut siullermut sivitsorneqassaaq.

Imm. 3. Naammagittaalliut oqartussamut aalajangiisumut allaganngorlugit tunniunneqassaaq. Naammagittaalliornissamut piffissamut killigititap naanerata kingorna sapinngisamik piaartumik naammagittaalliut aammalu oqartussap aalajangiinera aamma naammagittaalliummut oqaaseqaataa oqartussap Naalakkersuisunut nassitutissavai.

Imm. 4. Akuersissutip, akuersissuteqarnerup imaluunniit immikkut ittumik akuersissuteqarnerup naammagittaalliutigineqarneri, Naalakkersuisut allatut aalajangiisimannippata, kinguartitsinermik sunniuteqassanngillat.

Imm. 5. Akuersissutit, akuersissuteqarnerit aamma immikkut ittumik akuersissuteqarnerit aalajangersimasut naammagittaalliornissamut piffissap killigititap iluani atorneqassanngitsut pillugu aalajangersakkanik Naalakkersuisut aalajangersaasinnaapput.

Imm. 6. Peqqusissutip imaluunniit inerteqquteqarnerup naammagittaalliutigineqarnera, Naalakkersuisut allatut aalajangiisimannippata, kinguartitsinermik sunniuteqassanngilaq.

Eqqartuussivinnut aalajangiinermik suliaassanngortitsisarneq

§ 25. Pissutsit Inatsisartut inatsisaanni pineqartunut ilaasut pillugit aalajangiineq taamaallaat piffissaliussap ukiumik ataatsimik sivissuseqartup iluani eqqartuussivinnut suliassanngortinneqarsinnaavoq. Piffissamut killiliussaq ulloq aalajangiinerup suliami pineqartumut, aalajangiineq suliami pineqartumut nalunaarutigineqarsimappat, nalunaarutigineqarfia aallarnerfigalugu naatsorsorneqassaaq. Aalajangiineq tamanut ammasumik nalunaarutigineqarsimappat, taamaattoq piffissamut killiliussaq ulloq tamanut saqqummiussineq aallarnerfigalugu naatsorsorneqassaaq. Piffissamut killiliussaq arfininngornermi, sapaammi imaluunniit nalliuttumi naappat, piffissamut killiliussaq ulluinnarmut tullermut siullermut sivitsorneqassaaq.

Imm. 2. Aalajangiinerup eqqartuussivinnut suliassanngortinneqarnerani, Naalakkersuisut allamik aalajangiisimangippata, aalajangiineq kinguartitsinermik sunniuteqassanngilaq.

Imm. 3. Pissutsit Inatsisartut inatsisaanni pineqartunut ilaasut pillugit aalajangiineq taamaallaat eqqartuussivinnut Kalaallit Nunaanni aalajangiisinnaatitaasunut suliassanngortinneqarsinnaavoq. Aalajangiineq eqqartuussivinnut suliassanngortinneqartoq, Kalaallit Nunaanni eqqartuussivinnut siullertut suliarinnittussamut suliakkiunneqassaaq.

Naalakkersuisut akuersissutinik qinnuteqaatit aamma akuersissutit pillugit ukiumoortumik nassuiaataat

§ 26. Naalakkersuisut ukiut tamaasa akuersissutinik qinnuteqaatit, qinnuteqaatit tunniunneqartut aamma akuersissutinik neqeroortitsinissat pilersaarutigineqartut aammalu ingerlanneqartut pillugit nassuiaammik tamanut ammasumik suliaqartassapput. Naalakkersuisut nassuiaat Inatsisartunut nassiutissavaat.

§ 27. Naalakkersuisut suliani aalajangiisoqannginnerani, pissutsit inuiaqatigiinnut annertuumik sunniuteqarsinnaasut pillugit Inatsisartuni ataatsimiititaliamut attuumassuteqartumut ilisimatitsisassapput.

Kapitali 5

Aatsitassanut tunngatillugu misissueqqaarnissamut akuersissut

Akuersissut

§ 28. Naalakkersuisut atugassarititaasut erseqqinnerusumik aalajangersarneqartut tunngavigalugit, sumiiffimmut erseqqinnerusumik killissalernerneqartumut, aatsitassanut ataatsimut arlalinnuunniit tunngatillugu misissueqqaarnernik suliaqarnissamut kisermaassisussaataitanani akuersissummik tunniussisinnaapput.

Pisinnaatitsissummik pigisaqartumut piunasaqaatit

§ 29. § 28 malillugu pisinnaatitsissummik pigisaqartoq akuersissummik tunniussinermi aammalu piffissaq akuersissuteqarfiusoq tamaat aktiaatileqatigiiffittut imaluunniit ingerlatseqatigiiffittut piginneqatigiiffiusutut, Kalaallit Nunaanni angerlarsimaffeqartutut imaluunniit nunami allami angerlarsimaffeqarluni taamaaqataanik aningaasaateqarluni ingerlatseqatigiiffittut, nalunaarsorsimasuussaaq. Ingerlatseqatigiiffik aammattaaq Kalaallit Nunaanni inuussutissarsiortutut nalunaarsorsimassaaq, takuuk Qitiusumik Suliffeqarfinnik Nalunaarsuiffimmi nalunaarsuisarneq pillugu Inatsisartut inatsisaat.

Imm. 2. Pisinnaatitsissummik pigisaqartup akuersissutip tunniunneqarnerani aammalu piffissaq akuersissuteqarfiusoq tamaat § 66 malillugu piumasagaatit naammassisimassavai.

Imm. 3. Aningaasaateqarluni ingerlatseqatigiiffik nunami allami angerlarsimaffeqartoq, aktiaatileqatigiiffimmut imaluunniit ingerlatseqatigiiffimmut piginneqatigiiffiusumut Kalaallit Nunaanni angerlarsimaffeqartumut, assingunersoq nalornisoqarluni pisoqartillugu, tamatumunnga Naalakkersuisut aalajangiissapput.

Piffissaq akuersissuteqarfiusoq

§ 30. Misissueqqaarnissamut akuersissut ukiut 5-it tikillugit piffissamut akuersissuteqarfiusumut tunniunneqassaaq.

Imm. 2. Imm. 1 malillugu piffissaq akuersissuteqarfiusoq, tamatigut ukiut 5-it tikillugit piffissalerlugu ataasiarluni imaluunniit arlaleriarluni Naalakkersuisunit sivitsorneqarsinnaavoq, taamaattoq takuuk imm. 4.

Imm. 3. Piffissap akuersissuteqarfiusup ataatsimut katillugu ukiunit 10-init sivisunerusumut akuersissuteqarfiusoq piffissalerlugu sivitsorneqarneri tamaasa akuersissummut atugassarititaasut allanngortillugit Naalakkersuisut aalajangersaasinnaapput.

Imm. 4. Misissueqqaarnissamut akuersissummut piffissaq akuersissuteqarfiusoq ataatsimut katillugu ukiunit 15-init sivisunerusinnaanngilaq.

Imm. 5. Aatsitassarsiorluni misissueqqaarnissamut akuersissut atorunnaassaaq, piffissaq akuersissuteqarfiusoq naappat imaluunniit akuersissut atorunnaarpat, Naalakkersuisunit tunuartinneqarpat imaluunniit Naalakkersuisut tamatuminnga akuersissuteqareernerisigut pisinnaatitsissummik pigineqartumiit Naalakkersuisunut utertinneqarpat.

Oqartussat suliarinninneranni aningaasartuutinut matussutissanik akiliutinik, akiliutissanik aamma aningaasartanik akiliineq

§ 31. Naalakkersuisut misissueqqaarnissamut akuersissummik tunineqarnissaaq imaluunniit piffissap akuersissuteqarfiusup sivitsorneqarnissaa aamma misissueqqaarnissamut akuersissummik tunineqarnissaaq imaluunniit piffissap akuersissuteqarfiusup sivitsorneqarnissaa pillugu qinnuteqaammik tigusaqarnerannut suliarinninnerannullu, misissueqqaarnissamut akuersissummik imaluunniit misissueqqaarnissamut akuersissut malillugu piffissap akuersissuteqarfiusup sivitsorneqarnissaanik qinnuteqartoq akiliummik akiliissasoq, pillugu aalajangersakkanik Naalakkersuisut aalajangersaasinnaapput.

Imm. 2. Pisinnaatitsissummik pigisaqartoq akuersissutip aamma akuersissut malillugu ingerlatassat atuutsiinnarneranut ilaalu ilanngullugu Naalakkersuisunut akiliummik akiliissasoq, misissueqqaarnissamut akuersissummut aalajangersakkanik aamma atugassarititaasunik Naalakkersuisut aalajangersaasinnaapput.

Imm. 3. Akuersissut aamma akuersissut malillugu ingerlatassat pillugit Inatsisartut inatsisaat malillugu suliaassanik suliarinninnermut aamma allanik oqartussat suliarinninnerannut atatillugu Naalakkersuisut aningaasartuutaannut matussutissanik aningaasanik pisinnaatitsissummik pigisaqartoq akiliissasoq pillugu aalajangersakkanik atugassarititaasunillu Naalakkersuisut aalajangersaasinnaapput. Naalakkersuisut aningaasat akilernissaat akiliutitut imaluunniit aningaasartuutunik utertitsilluni akiliinertut akilersissinnaavaat.

Ingerlatat pillugit nalunaarusiat, paasissutissanik nalunaarsukkanik misissugassanillu tunniussisarneq aamma isertuussisussaaneq

§ 32. Pisinnaatitsissummik pigisaqartup, takuuk § 28, Naalakkersuisunut tunniutissavai:

- 1) Akuersissut malillugu misissueqqaarnerit aamma ingerlataqarnerit allat taakkualu inernerit pillugit nalunaarusiaq
- 2) Misissueqqaarnerup inernerisa aamma taakkunanga paasissutissat nalunaarsukkat misissugassallu assilineri aamma pisinnaatitsissummik pigisaqartup nassuiaaneri, inerniliineri tamatumunngalu inassuteqaatai.

Imm. 2. Paasissutissat Naalakkersuisut imm. 1 naapertorlugu tigusaat, piffissaq akuersissuteqarfiusoq tamaat isertuussaapput. Akuersissut atorunnaarpat, paasissutissat Naalakkersuisunut tunniussinissamut piffissamut killiliussamiit ukiuni 5-ini isertuussaapput.

Imm. 3. Naalakkersuisut nalunaarusiat, misissueqqaarnerit inernerit, paasissutissat nalunaarsukkat, misissugassat aamma nassuiaaneri, inerniliinerit inassuteqaatillu ilaalu ilanngullugit isertuussat pillugit paasissutissat nalinginnaasut, piffissami isertuussiviusussami tamanut saqqummiussinnaavaat. Naalakkersuisut paasissutissanik nalinginnaasunik taamaattunik tamanut saqqummiussinnginnermi, paasissutissat pisinnaatitsissummik pigisaqartumut tusarniaassutigalugit nassitissavai aammalu minnerpaamik qaammatisiutit malillugit ulluni 14-ini piffissamut naleqquttumik killissaliussap aalajangersagaasup iluani pisinnaatitsissummik pigisaqartoq tassunga oqaaseqaammik nassiussisinnaasoq immaqalu paasissutissanik tamaginnik imaluunniit ilaannik saqqummiussinissamut tunngavilersukkamik akerliliissuteqarsinnaasoq, pisinnaatitsissummik pigisaqartoq paasissutississallugu. Pisinnaatitsissummik pigisaqartoq paasissutissanik tamaginnik imaluunniit ilaannik tamanut saqqummiussinissamut akerliliissummik piffissamut killiliussap iluani nassiussippat, aammalu pisinnaatitsissummik pigisaqartup isertuussinissamik soqutigisaqarnerata mianerinissaa, Naalakkersuisut paasissutissanik pineqartunik tamanut saqqummiussinissamut soqutigisaqarnerannit annertunerusorineqarpat, Naalakkersuisut paasissutissat taakkua tamanut saqqummiutissanngilaat.

Imm. 4. Imm. 2 aamma 3 apeqquaatinnagit, Naalakkersuisut pisuni tamaginni avatangiisinut paasissutissat aamma avatangiisinut nalunaarusiat, nalinginnaasumik inuiaqatigiinnut soqutiginaatilittut nalilerneqartut, tamanut saqqummersissinnaavaat.

Imm. 5. Piffissaq isertuussiviusoq naappat, pisinnaatitsissummik pigisaqartoq aamma Namminersorlutik Oqartussat nalunaarusiornernut, misissueqqaarnerit inernerinut, paasissutissanut nalunaarsukkanut, misissugassanut aamma nassuiaanernut, inerniliinernut inassuteqaatinullu ilaalu ilanngullugit piginnittussaataalissapput aammalu akeqanngitsumik atugassiissutiginnissaannut atornissaannullu pisinnaatitaallissallutik.

Imm. 6. Naalakkersuisut pissutsit imm. 1-5-imi taaneqartut pillugit aalajangersakkanik aamma atugassarititaasunik erseqqinnerusunik aalajangersaasinnaapput, ilanngullugit nalunaarusiat ilusaat, imarisaat aamma piffissani aalajangersimasuni tunniussisarnissaq, ingerlatanik aalajangersimasunik suliaqarnermi aammalu pisut imaluunniit pissutsit aalajangersimasut pilertarnerat. Tassunga ilanngullugu Naalakkersuisut ingerlatat aalajangersimasut, inernerit, pisut pissutsillu pillugit paasissutissanik nalinginnaasunik tamanut saqqummiinissamut periarfissaqarnerat pillugu aalajangersakkanik atugassarititaasunillu aalajangersaasinnaapput.

Akuersissut aamma ingerlatassat pillugit aalajangersakkanik aamma atugassarititaasunik Naalakkersuisut aalajangersaasarnerat

§ 33. Naalakkersuisut akuersissut aamma akuersissut malillugu ingerlatat § 1 malillugu Inatsisartut inatsisaata siunertaanut aamma Inatsisartut inatsisaanni aalajangersakkanut allanut naapertuuttumik, pisinnaatitsissummik pigisaqartup Kalaallit Nunaanni inatsisinik naammassinninnissaa, Namminersorlutik Oqartussat pisinnaatitaaffii aningaasaqarnikkullu soqutigisai aammalu pisinnaatitsissummik pigisaqartup pisinnaatitaaffii qulakkeerniarlugit, misissueqqaarnissamut akuersissummut aalajangersakkanik aamma atugassarititaasunik aalajangersaasinnaapput.

Kapitali 6

Aatsitassarsiorluni misissuinissamut akuersissut

Akuersissut

§ 34. Naalakkersuisut sumiiffimmut erseqqinnerusumik killissalernerneqartumut atugassarititaasut erseqqinnerusumik aalajangersarneqartut tunngavigalugit kisermaassisussaataalluni aatsitassanik ataatsimik arlalinnilluunniit aatsitassarsiorluni misissuinissamut akuersissummik tunniussisinnaapput.

§ 35. Qinnuteqartup § 34 malillugu aatsitassarsiorluni misissuinissamut akuersissummik tunineqarsinnaalinnginnerani, Naalakkersuisut qinnuteqaat minnerpaamik qaammatsiutit malillugit ulluni 21-imi tamanut ammasumik tusarniaassutigalugu nassitissavaat.

Pisinnaatitsissummik pigisaqartumut piunasaqaatit

§ 36. § 34 malillugu pisinnaatitsissummik pigisaqartup akuersissutip tunniunneqarnerani aammalu piffissaq akuersissuteqarfiusoq tamaat aktiaatileqatigiiffittut imaluunniit ingerlatseqatigiiffittut piginneqatigiiffittut, Kalaallit Nunaanni angerlarsimaffeqartut imaluunniit aningaasaateqarluni ingerlatseqatigiiffittut taamaaqataatut nunami allami angerlarsimaffeqartut, nalunaarsorsimassaaq. Ingerlatseqatigiiffik aammattaaq Kalaallit Nunaanni inuussutissarsiortutut nalunaarsorsimassaaq, takuuk Qitiusumik Suliffeqarfinnik Nalunaarsuiffimmi nalunaarsuisarneq pillugu Inatsisartut inatsisaat.

Imm. 2. Aningaasaateqarluni ingerlatseqatigiiffik nunami allami angerlarsimaffeqartoq, aktiaatileqatigiiffimmut imaluunniit ingerlatseqatigiiffimmut piginneqatigiiffiusumut Kalaallit Nunaanni angerlarsimaffeqartumut, takuuk imm. 1, naapertuunnersoq nalornisoqartillugu, Naalakkersuisut tamatumunnga aalajangiissapput.

Piffissaq akuersissuteqarfiusoq

§ 37. Aatsitassarsiorluni misissuinissamut akuersissut piffissamut akuersissuteqarfiusumut ukiunut 5-inut tunniunneqassaaq.

Imm. 2. Imm. 1 malillugu ukiuni 5-ini piffissaq akuersissuteqarfiusoq Naalakkersuisut ataasiarlutik arlaleriarlutilluunniit sivitsorsinnaavaat. Piffissaq akuersissuteqarfiusoq siullermik ukiunik 5-inik piffissalerlugu sivitsorneqassaaq. Tamatuma kingorna piffissaq akuersissuteqarfiusoq tamatigut ukiunik 3-nik piffissalerlugu sivitsorneqartassaaq. Pisinnaatitsissummik pigisaqartup imm. 1 malillugu ukiuni 5-ini piffissami akuersissuteqarfioqqaartumi akuersissut aamma akuersissut malillugu ingerlatat pillugit pisussaaffini tamaasa naammassisimappagit, pisinnaatitsissummik pigisaqartoq ukiunik 5-inik piffissalerlugu piffissap akuersissuteqarfiusup siullermeertumik sivitsornissaanut pisinnaatitaassaaq. Pisinnaatitsissummik pigisaqartup imm. 2 manna malillugu ukiuni 5-ini imaluunniit ukiuni 3-ini piffissap akuersissuteqarfiusup sivitsorneqarfiani akuersissut aamma akuersissut malillugu ingerlatat pillugit pisussaaffiit tamaasa naammassisimappagit, Naalakkersuisut piffissaq akuersissuteqarfiusoq ukiunik 3-nik piffissalerlugu sivitsorsinnaavaat.

Imm. 3. Piffissap akuersissuteqarfiusup ukiunit 10-iniit ataatsimut katillugu sivilunerusumik akuersissuteqarfiusoq piffissalerlugu sivitsorneqarnerini tamaginni, akuersissummut atugassarititaasunik allanngortinneqartunik Naalakkersuisut aalajangersaasinnaapput.

Imm. 4. Aatsitassarsiorluni misissuinissamut akuersissummut piffissaq akuersissuteqarfiusoq ataatsimut katillugit ukiunit 22-iniit sivilunerusinnaanngilaq.

Imm. 5. Aatsitassarsiorluni misissuinissamut akuersissut atorunnaassaaq, piffissaq akuersissuteqarfiusoq naappat imaluunniit atorunnaarpat, Naalakkersuisunit tunuartinneqarpat imaluunniit Naalakkersuisut tamatuminnga akuersissuteqareernerisigut pisinnaatitsissummik pigineqartumiit Naalakkersuisunut utertinneqarpat.

Oqartussat suliarinninneranni aningaasartuutitut matussutissanik akiliutinik, akiliutissanik aamma aningaasanik akiliinerit, aatsitassarsiorluni misissuinerit pisussaaffiit

§ 38. Naalackersuisut aatsitassarsiorluni misissuinissamut akuersissummik tunineqarnissamut imaluunniit aatsitassarsiorluni misissuinissamut akuersissut malillugu piffissap akuersissuteqarfiusup sivitsorneqarnissaanik aamma aatsitassarsiorluni misissuinissamut akuersissummik imaluunniit piffissap akuersissuteqarfiusup sivitsorneqarnissaanik tunineqarnissamut qinnuteqaammik tigusaqarnerannut suliarinninnerannullu akiliummik, aatsitassarsiorluni misissuinissamut akuersissummik imaluunniit piffissap akuersissuteqarfiusup sivitsorneqarnissaanik qinnuteqartoq akiliissasoq pillugu aalajangersakkanik Naalackersuisut aalajangersaasinnaapput.

Imm. 2. Pisinnaatitsissummik pigisaqartup aatsitassarsiorluni misissuinissamut pisussaaffini naammassisimangippagit, pisinnaatitsissummik pigisaqartup aatsitassarsiorluni misissuinissamut pisussaaffii aamma aningaasanik Naalackersuisunut akiliisarneq pillugit aatsitassarsiorluni misissuinissamut akuersissummut aalajangersakkanik imaluunniit atugassarititaasunik Naalackersuisut aalajangersaasapput.

Imm. 3. Pisinnaatitsissummik pigisaqartoq akuersissutip aamma akuersissut malillugu ingerlatassat atuutsiinnarneranut ilaalu ilanngullugu Naalackersuisunut akiliummik akiliissasoq, pillugu aatsitassarsiorluni misissuinissamut akuersissummut aalajangersakkanik aamma atugassarititaasunik Naalackersuisut aalajangersaasinnaapput.

Imm. 4. Akuersissut aamma akuersissut malillugu ingerlatassat pillugit Inatsisartut inatsisaat malillugu suliaasanik suliarinninnermut aamma allanik oqartussat suliarinninnerannut atatillugu Naalackersuisut aningaasartuutaannut matussutissanik aningaasanik pisinnaatitsissummik pigisaqartoq akiliissasoq pillugu aalajangersakkanik atugassarititaasunillu Naalackersuisut aalajangersaasinnaapput. Naalackersuisut aningaasat akilernissaat akiliutitut imaluunniit aningaasartuutinik utertitsilluni akiliinertut akilersissinnaavaat.

Ingerlatat pillugit nalunaarusiat, paasissutissanik nalunaarsukkanik misissugassanillu tunniussisarneq aamma isertuussinissaq

§ 39. Pisinnaatitsissummik pigisaqartup Naalackersuisunut tunniutissavai:

- 1) Aatsitassarsiorluni misissuineq aamma akuersissut malillugu ingerlataqarnerit allat taakkualu inernerit pillugit nalunaarusiaq.
- 2) Aatsitassarsiorluni misissuinerup inernerisa aamma taakkununga paasissutissat nalunaarsukkat misissugassallu assilineri aamma pisinnaatitsissummik pigisaqartup nassuiaaneri, inerniliussat tamatumunngalu inassuteqaatit.

Imm. 2. Imm. 1 naapertorlugu paasissutissat Naalackersuisut tigusaat isertuussaapput. Piffissaq isertuussiviusussa Naalackersuisunut tunniussinissamut piffissamut killiliussamiit ukiunik 5-inik sivisussuseqarpoq. Taamaattoq pisuni tamaginni akuersissutip atorunnaarnerani isertuussinissaq atorunnaassaaq.

Imm. 3. Naalackersuisut nalunaarusiornerit, aatsitassarsiorluni misissuinerit inernerit, paasissutissat nalunaarsukkat, misissugassat aamma nassuiaanerit, inerniliinerit inassuteqaatillu ilaalu ilanngullugit isertuussat pillugit paasissutissat nalinginnaasut piffissami isertuussiviusumi tamanut saqqummersissinnaavaat. Naalackersuisut paasissutissanik nalinginnaasunik taamaattunik tamanut saqqummiussinnginnermi, paasissutissat pisinnaatitsissummik pigisaqartumut nassiuutissavai aammalu minnerpaamik qaammatisiutit malillugit ulluni 14-ini piffissamut naleqquttumik killissaliussap aalajangersagaasup iluani pisinnaatitsissummik pigisaqartoq tassunga oqaaseqaammik nassiussisinnaasoq immaqalu paasissutissanik tamaginnik imaluunniit ilaannik saqqummiussinissamut tunngavilersukkamik akerliliissuteqarsinnaasoq, pisinnaatitsissummik pigisaqartoq paasissutississallugu. Pisinnaatitsissummik pigisaqartoq paasissutissanik tamaginnik imaluunniit ilaannik tamanut saqqummiussinissamut akerliliissummik piffissamut killiliussap iluani nassiussippat, aammalu pisinnaatitsissummik pigisaqartup isertuussinissamik soqutigisaqarnerata mianerinissaa, Naalackersuisut paasissutissanik pineqartunik tamanut saqqummiussinissamut soqutigisaqarnerannit annertunerusorineqarpat, Naalackersuisut paasissutissat taakkua tamanut saqqummiutissanngilaat.

Imm. 4. Imm. 2 aamma 3 apeqqutaatinnagit, Naalackersuisut pisuni tamaginni avatangiisinut paasissutissat aamma avatangiisinut nalunaarusiat, nalinginnaasumik inuiaqatigiinnut soqutiginaatilittut nalilerneqartut, tamanut saqqummersissinnaavaat.

Imm. 5. Piffissaq isertuussiviusoq naappat, pisinnaatitsissummik pigisaqartoq aamma Namminersorlutik Oqartussat nalunaarusiornerit, aatsitassarsiorluni misissuinerit inernerinik, paasissutissanik nalunaarsukkanik, misissugassanik aamma nassuiaanernik, inerniliinernik inassuteqaatinillu ilaalu ilanngullugit tunniunneqartunik piginnittussaataalissapput aammalu killilersorneqanngitsumik atugassisinnaalissallutik atuisinnaatitaalissallutillu.

Imm. 6. Naalackersuisut pissutsit imm. 1-5-imi taaneqartut pillugit aalajangersakkanik atugassarititaasunillu erseqqinnerusunik aalajangersaasinnaapput, ilanngullugit nalunaarusiat ilusaat, imai aamma piffissani aalajangersimasuni tunniussisarneq, ingerlatanik aalajangersimasunik suliaqarnermi aamma pisunik imaluunniit pissutsinik aalajangersimasunik pisoqarnera. Ilanngullugu Naalackersuisut ingerlatat, pisut aamma pissutsit aalajangersimasut pillugit nalinginnaasunik paasissutissanik tamanut saqqummiinissaannut periarfissaqarnerat pillugu aalajangersakkanik atugassarititaasunillu erseqqinnerusunik Naalackersuisut aalajangersaasinnaapput.

*Akuersissut aamma ingerlatassat pillugit aalajangersakkanik aamma atugassarititaasunik
Naalackersuisut aalajangersaasarnerat*

§ 40. Naalackersuisut akuersissut aamma akuersissut malillugu ingerlatat § 1 malillugu Inatsisartut inatsisaata siunertaanut aamma Inatsisartut inatsisaanni aalajangersakkanut allanut naapertuuttumik, pisinnaatitsissummik pigisaqartup Kalaallit Nunaanni inatsisinik naammassinninnissaa, Namminersorlutik Oqartussat pisinnaatitaaffii aningaasaqarnikkullu soqutigisai aammalu pisinnaatitsissummik pigisaqartup pisinnaatitaaffii qulakkeerniarlugit,

aatsitassarsiorluni misissuinissamut akuersissummut aalajangersakkanik aamma atugassarititaasunik aalajangersaasinnaapput.

Kapitali 7

Aatsitassanik piiaanissamut akuersissut

Akuersissut

§ 41. Aatsitassarsiorluni misissuinissamut akuersissut malillugu pisinnaatitsissummik pigisaqartoq § 34 malillugu aatsitassanik piiarneqarsinnaasunik pisinnaatitsissummik pigisaqartup piiarniagaannik peqarfimmik paasinarsisitsisimappat killissalersuisimallunilu, aammalu aatsitassarsiorluni misissuinissamut akuersissut aamma akuersissut malillugu ingerlataqarnerit pillugit pisussaaffini tamaasa naammassisimallugit, pisinnaatitsissummik pigisaqartoq Inatsisartut inatsisaanni aalajangersakkat aamma tamatumunnga aalajangersakkat aamma atugassarititaasut allat malillugit aatsitassanik piiaanissamut akuersissummik pisinnaatitaavoq.

Imm. 2. Imm. 1-imi piumasagaatit naammassineqarsimanersut Naalakkersuisut aalajangiissapput.

§ 42. Kisermaassisussaataitaalluni annikitsumik aatsitassarsiorluni misissuinissamut akuersissut malillugu pisinnaatitsissummik pigisaqartup aamma kisermaassisussaataitaalluni annikitsumik aatsitassanik piiaanerup, aatsitassanik piiarneqarsinnaasunik peqarfik pisinnaatitsissummik pigisaqartup piiaaviginiagaa, paasinarsisissimappagu killissalersorsimallugulu, aammalu annikitsumik aatsitassarsiornissamut akuersissummut aamma akuersissut malillugu ingerlatassanut tunngatillugu pisussaaffiit tamaasa naammassisimappagit, pisinnaatitsissummik pigisaqartoq Inatsisartut inatsisaanni matumani aalajangersakkat aamma tamatumunnga aalajangersakkat aamma atugassarititaasut allat malillugit aatsitassanik piiaanissamut akuersissummik tunineqarnissamut pisinnaatitaavoq.

Imm. 2. Imm. 1-imi piumasagaatit naammassineqarsimanersut Naalakkersuisut aalajangiissapput.

§ 43. Naalakkersuisut sumiiffimmuut erseqqinnerusumik killissalersorneqartumut, atugassarititaasut erseqqinnerusumik aalajangersarneqartut naapertorlugit, aatsitassamik ataatsimik arlalinnilluunniit piiaanissamut kisermaassisussaataitaalluni akuersissummik tunniussisinnaapput.

Imm. 2. §§ 41-42 malillugu pisinnaatitsissummik pigisaqartoq piiaanissamut akuersissummik tunineqarnissamik pisinnaatitaappat aammalu Naalakkersuisut tamatumunnga qinnuigalugit, aatsitassarsiorluni misissuinissamut akuersissut imaluunniit annikitsumik aatsitassarsiornissamut akuersissut malillugu pisinnaatitsissummik pigisaqartumut piiaanissamut akuersissummik Naalakkersuisut tunniussisapput.

Imm. 3. Pisuni imm. 2-mi pineqartunut ilaasuni, aatsitassarsiorluni misissuinissamut akuersissut imaluunniit annikitsumik aatsitassarsiornissamut akuersissut malillugu

pisinnaatitsissummik pigisaqartup tamanna qinnutigippagu, aammalu ingerlatseqatigiiffiup allap taassuma piaanissamut akuersissut malillugu ingerlatseqatigiiffimmut pisinnaatitsissummik pigisaqartumut piumasaqaatit naammassisimappagit, Naalakkersuisut, ingerlatseqatigiiffimmut allamut, aatsitassarsiorluni misissuinissamut akuersissut imaluunniit annikitsumik aatsitassarsiorluni misissuinissamut akuersissut malillugu pisinnaatitsissummik pigisaqartumit allaanerusumut, piaanissamut akuersissut tunniutissavaa, takuuk §§ 45-46 aamma 67.

Imm. 4. Naalakkersuisut imaluunniit suleqatigisap allap sumiiffimmi aalajangersimasumi aatsitassanik piiarneqarsinnaasunik peqarfik, piaanissamut akuersissut malillugu pisinnaatitsissummik pigisaqartup piiarsinnaasaa, paasinarsisissimappasuk killissalersorsimallugulu, pisumi imm. 2-mi pineqartunut ilaanngitsumi Naalakkersuisut piaanissamut akuersissummik tunniussisinnaapput.

Imm. 5. Aatsitassat paaavigneqarsinnaasutut paasinarsisinneqarsimasut killissalersorneqarsimasullu piaanissamut akuersissummi pineqartunut ilaatinneqarput.

§ 44. §§ 41-43 malillugu piaanissamut akuersissummik tunniunneqarsinnaalinnginnerani, qinnuteqartoq suliaassamut suliaakkiissutinut najoqqutassamik Naalakkersuisunut nassiullugu nalunaarutigineqartussamik, suliaqassaaq.

Imm. 2. Suliakkiissutinut najoqqutassaq piaanissamut akuersissutip tunniunneqarsinnaalinnginnerani minnerpaamik qaammatisiutit malillugit ulluni 35-ini tamanut ammasumik tusarniaassutigineqassaaq. Qinnuteqartoq § 106 malillugu inuiaqatigiinnut tunngasut pillugit suliaassamut nassuiaammut tamanut ammasumik piareersaataasumik tusarniaassaaq imaluunniit avatangiisinut tunngasut pillugit suliaassamut nassuiaammut tamanut ammasumik piareersaataasumik tusarniaassalluni, piareersaataasumik tusarniaaneq imaluunniit tusarniaanerit taakkua sapinngisamik suliakkiissutinut najoqqutassamut tunngatillugu tusarniaanernut peqatigitillugu ingerlanneqassapput.

Imm. 3. Imm. 2 malillugu suliakkiissutinut najoqqutassaq tusarniaaneq siusinnerpaamik piaanissamut akuersissutip tunniunneqannginnerani qaammatit 24-t sioqqullugit naammassereersimassaaq.

Imm. 4. Imm. 3-mi piffissamut killiliussap saneqqunneqarnissaa, pisuni immikkuullarissuni Naalakkersuisut akuerisinnaavaat.

Imm. 5. Naalakkersuisut suliaassamut suliakkiissutinut najoqqutassap imarisai aammalu tusarniaanerup ingerlanneqartarnera pillugit aalajangersakkanik aamma atugassarititaasunik erseqqinnerusunik aalajangersaasinnaapput.

Pisinnaatitsissummik pigisaqartumut piumasaqaatit

§ 45. Piaanissamut akuersissut malillugu pisinnaatitsissummik pigisaqartoq Kalaallit Nunaanni angerlarsimaffeqarluni aktiaatileqatigiiffittut nalunaarsorsimasuussaaq.

Imm. 2. Aktiaatileqatigiiffik pissusiviusuni qullersaqarfia allaffik Kalaallit Nunaanniissaaq, tassangaaniit aktiaatileqatigiiffik aqunneqassalluni.

Imm. 3. Pisinnaatitsissummik pigisaqartoq piffissami pīaanissamut akuersissummik tunniussinerup kingorna qaammatit 24-t tikillugit imm. 2-mi pīumasaqaatinik naammassinninnissamik pisussaatinneqassanngitsoq, Naalakkersuisut akuerisinnaavaat.

§ 46. Aktiaatileqatigiiffik pīaanissamut akuersissut malillugu pisinnaatitsissummik pigisaqartuusooq, akuersissutit Inatsisartut inatsisaat malillugu tunniunneqartut malillugit aatsaat ingerlatanik suliaqarnermillu suliaqaqqusaavoq aammalu siusinnerusukku suliaqarsimassalluni.

Imm. 2. Ataatsimooqatigiilluni akileraaruserneqarnissaq pinngitsaaliissutaasimangippat, aktiaatileqatigiiffik ingerlatseqatigiiffiit allat ataatsimooqatigalugit akileraaruserneqassanngilaq.

Imm. 3. Aktiaatileqatigiiffik nalinginnaasumik suliffissuarmit aktiaatileqatigiiffiup ilaaffigisaanit annikinnerusumik aningaasannortitsivigineqarsimassanngilaq. Taamaattoq aktiaatileqatigiiffiup avataaneersut aningaasaataasa (akiitsut) aktiaatileqatigiiffiup nammineq aningaasaataannit naleqqiussineq 2:1 angullugu tamatigut annertunerusinnaapput, tassa imaappoq aktiaatileqatigiiffiup avataaneersut aningaasaatai tamatigut aktiaatileqatigiiffiup nammineq aningaasaataannit 200 procentitut annertussusilimmik aningaasartaqaqqusaapput.

Imm. 4. Aktiaatileqatigiiffik nalinginnaasumik naalakkersuinermut attuumassuteqanngitsumik akigititaqarluni aammalu atugassarititaasut naalakkersuinermut attuumassuteqanngitsut, illuatungeriit imminnut attuumassuteqanngitsut, suliffissuarmit ataatsimi ingerlatseqatigiiffiunngitsut, akornanni niuernermit atorineqartartut, tunngavigalugit iliuuseqartassaaq.

Piffissaq akuersissuteqarfiusooq

§ 47. En Piffissaq akuersissuteqarfiusooq sivikinnerussasoq tamatumunnga aalajangersakkani imaluunniit atugassarititaasuni akuersissummi aalajangersaasoqarsimangippat, pīaanissamut akuersissut ukiuni 30-ini akuersissuteqarfiusooq piffissalerlugu tunniunneqassaaq.

Imm. 2. Imm. 1 malillugu piffissaq akuersissuteqarfiusooq Naalakkersuisunit ataasiarluni arlaleriarluniluunniit sivitsorneqarsinnaavoq. Piffissaq akuersissuteqarfiusooq taamaallaat ukiut 20-it tikillugit piffissalerlugu sivitsorneqarsinnaavoq, taamaattoq takuuk imm. 5.

Imm. 3. Pisinnaatitsissummik pigisaqartup imm. 1 malillugu piffissami akuersissuteqarfioqqaartumi akuersissut, aamma akuersissut malillugu ingerlatassat, pillugit pisussaaffini tamaasa naammassisimappagit aammalu aatsitassarsiornissamut pilersaarummi Naalakkersuisut akuerisaanni naatsorsuutigineqartutut pīaanermik ingerlatassat suliarineqarsimappata, pisinnaatitsissummik pigisaqartoq aatsitassanik peqarfimmik pīaarneqarsinnaasumik, pisinnaatitsissummik pigisaqartup piffissami akuersissuteqarfiusumi sivitsorneqartumi pīarniagaanik, paasinarsisitsisimallunilu killissalersuisimappat, pisinnaatitsissummik pigisaqartoq piffissap akuersissuteqarfiusup sivitsorneqarnissaanut pisinnaatitaavoq.

Imm. 4. Piffissap akuersissuteqarfiusup piffissamit akuersissuteqarfiusumit ataatsimut katillugu ukiunit 40-init sivisunerusumut piffissap akuersissuteqarfiusup sivitsorneqarneri

tamaasa, akuersissummut atugassarititaasut allanngortillugit Naalakkersuisut aalajangersaasinnaapput, ilanngullugit § 48 malillugu sumiiffimmik akuersissuteqarfiusumik annikillisisinissaq pillugu atugassarititaasut.

Imm. 5. Piiaanissamut akuersissummut piffissaq akuersissuteqarfiusoq tamarmiusoq ukiunit 50-init sivilisinerusinnaanngilaq.

Imm. 6. Piffissaq akuersissuteqarfiusoq naappat imaluunniit akuersissut atorunnaarpat, Naalakkersuisunit tunuartinneqarpat imaluunniit Naalakkersuisut tamatumunnga akuersissuteqareerneranni pisinnaatitsissummik pigisaqartumit Naalakkersuisunut utertinneqarpat, piiaanissamut akuersissut atorunnaassaaq.

Sumiiffik akuersissuteqarfiusoq

§ 48. Piiaanissamut akuersissut sumiiffimmut akuersissuteqarfiusumut Naalakkersuisunit aalajangersarneqartumut, tunniunneqassaaq.

Imm. 2. Piiaanissamut akuersissut malillugu pisinnaatitsissummik pigisaqartup tamatumunnga qinnuteqarnera malillugu, piiaanissamut akuersissut malillugu sumiiffik akuersissuteqarfiusoq, sumiiffik aatsitassarsiorluni misissuinissamut akuersissut malillugu pisinnaatitsissummik pigisaqartup aatsitassanik peqarfittut piiarneqarsinnaasutut paasinarsisissimasaa killissalorsimasaa, pisinnaatitsissummik pigisaqartup piiaaviginiagaa, ilaatilerlugu annertusitinneqarnissaa pillugu atugassarititaasunik ilaqartumik akuersissummut tapiliussamik Naalakkersuisut tunniussisinnaapput. Naalakkersuisut akuersissummut tapiliussami ilaatigut pissutsit §§ 49, imm. 3-mi aamma §§ 51-56-imi ilaatinneqartut pillugit atugassarititaasunik aalajangersaasinnaapput.

Piffissamut killigitat pillugit aalajangersakkanik aamma atugassarititaasunik Naalakkersuisut aalajangersaasarnerat

§ 49. Pisinnaatitsissummik pigisaqartoq piffissamut killiliussap naleqquttumik erseqqinnerusumik aalajangersagaasup iluani §§ 77 aamma 80 aamma tamatumunnga aalajangersakkat aamma atugassarititaasut allat malillugit aatsitassarsiorfimmut pilersaarummik aamma matusinissamut pilersaarummik tamakkiisumik Naalakkersuisunut tunniussisimassasoq, akuersissummik tunniussinissamut akuersissummillu peqaannarnissamut piunasaqaataasoq pillugu piiaanissamut akuersissummut atugassarititaasunik Naalakkersuisut aalajangersaassapput. Aatsitassarsiorfimmut pilersaarummik aamma matusinissamut pilersaarummik tamakkiisumik tunniussinissamut piffissamut killiliussaq, piiaanissamut akuersissutit tunniunneqarnerata kingorna ukiunit 4-nit kingusinneroqqusaassanngilaq.

Imm. 2. Pisinnaatitsissummik pigisaqartoq imm. 1 malillugu piffissamut killiliussap aalajangersagaasup iluani aatsitassarsiorfimmut pilersaarummik aamma matusinissamut pilersaarummik tamakkiisumik tunniussisimangippat, pisinnaatitsissummik pigisaqartoq tamanna tikitsinnagu piffissamut killissaliussaq kinguartinneqartoq nalunaarfigineqarsimangippat, Naalakkersuisut piffissamut killiliussap naanerani piiaanissamut akuersissut atorunnaassaaq.

Imm. 3. Pissutsinut piiaanermi ingerlatassat aamma akuersissut malillugu ingerlatassat allat ingerlanneqarnissaannut annertuumik pingaaruteqartunut piffissanut killissaliussat pillugit piiaanissamut akuersissummut atugassarititaasunik Naalakkersuisut aalajangersaasinnaapput. Piffissamut killiliussaq imaluunniit piffissamut killiliussamut sivitsuineq malinneqanngippat, akuersissut atorunnaassasoq imaluunniit tunuartinneqassasoq pillugu atugassarititaasunik Naalakkersuisut aalajangersaasinnaapput imaluunniit aalajangiisinnaallutik.

Ingerlatassanik suliaqarneq ilaalu ilanngullugit

§ 50. Piiaanissamut akuersissut malillugu pisinnaatitsissummik pigisaqartoq aatsitassarsiorluni misissuineramik aamma ingerlatassanik tamatumunnga atasunik suliaqarnissamut pisinnaatitaavoq.

Imm. 2. § 39-mi aalajangersakkat, imm. 1 malillugu aatsitassarsiorluni misissuinermut taamaaqataanik atuupput.

Imm. 3. Piiaanissamut akuersissummut sumiiffimmi akuersissuteqarfiusumi akuersissut malillugu pisinnaatitsissummik pigisaqartup saniatigut allat Inatsisartut inatsisaat imaluunniit najukkami aatsitassarsiorluni ingerlatassat malillugit misissueqqaarnissamut, aatsitassarsiorluni misissuinissamut imaluunniit aatsitassanik piiaanissamut akuersissut malillugu ingerlatassanik suliaqarqusaanngillat.

Oqartussat suliarinninneranni aningaasartuutininik matussutissanik akiliutinik, akiliutissanik aamma aningaasartanik akiliineq

§ 51. Piiaanissamut akuersissummik imaluunniit piiaanissamut akuersissut malillugu piffissap akuersissuteqarfiusup sivitsorneqarnissaanik qinnuteqartoq Naalakkersuisunut akiliummik akiliissasoq pillugu aalajangersakkanik aamma piiaanissamut akuersissummut atugassarititaasunik Naalakkersuisut aalajangersaasinnaapput:

- 1) Naalakkersuisut piiaanissamut akuersissummik tunineqarnissamik aammalu piiaanissamut akuersissummik tunineqarnissamik qinnuteqaammik tigusaqarnerannut suliarinninnerannullu,
- 2) piiaanissamut akuersissut malillugu piffissap akuersissuteqarfiusup sivitsorneqarneranut,
- 3) piiaanissamut akuersissummik tunniussinermi, imaluunniit
- 4) piiaanissamut akuersissut malillugu piffissap akuersissuteqarfiusup sivitsorneqarnerani.

Imm. 2. Pisinnaatitsissummik pigisaqartoq akuersissutip aamma akuersissut malillugu ingerlatassat atuutsiinnarneranut ilaalu ilanngullugu Naalakkersuisunut akiliummik akiliissasoq, pillugu aalajangersakkanik imaluunniit piiaanissamut akuersissummut atugassarititaasunik Naalakkersuisut aalajangersaassapput. Pisinnaatitsissummik pigisaqartoq akiliutinik makkuninnga ataatsimik arlalinnilluunniit akiliissasoq pillugu aalajangersakkanik imaluunniit atugassarititaasunik Naalakkersuisut aalajangersaasinnaapput:

- 1) Aatsitassat piarneqartut tunngavigalugit naatsorsorneqarluni royalty-tut ilusilik akiliutissaq (tunisassiornermut royalty), ilanngullugu assersuutigalugu oqimaassusaat (oqimaassutsimut royalty) imaluunniit imaqqortussusaat (annertussutsimut royalty).
- 2) Aatsitassat piarneqartut tunisineranut akiat imaluunniit tunisinermi allatut naleqarnera tunngavigalugu naatsorsorneqarluni akitsuutitut ilusilik akiliut (tunisineranut royalty).

3) Pisinnaatitsissummik pigisaqartup suliaqarnerani akuersissummi ilaatinneqartumi aningaasaqarnikkut pissarsiat ilaattut ilusilik akiliut (pissarsianut akitsuut).

Imm. 3. Imm. 2 malillugu pisinnaatitsissummik pigisaqartup Naalakkersuisunut akiliutissaanik Naalakkersuisut aalajangersaanerminni, tamatuminnga suliaqarneq akiliuteqartinneqartussaappat (akitsuutit), minnerpaamik akileraarusiinertut nammagaasiitigippat, aammalu akiliutissaq (akitsuutit) Kalaallit Nunaanni Namminersorneq pillugu inatsimmi § 7-imi pineqartunut tamakkiisumik ilaatinneqarpat, pisinnaatitsissummik pigisaqartoq suliaminut akuersissummi pineqartunut ilaasunut akileraaruserneqannginnissaa Naalakkersuisut akuerisinnaavaa.

Imm. 4. Aatsitassarsiorluni misissuinissamut akuersissut, Inatsisartut inatsisaasa matuma atuutilinginnerani tunniunneqarsimasoq, tunngavigalugu paaanissamut akuersissummik tunniussisoqarpat, takuuk § 41, imm. 1 aamma § 43, imm. 2, aatsitassarsiorluni misissuinissamut akuersissummi aalajangersakkani imaluunniit atugassarititaasuni tamanna allasimappat, imaluunniit imm. 3, imaluunniit Kalaallit Nunaanni akileraartarnermut inatsisini maleruagassaq taamaaqataa, pisinnaatitsissummik pigisaqartup suliaqarneranut paaanissamut akuersissummi pineqartunut ilaasumut, tamakkiisumik ilaannaasumilluunniit akileraaruserneqannginnissaata akuersissuteqarfigineqarneranut atorneqarpat, aatsaat pisinnaatitsissummik pigisaqartoq Naalakkersuisunut akiliutissamik akiliissasoq, takuuk imm. 2, pillugu Naalakkersuisut aalajangersaasinnaapput.

Imm. 5. Akuersissut aamma akuersissut malillugu ingerlatassat pillugit Inatsisartut inatsisaat malillugu suliassanik suliarinninnermut aamma allanik oqartussat suliarinninnerannut atatillugu Naalakkersuisut aningaasartuutaannut matussutissanik aningaasanik, kiisalu aatsitassarsiornermut suliassaqrifiup iluani Naalakkersuisut sulisuisa ilinniartitaanerannut piginnaangorsaarnerannullu aningaasartuutininik, pisinnaatitsissummik pigisaqartoq Naalakkersuisunut akiliissaaq. Naalakkersuisut aningaasat akilernissaat akiliutitut imaluunniit aningaasartuutininik utertitsilluni akiliinertut akilersissinnaavaat. Naalakkersuisut tamatumunnga aalajangersakkanik imaluunniit atugassarititaasunik erseqqinnerusunik aalajangersaassapput.

Pisinnaatitsissummik pigisaqartup sulisartunik nunaqavissunik sulisoqartarnera aamma nioqqutissanik sullissinernillu pilersuisussanik nunaqavissunik atuisarnera

§ 52. Nunaqavissunik sulisoqarnissamut pisinnaatitsissummik pigisaqartup pisussaaffeqarnera pillugu atugassarititaasut, Naalakkersuisut aatsitassanik paaanissamut akuersissummi aalajangersassavaat.

Imm. 2. Nunaqavissunik nioqqutissanik kiffartuussinernillu pilersuisoqarnissamut pisinnaatitsissummik pigisaqartup pisussaaffeqarnera pillugu atugassarititaasut, Naalakkersuisut aatsitassanik paaanissamut akuersissummi aalajangersassavaat.

Pisinnaatitsissummik pigisaqartup aatsitassanik piarneqartunik suliarinnittarnera

§ 53. Pisinnaatitsissummik pigisaqartup, aatsitassanik akuersissut malillugu piiarneqartunik suliarinninnissamik kissaateqartup, aatsitassat taakkua Kalaallit Nunaanni suliarissagai, aammalu Kalaallit Nunaanni suliarinnineq pisinnaatitsissummik pigisaqartumut annertunerujussuarnik aningaasartuuteqarnermik imaluunniit ajoqtissartaqarnermik malitseqassappat, taamaaliormilulu inuiaqatigiinnut iluaqtissartaasut annertuumik ajorseriartinneqassanngippata, tamannalu sioqqullugu Naalakkersuisunit akuerineqarpat, aatsaat pisinnaatitsissummik pigisaqartup aatsitassat piiarneqartut Kalaallit Nunaata avataani suliarisinnaagai, piiaanissamut akuersissummut aalajangersakkanik aamma atugassarititaasunik Naalakkersuisut aalajangersaasinnaapput.

Pisinnaatitsissummik pigisaqartup aatsitassanik piiarneqartunik uninngasuuteqarnera aamma inunnut nunaqavissunut tunisinera

§ 54. Pisinnaatitsissummik pigisaqartup aatsitassat Kalaallit Nunaanni piiarneqartut uninngasuutigissagai aammalu ingerlatseqatigiiffinnut Kalaallit Nunaanni angerlarsimaffeqartunut imaluunniit inunnut Kalaallit Nunaanni aalajangersimasumik najugaqartunut tamakkiisumillu akileraartussaataasunut tuniniassagai, pillugu aalajangersakkanik aamma piiaanissamut akuersissummut atugassarititaasunik Naalakkersuisut aalajangersaasinnaapput. Ingerlatseqatigiiffiit Kalaallit Nunaanni angerlarsimaffeqartut, imaluunniit inuit Kalaallit Nunaanni aalajangersimasumik najugaqartut tamakkiisumillu akileraartussaataasut aatsitassat nammineerlutik suliareqqinniarpatigit imaluunniit allatut Kalaallit Nunaanni inuussutissarsiornermut aatsitassat atorniarpatigit, aatsaat tamatumunnga piunasaqaatinik Naalakkersuisut aalajangersaasinnaapput.

Imm. 2. Pisinnaatitsissummik pigisaqartup aatsitassanik tunisinera, takuuk imm. 1, niuerfimmi akigititanut aammalu niuerfimmi atugassarititaasut tunngavigalugit pissaaq.

Ingerlatat pillugit nalunaarusiat aamma paasissutissanik nalunaarsukkanik misissugassanillu tunniussisarneq

§ 55. Pisinnaatitsissummik pigisaqartup Naalakkersuisunut tunniutissavai:

- 1) piianermit nalunaarusiat,
- 2) aatsitassarsiorluni misissuineq aamma akuersissut malillugu ingerlatat allat taakkualu inerneru pillugit nalunaarutit
- 3) nalunaarusiat pisinnaatitsissummik pigisaqartumit imaluunniit pisinnaatitsissummik pigisaqartup suliakkiineratigit allanit suliarineqartut assilineri,
- 4) naatsorsukkat,
- 5) naatsorsuutit,
- 6) piianeq taakkualu inerneru pillugit paasissutissat nalunaarsukkat,
- 7) aatsitassarsiorluni misissuinerup inerneru aamma taakkununga paasissutissat nalunaarsukkat misissugassallu aammalu pisinnaatitsissummik pigisaqartup nassuiaaneri, inerniliineri tamatumunngalu inassuteqaatai,
- 8) misissugassat aamma qillerummit qaqitat.

Imm. 2. Pisinnaatitsissummik pigisaqartup imm. 1, nr. 1, 2, 3, 7 aamma 8 naapertorlugit tunniussai, isertuussaapput. Piffissaq isertuussiviusoq Naalackersuisunut tunniussinissamut piffissamut killiliussamiit ukiunik 5-inik sivissuseqarpoq. Taamaattoq akuersissutip atorunnaarnerani, pisuni tamaginni isertuussinissaq atorunnaassaaq.

Imm. 3. Pisinnaatitsissummik pigisaqartup imm. 1, nr. 4 aamma 5 naapertorlugit tunniussai, taakkua pisortat ingerlatsinerat pillugu paasitineqarsinnaatitaaneq pillugu Inatsisartut inatsisaat malillugu allagaatinik takunninnissami ilaatinneqartussaasimangippata, piffissami killiligaanngitsumi.

Imm. 4. Nalunaarusiat, paaanerup inerneru immaqalu aatsitassarsiorluni misissuineq, paasissutissat nalunaarsukkat, misissugassat aamma nassuiaanerit ilaalu ilanngullugit isertuussat pillugit paasissutissat nalinginnaasut piffissami isertuussiviusumi tamanut saqqummiussinnaavaat. Naalackersuisut paasissutissanik nalinginnaasunik taamaattunik tamanut saqqummiussinnginnermi, paasissutissat pisinnaatitsissummik pigisaqartumut nassiutissavai aammalu minnerpaamik qaammatisiutit malillugit ulluni 14-ini piffissamut naleqquttumik killissaliussap aalajangersagaasup iluani pisinnaatitsissummik pigisaqartoq tassunga oqaaseqaammik nassiussinnaasooq immaqalu paasissutissanik tamaginnik imaluunniit ilaannik saqqummiussinissamut tunngavilersukkamik akerliliissuteqarsinnaasooq, pisinnaatitsissummik pigisaqartoq paasissutissallugu. Pisinnaatitsissummik pigisaqartoq paasissutissanik tamaginnik imaluunniit ilaannik tamanut saqqummiussinissamut akerliliissummik piffissamut killiliussap iluani nassiussippat, aammalu pisinnaatitsissummik pigisaqartup isertuussinissamik soqutigisaqarnerata mianerinissaa, Naalackersuisut paasissutissanik pineqartunik tamanut saqqummiussinissamut soqutigisaqarnerannit annertunerusorineqarpat, Naalackersuisut paasissutissat taakkua tamanut saqqummiutissanngilaat.

Imm. 5. Imm. 3 aamma 4 apeqqutaatinngit, Naalackersuisut pisuni tamaginni avatangiisinut paasissutissat aamma avatangiisinut nalunaarusiat, nalinginnaasumik inuiaqatigiinnut soqutiginaatilittut nalilerneqartut, tamanut saqqummersinnaavaat.

Imm. 6. Piffissaq isertuussiviusoq naappat, pisinnaatitsissummik pigisaqartoq aamma Namminersorlutik Oqartussat nalunaarusiornermik, paaanerup immaqalu aatsitassarsiorluni misissuinerup inernerinik, paasissutissanik nalunaarsukkanik, misissugassanik aamma nassuiaanernik, inerniliinernik inassuteqaatinillu ilaalu ilanngullugit tunniunneqartunik piginnittussaatalissapput aammalu killilersorneqanngitsumik atugassisinnaalissallutik atuisinnaatitaallissallutillu.

Imm. 7. Naalackersuisut pissutsit imm. 1-6-imi taaneqartut pillugit aalajangersakkanik aamma atugassarititaasunik erseqqinnerusunik aalajangersaasinnaapput, ilanngullugit nalunaarusiat ilusaat, imai aamma piffissani aalajangersimasuni tunniussisarneq, ingerlatanik aalajangersimasunik suliaqarnermi aamma pisunik imaluunniit pissutsinik aalajangersimasunik pisoqarnera. Ilanngullugu Naalackersuisut ingerlatat, pisut aamma pissutsit aalajangersimasut pillugit nalinginnaasunik paasissutissanik tamanut saqqummiinissamut periarfissaqarnerat pillugu aalajangersakkanik aamma atugassarititaasunik erseqqinnerusunik Naalackersuisut aalajangersaasinnaapput.

Naalackersuisut akuersissut aamma ingerlatassat pillugit aalajangersakkanik aamma atugassarititaasunik aalajangersaasernerat

§ 56. Naalackersuisut akuersissut aamma akuersissut malillugu ingerlatat § 1 malillugu Inatsisartut inatsisaata siunertaanut aamma Inatsisartut inatsisaanni aalajangersakkanut allanut naapertuuttumik, pisinnaatitsissummik pigisaqartup Kalaallit Nunaanni inatsisinik naammassinninnissaa, Namminersorlutik Oqartussat pisinnaatitaaffii aningaasaqarnikkullu soqutigisai aammalu pisinnaatitsissummik pigisaqartup pisinnaatitaaffii qulakkeerniarlugit, piiaanissamut akuersissummut aalajangersakkanik aamma atugassarititaasunik aalajangersaasinnaapput.

Kapitali 8

Aatsitassarsiorluni misissuinissamut akuersissummik imaluunniit piiaanissamut akuersissummik tunniussinermut suleriaasissat aamma tunngavissarititaasut

§ 57. Aatsitassarsiorluni misissuinissamut akuersissut, takuuk § 34, periaatsit §§ 58-imi aamma 59-imi taaneqartut arlaat tunngavigalugu aammalu toqqaanissamut tunngavissarititaasut § 61-imi taaneqartut tunngavigalugit Naalackersuisut aalajangersaasernerat malillugu tunniunneqassaaq.

Imm. 2. Aatsitassanik piiaanissamut akuersissut, takuuk § 43, periaatsit § 59-imi taaneqartut arlaat tunngavigalugu aammalu toqqaanissamut tunngavissarititaasut § 61-imi taaneqartut tunngavigalugit pisinnaatitsissummik pigisaqartunut, takuuk § 41, § 42 naapertorlugu pisinnaatitaaffeqalersimasunut, imaluunniit Naalackersuisut aalajangersaasernerat malillugu tunniunneqassaaq.

§ 58. Sumiiffinnut akuersissummik tunineqarnissaaq pillugu qinnuteqaat, piffissami qinnuteqarfiusussat aalajangersagaasumi (batch-imut piffissaaq) Naalackersuisunit tiguneqartoq, aammalu sumiiffimmut imm. 2 aamma § 59 imm. 1-3 malillugit suleriaasissani ilaatinneqartunut tunngassuteqanngitsoq tunngavigalugu, aatsitassarsiorluni misissuinissamut akuersissut tunniunneqassaaq.

Imm. 2. Piffissami qinnuteqarfiusussat aalajangersagaasumi qaammatsiutit malillugit ullut 90-it iluanni sumiiffimmi tassani aatsitassarsiorluni misissuinissamut akuersissummut pisinnaatitsissummik pigisaqartuusimasup qinnuteqaataanik tigusaqartoqarpat, piffissaaq qinnuteqarfiusussat aalajangersagaasoq, pineqartup aatsitassarsiorluni misissuinissamut akuersissut pigisaata atorunnaarneraniit, qaammatsiutit malillugit ullunut 90-inut sivitsorneqassaaq.

Imm. 3. Qinnuteqaatit imm. 1 malillugu tunniunneqartut tunngavigalugit akuersissummik Naalackersuisut tunniussinngissinnaapput.

Imm. 4. Imm. 1-2 malillugit qinnuteqaatinik tunniussisarneq, tiguisarneq, nalunaarsuisarneq suliarinnittarnerlu pillugit aalajangersakkanik erseqqinnerusunik aamma atugassarititaasunik Naalackersuisut aalajangersaasinnaapput.

§ 59. Sumiiffik aalajangersimasoq piffissami aalajangersimasumi tamatuminnga qinnuteqaat malillugu akuersissummik ingerlaavartumik tunniussiviusassasoq (matu ammasumi suleriaaseq), pillugu aalajangersakkanik Naalakkersuisut aalajangersaasinnaapput. Naalakkersuisut matu ammasumi suleriaaseq pillugu nalunaaruteqarneq Naalakkersuisut nittartagaanni aammalu allatut naleqquttumik Naalakkersuisut tamanut saqqummiutissavaat. Matu ammasumi suleriaatsip allannguuteqarnera taamaaqataanik tamanut saqqummiunneqassaaq. Matu ammasumi suleriaaseq malillugu akuersissummik tunineqarnissaq pillugu qinnuteqaatit, sumiiffimmik ammaaneq imaluunniit allannguutit kingulliit tamanut saqqummersinneqarnerisa kingorna siusinnerpaamik qaammatisiutit malillugit ullut 90-it qaangiunneranni tunniunneqarsinnaapput.

Imm. 2. Akuersissummik tunniussinissaq pillugu tamanut ammasumik nalinginnaasumik qinnuteqaqqusinerup kingorna akuersissut tunniunneqarsinnaasoq, pillugu aalajangersakkanik Naalakkersuisut aalajangersaasinnaapput. Qinnuteqarnissamat piffissaliussaq minnerpaamik qaammatisiutit malillugit ullunik 90-inik sioqqullugu Naalakkersuisut nittartagaanni kiisalu allatut naleqquttut qinnuteqaateqaqqusineq pillugu nalunaaruteqarneq Naalakkersuisut tamanut saqqummersissavaat.

Imm. 3. Sumiiffimmut imm. 1 malillugu matu ammasumi suleriaaseqarnermi pineqartunut ilaatinneqanngitsumut akuersissummik tunineqarnissaq pillugu qinnuteqaat, imm. 2 malillugu sioqqutsisumik qinnuteqartoqaqqusinnitsoq tunniunneqarpat, akuersissummik tunniussinissaq pillugu immikkut ittumik tamanut ammasumik qinnuteqaqqusineq malillugu akuersissummik tunniussisoqarsinnaasoq, pillugu aalajangersakkanik Naalakkersuisut aalajangersaasinnaapput. Qinnuteqaat aammalu sumiiffinni tassani akuersissummik tunineqarnissaq pillugu allanik qinnuteqaqqusineq pillugit nalunaaruteqarneq Naalakkersuisut tamanut saqqummiutissavaat. Nalunaaruteqarneq qinnuteqaatip tiguneqareernerata kingorna kingusinnerpaamik qaammatisiutit malillugit ullut 90-it qaangiunneranni tamanut saqqummiunneqassaaq. Nalunaaruteqarneq Naalakkersuisut nittartagaanni kiisalu allatut naleqquttut tamanut saqqummiunneqassaaq. Qinnuteqaatinik allanik tunniussinissamat piffissamat killiliunneqarpoq, nalunaaruteqarnerup tamanut saqqummiunneqarnerata kingorna ullut 90-it.

Imm. 4. Qinnuteqaatit imm. 1 malillugu tunniunneqartut tunngavigalugit akuersissummik Naalakkersuisut tunniussinngissinnaapput.

Imm. 5. Imm. 1-3 malillugit qinnuteqaatinik tunniussisarneq, tigusisarneq, nalunaarsuisarneq suliarinnittarnerlu pillugit aalajangersakkanik erseqqinnerusunik aamma atugassarititaasunik Naalakkersuisut aalajangersaasinnaapput.

§ 60. Aningaasartuutitut, aningaasartuutissanut imaluunniit ajoqusiinernut, qinnuteqartumi akuersissummik tunineqarnissamik qinnuteqaateqartumi pilersunut imaluunniit qinnuteqaateqartumit pilersinneqartunut Naalakkersuisut akisussaasuunngillat aammalu taarsiissanatik, ajunngitsorsiassarsititsissanatik, utertillugit akiliuteqassanatik imaluunniit allatut akiliissanatik. Tamanna atuutissaaq, annaasaqarneq imaluunniit ajoqusiineq qinnuteqartup akuersissummik tunineqarnissaq pillugu qinnuteqarnerata malitsigisaanik imaluunniit tamatumunnga atatillugu, qinnuteqartup tamatumunnga atatillugu suliaassanik,

ingerlatassanik misissuineramik ilaalu ilanngullugit suliarinninneranut atatillugu aammalu aningaasartuutunik akiliineranut ilaalu ilanngullugit, qinnuteqartup tamatumunnga atatillugu paasissutissanik tamatumunngalu uppersaatinik pissarsineranut, angusaqarneranut imaluunniit suliarinninneranut taakkuninngalu Naalackersuisunut tunniussineranut atatillugu, Naalackersuisut akuersissummik tunineqarnissaq pillugu qinnuteqartup qinnuteqaataanik suliarinninnerani suliaassamillu aalajangiineranni, imaluunniit qinnuteqartumut akuersissummik tunniussisoqassanngitsoq Naalackersuisut aalajangiineranni qinnuteqartumi pilersimanera imaluunniit nalaanneqarsimanera, apeqquaatinnagu.

§ 61. Akuersissut §§ 58-imi aamma 59-imi pineqartunut ilaatinneqartoq toqqaanissamut tunngavissarititaasut imm. 2-5-imi taaneqartut tunngavigalugit tunniunneqassaaq.

Imm. 2. Toqqaanissamut tunngavissarititaasoq tassaavoq, qinnuteqartup teknikkikkut suliaassanullu pisinnaassuseqarnera tamarmiusoq, ilaatigut ilanngullugit:

- 1) Qinnuteqartup siusinnerusukkut aatsitassarsiorluni misissuineramik imaluunniit aatsitassanik piaanermik misilittagaqarnera.
- 2) Qinnuteqartup siusinnerusukkut sumiiffinni taamaaqataannik atugaqarfiusuni aatsitassarsiorluni misissuineramik imaluunniit aatsitassanik piaanermik misilittagaqarnera.

Imm. 3. Toqqaanissamut tunngavissarititaasoq alla tassaavoq, qinnuteqartup aningaasaqarnikkut aningaasalersuinikkullu pisinnaassuseqarnera.

Imm. 4. Qinnuteqartup naliliivigineqarnerani, qinnuteqartup sunniuteqarluannngitsumik pisimasinnaanera imaluunniit Kalaallit Nunaanni akuersissutinut pioreersunut imaluunniit siusinnerusukkut akuersissutinut atatillugu pisinnaatitsissummik pigisaqartup pisussaaffinnik naammassinnissimanninnera, taamatullu inuit qinnuteqartup aqutsisuniittut, ilanngullugit siulersuisuniittut, pisortaatitaniittut, nakkutilliinermut siunnersuisooqatigiinniittut imaluunniit assigisaannik aqutsisuni oqartussaniittut, aqutsisuniittut, piginnittuniittut imaluunniit piginnittuusimasuni ilaasimasuniittut imaluunniit aalajangiisuusumik sunniuteqarsimasut, kiisalu suliffeqarfiit qinnuteqartumik piginnittuusut imaluunniit aalajangiisuusumik sunniuteqartut, piginnittut imaluunniit aalajangiisuusumik sunniuteqartut imaluunniit sunniuteqarsimasut, Naalackersuisut pingaartissavaat .

Imm. 5. § 60, imm. 1-3 malillugit suleriaasissanik atuinermi, Naalackersuisut aammattaaq qinnuteqartut toqqaanissamut tunngavissarititaasut imm. 2-4-mi taaneqartut malillugit naliliivigineqarnerat malillugu assigiimmik naleqqussuseqartutut nalilerneqartut, akornanni inaarutaasumik toqqaanissaq siunertaralugu, toqqaanissamut tunngavissarititaasunik allanik naleqquttunik, tunngavissalinnik aammalu immikkoortitsiviunngitsunik, aalajangersaasinnaapput.

Imm. 6. § 59, imm. 1-3 malillugit suleriaasissanik atuinermi, tunngavissarititaasut imm. 2-5-imi taaneqartut aamma taakkua imminnut sanilliullugit pingaartinneqarnissaat pillugu aalajangersakkat, qinnuteqaqqusinerit § 59-imi taaneqartut ilanngullugit, tamanut saqqummiunneqassapput.

Kapitali 9

Ilisimatuussutsikkut misissuineranut akuersissut

§ 62. Sumiiffimmut erseqqinnerusumik killissaligaasumut, atugassarititaasut erseqqinnerusumik aalajangersagaasut tunngavigalugit, aatsitassanut tunngatillugu ilisimatuussutsikkut misissuinerit suliaqarnissamut akuersissummik Naalakkersuisut qinnuteqartumut tunniussinnaapput.

Imm. 2. Ilisimatuussutsikkut misissuinerit akuersissut ukiut 3-t tikillugit piffissamut akuersissuteqarfiusumut tunniunneqassaaq.

Imm. 3. Imm. 2 malillugu piffissaq akuersissuteqarfiusoq, tamatigut ukiut 3-t tikillugit piffissalerlugu, ataasiarlutik imaluunniit arlaleriarlutik Naalakkersuisunit sivitsorneqarsinnaavoq. Taamaattoq pisinnaatitsissummik pigisaqartup imm. 2 malillugu piffissami akuersissuteqarfioqqaartumi imaluunniit imm. 3 manna malillugu piffissami akuersissuteqarfiusumi sivitsorneqartumi akuersissut aamma akuersissut malillugu ingerlatassat pillugit pisussaaffiit tamaasa naammassisimangippagit, Naalakkersuisut piffissap akuersissuteqarfiusup sivitsorneqarnissaa akuerinngissinnaavaat. Naalakkersuisut piffissap akuersissuteqarfiusup sivitsorneqarnerini tamaginni akuersissummut atugassarititaasut allanngortillugit aalajangersaasinnaapput.

Imm. 4. Ilisimatuussutsikkut misissuinerit akuersissummut piffissaq akuersissuteqarfiusoq tamarmiusoq ukiunit 12-init sivisunerusinnaangilaq.

§ 63. Pisinnaatitsissummik pigisaqartup, takuuk § 62, Naalakkersuisunut tunniutissavai:

- 1) Ilisimatuussutsikkut misissuinerit aammalu akuersissut malillugu ingerlatat allat taakkualu inernerit pillugit nalunaarusiat
- 2) Misissuinerup inernerisa assilineri aamma paasissutissat nalunaarsukkat taakkunangalu misissugassat aamma pisinnaatitsissummik pigisaqartup nassuiaanerit, inerniliussai taakkunangalu inassuteqaatai.

Imm. 2. Pisinnaatitsissummik pigisaqartup imm. 1 malillugu tunniussai, Naalakkersuisunut tunniunneqartut, piffissaq akuersissuteqarfiusoq tamaat isertuussaapput. Akuersissut atorunnaarpat, imm. 1 malillugu tunniunneqartut, Naalakkersuisunut tunniussat, Naalakkersuisunut tunniussinissamut piffissamut killiliussamiit ukiuni 5-ini isertuussaapput.

Imm. 3. Naalakkersuisut nalunaarusiat, misissueqqaarnerit inernerit, paasissutissat nalunaarsukkat, misissugassat aamma nassuiaanerit, inerniliinerit inassuteqaatillu ilaalu ilanngullugit isertuussat pillugit paasissutissat nalinginnaasut, piffissami isertuussiviusussami tamanut saqqummiussinnaavaat. Naalakkersuisut paasissutissanik nalinginnaasunik taamaattunik tamanut saqqummiussinnginnermi, paasissutissat pisinnaatitsissummik pigisaqartumut tusarniaassutigalugit nassitutissavai aammalu minnerpaamik qaammatisiutit malillugit ulluni 14-ini piffissamut naleqquttumik killissaliussap aalajangersagaasup iluani pisinnaatitsissummik pigisaqartoq tassunga oqaaseqaammik nassiussinnaasooq immaqalu paasissutissanik tamaginnik imaluunniit ilaannik saqqummiussinissamut tunngavilersukkamik akerliliissuteqarsinnaasooq, pisinnaatitsissummik pigisaqartoq paasissutissallugu. Pisinnaatitsissummik pigisaqartoq paasissutissanik tamaginnik imaluunniit ilaannik tamanut saqqummiussinissamut akerliliissummik piffissamut killiliussap iluani nassiussippat, aammalu pisinnaatitsissummik pigisaqartup isertuussinissamik soqutigisaqarnerata

mianerinissaa, Naalakkersuisut paasissutissanik pineqartunik tamanut saqqummiussinissamut soqutigisaqarnerannit annertunerusorineqarpat, Naalakkersuisut paasissutissat taakkua tamanut saqqummiutissanngilaat.

Imm. 4. Imm. 2 aamma 3 apeqquataatinngit, Naalakkersuisut pisuni tamaginni avatangiisinut paasissutissat aamma avatangiisinut nalunaarusiat, nalinginnaasumik inuiaqatigiinnut soqutiginaatilittut nalilerneqartut, tamanut saqqummersissinnaavaat.

Imm. 5. Piffissaq isertuussiviusoq naappat, pisinnaatitsissummik pigisaqartoq aamma Namminersorlutik Oqartussat nalunaarusiornerut, misissueqqaarnerit inernerinut, paasissutissanut nalunaarsukkanut, misissugassanut aamma nassuiaanernut, inerniliinernut inassuteqaatinullu ilaalu ilanngullugit piginnittussaataalissapput aammalu akeqanngitsumik atugassiissutiginnissaannut atornissaannullu pisinnaatitaalissallutik.

Imm. 6. Naalakkersuisut pissutsit imm. 1-5-imi taaneqartut pillugit aalajangersakkanik aamma atugassarititaasunik erseqqinnerusunik aalajangersaasinnaapput, ilanngullugit nalunaarusiat ilusissaat, imarisassaat aammalu piffissani aalajangersimasuni tunniussinissaq, ingerlatassanik aalajangersimasunik suliaqarnermi aammalu pisut imaluunniit pissutsit aalajangersimasut atuutilerneranni. Ilangullugu Naalakkersuisut ingerlatat aalajangersimasut, ineneri, pisut pissutsillu pillugit paasissutissanik nalinginnaasunik tamanut saqqummiinissamut periarfissaqarnerat pillugu aalajangersakkanik atugassarititaasunillu Naalakkersuisut aalajangersaasinnaapput.

§ 64. Naalakkersuisut ilisimatuussutsikkut misissuinissamut akuersissummut pissutsit attuumassuteqartut tamaasa pillugit aalajangersakkanik atugassarititaasunillu aalajangersaasinnaapput, ilanngullugit § 1 malillugu Inatsisartut inatsisaata siunertaannut naapertuuttumik akuersissut aamma akuersissut malillugu ingerlatassat pillugit sillimmasiinissaq.

Imm. 2. Ilisimatuussutsikkut misissuinerit pillugit aalajangersakkanik erseqqinnerusunik Naalakkersuisut aalajangersaasinnaapput, ilanngullugit annaassiniarnernut atatillugu aningaasartuutunik akiliinissaq aamma akiliinernut taamaattunut sillimmasiissummit matussutissaqarnissaq aamma qularnaveeqqusiinissaq pillugit.

Kapitali 10

Misissueqqaarnissamut akuersissutinut, aatsitassarsiorluni misissuinissamut akuersissutinut aamma piiaanissamut akuersissutinut aalajangersakkat nalinginnaasut

Aalajangersakkat nalinginnaasut atuunnerat

§ 65. Kapitali 10-mi aalajangersakkat, misissueqqaarnissamut akuersissutinut, aatsitassarsiorluni misissuinissamut akuersissutinut aamma aatsitassanik piiaanissamut akuersissutinut, atupput.

Pisinnaatitsissummik pigisaqartumut piumasaqaatit

§ 66. Akuersissut malillugu pisinnaatitsissummik pigisaqartoq akuersissut malillugu ingerlatassanik suliaqarnissamut teknikkikkut suliassanullu pisinnaassuseqassaaq kiisalu aningaasaqarnikkut aningaasalersuinikkullu pisinnaassuseqassalluni aammalu akuersissut aamma akuersissut malillugu ingerlatassat pillugit pisussaaffiit tamaasa naammassisimassallugit.

Imm. 2. Pisinnaatitsissummik pigisaqartup pisuussutini tamakkiisumik atorsinnaassavai. Pisinnaatitsissummik pigisaqartoq akiliisinnaassuseqanngissanngilaq imaluunniit akiliisinnaassuseqannginnermut, ilusilersueqqinnissamut assigisaannulluunniit eqqartuussivimmi imaluunniit allaffissornikkut sulianik ingerlatitsinermi pineqartunut ilaassanani, ilanngullugu akiliisarnerminik unitsitsisimassanani, akiliisinaajunnaartutut inissisimassanani, sulianik unitsitsisimassanani imaluunniit assingusumik inissisimassanani.

§ 67. Pisinnaatitsissummik pigisaqartoq, inuit pisinnaatitsissummik pigisaqartumi piginnittut imaluunniit aalajangiisuusumik sunnuteqartut aamma inuit pisinnaatitsissummik pigisaqartup aqutsisuiniittut, ilanngullugit siulersuisut, pisortaatitat, nakkutilliinnermut siunnersuisooqatigiit imaluunniit aqutsisuni oqartussat assigisaat, ukiut 4-t kingulliit iluanni eqqartuunneqarsimassanngillat imaluunniit akiliisitsinermut akuersisimassanatik (akuersaarlutik) imaluunniit allatut pillarneqarsimassanatik imaluunniit pineqaatissinneqarsimassanatik, makkununga tunngasuni:

- 1) Akiliilluni peqquserlutsitsineq, peqquserlunneq imaluunniit niuernikkut isumaqatigiilluni suliaqarneq.
- 2) Pinerluttut aaqqissuussaanni peqataaneq.
- 3) Ajortumeeriniarluni ingerlataqarnernut atatillugu ajortumeeriniarluni iliuuseqarnerit imaluunniit pinerluttuliorluni iliuuseqarnerit.
- 4) Aningaasanik pinerlunnikkut aningaasarsiarineqartunik malunnaarunnaarsaaneq imaluunniit ajortumeerinianut aningaasalersuineq.
- 5) Meeqqanik sulisoqarneq imaluunniit inunnik niuerutiginninneq.

Imm. 2. Pisinnaatitsissummik pigisaqartup aamma inuit taaneqartut taakkua akuersissummik tunniussinermi aammalu piffissaq akuersissuteqarfiusoq tamaat §§ 66 aamma 67 imm. 1 malillugit piumasaqaatit tamaasa naammassisimassavaat.

Akileraarutit akitsuutillu aamma taakkuninnga akiliisarneq pillugit nalunaarusiorneq

§ 68. Suliffeqarfiit aamma inuit kikkut Inatsisartut inatsisaat malillugu akuersissut malillugu ingerlatassanik sularinnittuunersut imaluunniit sularinninnermi peqataanersut pillugu paasissutissanik pisinnaatitsissummik pigisaqartoq tunniussissasoq pillugu Naalackersuisut aalajangersakkanik aamma atugassarititaasunik aalajangersaasinnaapput imaluunniit aalajangiisinaapput.

Imm. 2. Suliffeqarfiit aamma inuit Inatsisartut inatsisaat malillugu akuersissut malillugu ingerlatassanik sularinnittut imaluunniit sularinninnermi peqataasut, akileraarutinut aamma akitsuutinut tunngasut pillugit paasissutissanik allakkianillu Naalackersuisunut aamma

oqartussanut allanut tunniussissasoq, pillugu Naalackersuisut aalajangersakkanik aamma atugassarititaasunik aalajangersaasinnaapput imaluunniit aalajangiisinnaapput.

Imm. 3. Isumaqatigiissuteqarfigineqartut, akileraarutinut akitsuutinullu tunngasut pillugit Naalackersuisunut aamma oqartussanut allanut imm. 2 malillugu paasissutissanik allakkianillu tunniussisimangitsut, imaluunniit akileraarutinik akitsuutinillu Kalaallit Nunaanni maleruagassanut sukkulluunniit atuuttunut naapertuuttumik Naalackersuisunut aamma oqartussanut allanut akiliisimangitsut, pisinnaatitsissummik pigisaqartup akuersissut malillugu ingerlatanik suliaqarnermini atoqqusaanngikkai, pillugu pisinnaatitsissummik pigisaqartumut Naalackersuisut peqqussuteqarsinnaapput.

Imm. 4. Pisinnaatitsissummik pigisaqartup imm. 1 malillugu paasissutissanik tunniussinissaata, imm. 3 malillugu peqqusissuteqarnerup naammassinissaata imaluunniit akileraarutinut akitsuutinullu tunngasut pillugit paasissutissanik allakkianillu Naalackersuisunut aamma oqartussanut allanut tunniussinissaata aammalu Kalaallit Nunaanni maleruagassanut sukkulluunniit atuuttunut naapertuuttumik akileraarutinik akitsuutinillu akiliinissaata, tungaanut pisinnaatitsissummik pigisaqartup Inatsisartut inatsisaat malillugu akuersissut malillugu ingerlatanik suliaqarnini unitsissagaa, Naalackersuisut aalajangiisinnaapput.

Akuersissummik allamut tunniussineq aamma eqqartuussivikkut malersuineq

§ 69. Inatsisartut inatsisaat malillugu akuersissutit toqqaannartumik imaluunniit toqqaannangitsumik allamut tunniunneqarnera imaluunniit nuunneqarnera, allamut tunniussineq imaluunniit nuunneqarnera Naalackersuisunit akuerineqarsimangippat, akuersissummut aamma Inatsisartut inatsisaannut tunngatillugu inatsisitigut sunniuteqassanngilaq.

Imm. 2. Naalackersuisut allamut tunniussinerup imaluunniit nuussinerup akuersissuteqarfigineqarneranut atugassarititaasunik aalajangersaasinnaapput.

Imm. 3. Inatsisartut inatsisaat malillugu akuersissut eqqartuussivikkut malersuinermi ilaatinneqanngilaq. Akuersissummut eqqartuussivikkut malersuineq inatsisitigut sunniuteqanngilaq.

Pisinnaatitsissummik pigisaqartup ingerlatseqatigiiffimmut allamut kattunneqarnera imaluunniit ingerlatseqatigiiffinni arlalinni aggulunneqarnera

§ 70. Pisinnaatitsissummik pigisaqartup ingerlatseqatigiiffimmut allamut kattunera (kattunneq), kattunneq Naalackersuisunit akuersissuteqarfigineqarsimangippat, pisinnaatitsissummik pigisaqartumut Inatsisartut inatsisaat malillugu akuersissummut aamma allatigut Inatsisartut inatsisaannut tunngatillugu inatsisitigut sunniuteqassanngilaq.

Imm. 2. Pisinnaatitsissummik pigisaqartup ingerlatseqatigiiffinni arlalinni aggulunneqarnera (agguluineq), agguluneq Naalackersuisunit akuersissuteqarfigineqarsimangippat, pisinnaatitsissummik pigisaqartumut Inatsisartut inatsisaat malillugu akuersissummut aamma allatigut Inatsisartut inatsisaannut tunngatillugu inatsisitigut sunniuteqassanngilaq.

Imm. 3. Naalackersuisut imm. 1 imaluunniit 2 malillugu kattunnermut imaluunniit aggluinermut akuersissuteqarnermut atugassarititaasunik aalajangersaasinnaapput.

Akuersissummut aamma aalajangiinnermut eqqartuussinermi imaluunniit isumaqatigiissitsiniarnikkut eqqartuussinertigut akuersissuteqartarnermi aaqqiagiinngissuteqarnermi inatsisunik toqqaaneq

§ 71. Akuersissummi, akuersissut malillugu ingerlataqarnerni aamma tamatumunnga atatillugu pisuni Inatsisartut inatsisaat aamma Kalaallit Nunaanni inatsisit allat aamma danskit inatsisaat sukkulluunniit Kalaallit Nunaanni atuuttut malinneqartussaapput, taakkunanngalu maleruagassiivigineqarlutik.

Imm. 2. Akuersissut, akuersissut malillugu ingerlataqarnerit imaluunniit tamatumunnga atillugu pisut pillugit aaqqiagiinngissuteqarnerit sulluunniit Inatsisartut inatsisaat aamma danskit inatsisaat sukkulluunniit Kalaallit Nunaanni atuuttut malillugit aalajangiiffigineqassapput.

§ 72. Akuersissut imaluunniit akuersissummut atatillugu ingerlataqarnerit imaluunniit pissutsit pillugit inatsisini pisussaaffiusumik imaluunniit naliliinikkut Naalackersuisut aalajangiineri pillugit Naalackersuisut aamma pisinnaatitsissummik pigisaqartup akornanni aaqqiagiinngissuteqarnerit sulluunniit Kalaallit Nunaanni Eqqartuussivimmumut, aaqqiagiinngissuteqarnerit taamaattut pillugit kisermaassilluni aalajangiisinnaatitaasussamut, suliakkiunneqassapput aammalu taamaallaat taakkununnga suliakkiunneqarsinnaallutik aalajangiiffigineqarsinnaallutillu. Kalaallit Nunaanni Eqqartuussiviit tassaassaaq eqqartuussivik siullertut suliarinnittusaaq.

§ 73. Atugassarititaasut akuersissummi aalajangersagaasut naammassineqarsimanersut pillugu Naalackersuisut aamma pisinnaatitsissummik pigisaqartup akornanni aaqqiagiinngissuteqarnerneq eqqartuussivimmumut isumaqatigiissitsiniartartumut suliakkiunneqassaaq, akuersissummi aalajangersarneqarsinnaavoq. Eqqartuussiviup isumaqatigiissitsiniartartup aalajangiinera inaarutaasuuvoq. Aaqqiagiinngissuteqarnerneq piffissamut killigititap ukiup ataatsip iluani taamaallaat eqqartuussivimmumut isumaqatigiissitsiniartartumut suliakkiunneqarsinnaavoq. Piffissamut killiliussaq ulloq aalajangiinerup suliami pineqartumut nalunaarutigineqarfia aallarnerfigalugu naatsorsorneqassaaq. Piffissamut killiliussaq arfininngornermi, sapaammi imaluunniit nalliuttumi naappat, piffissamut killiliussaq ulluinnarmut tullermut siullermut sivitsorneqassaaq.

§ 74. Eqqartuussivinnut, takuuk § 72, imaluunniit eqqartuussivimmumut isumaqatigiissitsiniartartumut, takuuk § 73, suliassamik suliakkiisinnaatitaaneq, akuersissutip atorunnaareernerata kingorna atuutissaaq, ilanngullugit akuersissutip atuuffissaata naanera, atorunnaarnera imaluunniit Naalackersuisunit tunuartinneqarnera imaluunniit Naalackersuisut

tamatumunnga akuersissuteqarnerat malillugu pisinnaatitsissummik pigisaqartup akuersissummik utertitsinera.

Kapitali 11

Aatsitassat ilaalu ilanngullugit pillugit aalajangersakkat nalinginnaasut

§ 75. Inatsisartut inatsisaat malillugu pisinnaatitsissummik pigisaqartoq aatsitassanik Kalaallit Nunaanni piiarneqartunik, Kalaallit Nunaanniit annissisinnaasoq imaluunniit Kalaallit Nunaanniit misissugassanik tiguisinnaasoq, Naalakkersuisut Inatsisartut inatsisaat malillugu akuersissut malillugu pisinnaatitsissummik pigisaqartumut akuersissuteqarsinnaapput. Akuersissuteqarneq atugassarititaasut erseqqinnerusumik aalajangersarneqartut tunngavigalugit tunniunneqarsinnaavoq. Akuersissuteqarneq Naalakkersuisut aatsitassarsiorfimmumt pilersaarummut imaluunniit pisinnaatitsissummik pigisaqartumit ingerlatassanut pilersaarummut allamut akuersissuteqarnerannut ilaatillugu, akuersissummi akuersissuteqarnermut atugassarititaasutut imaluunniit avammumt annissinissamut akuersissuteqarnermut immikkoortumut ilaatillugu nalunaarutigineqarsinnaavoq.

Imm. 2. Pineqartoq aatsitassanik Kalaallit Nunaanni inatsisit malillugit piiarneqartunik Inatsisartut inatsisaat malillugu akuersissut malillugu Kalaallit Nunaanniit avammumt annissisinnaasoq imaluunniit misissugassanik tiguisinnaasoq, Naalakkersuisut allamut Inatsisartut inatsisaat malillugu akuersissut malillugu pisinnaatitsissummik pigisaqartumit allaanerummut akuersissuteqarneq nalunaarutigisinnaavaat. Akuersissuteqarneq atugassarititaasut erseqqinnerusumik aalajangersarneqartut tunngavigalugit tunniunneqarsinnaavoq. Akuersissuteqarneq avammumt annissinissamut akuersissuteqarnertut immikkoortutut nalunaarutigineqassaaq.

§ 76. Naalakkersuisut aatsitassat pillugit aalajangersakkanik aamma atugassarititaasunik erseqqinnerusunik aalajangersaasinnaapput, ilanngullugit suliarinninneq, uninngasuuteqarneq, toqqorsivimmiititsineq, assartuussineq, niuerneq, annissuineq, eqqussuineq aamma akuersissummik allagartaliisarneq.

Imm. 2. Aatsitassanik aalajangersimasunik suliarinninneq aamma niuerutiginninneq, akuersissuteqarneq Naalakkersuisunit tunniunneqartoq malillugu taamaallaat anninneqarsinnaasut pillugu aalajangersakkanik aamma atugassarititaasunik Naalakkersuisut aalajangersaasinnaapput.

Imm. 3. Imm. 2 malillugu aalajangersakkanik imaluunniit atugassarititaasunik Naalakkersuisut aalajangersaareerpata, imm. 2-mi taaneqartutut Naalakkersuisut akuersissuteqarnermik tunniussisinnaapput aammalu akuersissuteqarnermut taamaattumut aalajangersakkanik imaluunniit atugassarititaasunik aalajangersaasinnaallutik.

Kapitali 12

Ingerlatassanut pilersaarutit, akuersissuteqarnerit, ingerlatanik matusineq aamma qularnaveeqqusiisarneq il.il.

Aatsitassarsiorfimmut pilersaarut

§ 77. Aatsitassarsiorfimmut pilersaarut pisinnaatitsissummik pigisaqartup aatsitassanik piiaanermut pilersaarutaanut aamma piiaanissamut akuersissut malillugu tamatumunnga atatillugu ingerlatassaannut pisinnaatitsissummik pigisaqartup pilersaarutaanik imaqassaaq. Aatsitassarsiorfimmut pilersaarummi pissutsit makkua ilaatigut ilaatinneqassapput:

- 1) Aatsitassarsiorfeqarfimmik, suliaqarfissanik allanik aamma illutanik ilaalu ilanngullugit pilersitsineq, ingerlatsineq atuinerlu.
- 2) Aatsitassanik piiaaneq, suliarinninneq, uninngasuuteqarneq, assartuussineq aamma tuniniaaneq.
- 3) Nunaqavissunik sulisoqarneq aatsitassarsiorfimmut pilersaarut malillugit ingerlatassanik suliarinninnermi nioqqutissanik sullissinernullu nunaqavissunik pilersuisoqarneq.
- 4) Isumannaallisaaneq, peqqinnissaq, isumalluutininik atorluaaneq aamma inuiaqatigiinni piujuaannartitsisumik ingerlatsinissaq pillugit ingerlataqarnerit aamma pissutsit.

Imm. 2. Piiaanissamut akuersissut malillugu pisinnaatitsissummik pigisaqartup piiaaneq imaluunniit tamatumunnga piareersaalluni imaluunniit tamatumunnga atatillugu ingerlataqarneq aallartinnginnerani, aatsitassarsiorfimmut pilersaarut suliarineqarsimassaaq aammalu pisinnaatitsissummik pigisaqartumit tunniunneqarsimassalluni aammalu Naalackersuisunit akuersissuteqarfigineqarsimassalluni.

Imm. 3. Aatsitassarsiorfimmut pilersaarut nutartigaassaaq aammalu piiaanermi ingerlatat ineriartornerannut allannguuteqarnerannullu tunngatillugu aammalu isumannaallisaanermi, peqqinnissami, avatangiisini allanilu pissutsini attuumassuteqartuni allannguuteqarnerani, attuumassuteqarnera malillugu allanngortinneqartassalluni.

Imm. 4. Pissutsit allanngorsimasut tamanna pisariaqartippasuk, imaluunniit Naalackersuisut tamatumunnga aalajangiippata, pisinnaatitsissummik pigisaqartup sapinngisamik piaartumik aatsitassarsiorfimmut pilersaarut nutartigaq imaluunniit allanngortinneqartoq suliarissavaa aammalu tunniutissallugu aamma Naalackersuisut aatsitassarsiorfimmut pilersaarummut nutartikkamut imaluunniit allanngortinneqartumut akuersissuteqartissallugit.

Imm. 5. Naalackersuisut imm. 2 imaluunniit 4 malillugu imaluunniit § 121 malillugu akuersissuteqarnermut atugassarititaasunik aalajangersaasinnaapput.

Piffissami akuersissuteqarfiusumi atortut peerneqarnerat aamma saliineq ilaalu ilanngullugit aamma akuersissut malillugu suliaqarnerup aamma ingerlatat unitsinneqarnerat matuneqarnerallu

§ 78. Akuersissut malillugu pisinnaatitsissummik pigisaqartup piffissaq akuersissuteqarfiusoq tamaat:

- 1) sanaartukkat illullu, pisinnaatitsissummik pigisaqartumit pilersinneqartut aammalu pisinnaatitsissummik pigisaqartumit atorneqanngitsut, peertassavai aammalu

2) Naalakkersuisut allamik akuersissuteqarsimangippata, tamanna ajornartinnagu, sumiiffinni kallarneqartuni pinngortitami ilaalu ilanngullugit saaliisassalluni aammalu attuumassutilinnut iluarseeqqittassalluni.

Imm. 2. Akuersissut malillugu pisinnaatitsissummik pigisaqartup akuersissut malillugu suliaqarnerup aamma ingerlataqarnerit unitsinneqarneranni:

- 1) Naalakkersuisut allamik akuersissuteqarsimangippata, sanaartukkat illullu pisinnaatitsissummik pigisaqartumit pilersinneqarsimasut piissavai, aammalu
- 2) sumiiffinni kallarneqartuni pinngortitami ilaalu ilanngullugit saliissalluni aammalu attuumassuteqartuni iluarseeqqissalluni.

Imm. 3. Pisinnaatitsissummik pigisaqartup ingerlatassanik aamma iliuuseqarnernik imm. 1-imi aamma 2-mi taaneqartunik ingerlatsinissaq pillugu peqqussuteqarneq Naalakkersuisunit aalajangerneqartoq malinngippagu, Naalakkersuisut pisinnaatitsissummik pigisaqartup akiligassaanik annaasaqatigisinnaasaanillu taakkua suliaritissinnaavai

Imm. 4. Pisinnaatitsissummik pigisaqartup ingerlatassanik aamma iliuuseqarnernik imm. 1-imi aamma 2-mi taaneqartunik ingerlatsinissaq pillugu Naalakkersuisunit peqqussuteqarneq malinngippagu, Naalakkersuisut sanaartukkat illullu ilaalu ilanngullugit, suliffeqarfinit inunnillu pineqartunit pigineqartut, aammalu akuersissut malillugu ingerlatassanik suliaqarnermi atorineqarsimasut aammalu sumiiffinni kallarneqartuniittut, peerneqarnissaat pillugu suliffeqarfinit aamma inunnut allanut Naalakkersuisut peqqussuteqarsinnaapput.

Imm. 5. Inuup imaluunniit suliffeqarfiup imm. 4 malillugu peqqussuteqarneq malinngippagu, Naalakkersuisut inuup imaluunniit suliffeqarfiup akiligassaanik annaasaqatigisinnaasaanillu sanaartukkat illullu ilaalu ilanngullugit peersinnaavai.

Pigisanik nalilinnik peerneqartunik uninngatitsineq aamma tuniniaaneq

§ 79. Pisinnaatitsissummik pigisaqartup akuersissut aamma akuersissut malillugu ingerlataqarnerit pillugit pisussaaffimminik naammassinninnissaata tungaanut, pisinnaatitsissummik pigisaqartup pigisai nalillit Naalakkersuisut § 78, imm. 3 malillugu iliuuseqarnerini peerneqartut Naalakkersuisut tigummigallarsinnaavaat.

Imm. 2. Suliffeqarfiit imaluunniit inuit pigisai nalillit § 78, imm. 5 malillugu Naalakkersuisut ingerlataanni iliuuseqarnerinilu peerneqartut, suliffeqarfiup imaluunniit inuup pineqartup Naalakkersuisut iliuuseqarnerini Naalakkersuisunut pisussaaffimminik, naammassinninnissaasa tungaanut, Naalakkersuisut tigummigallarsinnaavaat.

Imm. 3. Imm. 1 imaluunniit 2 malillugu pisussaaffeqartup piffissamut killiliussap naleqquttup Naalakkersuisunit aalajangersagaasup iluani imm. 1-imi imaluunniit 2-mi taaneqartut Naalakkersuisunut pisussaaffini naammassisimangippagit, Naalakkersuisut pigisat nalillit tamanut ammasumik kaattaassilluni tuniniaanikkut tuniniartissinnaavaat aammalu aningaasat kaattaassilluni tuniniaanermeersut pisussaaffeqartup pisussaaffiisa naammassinissaannut atorsinnaallugit.

Imm. 4. Imm. 3 malillugu tamanut ammasumik kaattaassilluni tuniniaanerup ingerlanneqannginnerani imm. 1 imaluunniit 2 malillugu pisussaaffeqartoq aammalu sapinngisamik kinaluunniit alla, pigisanut nalilinnut tunngatillugu pisinnaatitaaffii imaluunniit

pisussaaffii tuniniaanermi kallarneqartussatut ilimagineqartariaqartut, pineqartup najugaa ilisimaneqarsimappat, minnerpaamik sapaatit akunnerini marlunni ilimasaaraluni kaattaassilluni tuniniaanissaq pillugu nalunaarfingineqassapput.

Imm. 5. Imm. 3 malillugu tamanut ammasumik kaattaassilluni tuniniaanermi Naalackersuisut pigisat nalillit ataasiakkaat taakkua kaattaassilluni tuniniaasut ataatsimoorfianni imaluunniit elektroniskimik kaattaassilluni tuniniaanermi tuniniarneqartussatut neqeroortigissavai. Naalackersuisut naliliippata, kaattaassilluni tuniniaanermi nutaami annertunerujussuarmik neqeroortumik pissarsisoqarsinnaasoq, kaattaassilluni tuniniaaneq nutaaq ingerlanneqassasoq, Naalackersuisut kaattaassilluni tuniniaanerup pineqartup naammassinerani, aalajangersinnaapput.

Imm. 6. Imm. 1 imaluunniit 2 malillugu pisussaaffeqartoq piffissamut killiliussap naleqquttup Naalackersuisunit aalajangersarneqartup iluani, aningaasartuutit tamatumunnga atasut, taakkua qaffasinnerusumik neqeroortoqarnerani matusserneqassanngikkaluarpata, akilernissaannut ingerlaannaq qularnaveeqqusiilluni, nutaamik kaattaassilluni tuniniaanissaq piumasarisinnaavaa. Kinaluunniit alla pigisanut nalilinnut tunngatillugu neqeroorummi pisinnaatitaaffimminik tamakkiisumik matussusiivigineqanngitsaq, taamaaliorinnaavoq.

Imm. 7. Imm. 3 malillugu tamanut ammasumik kaattaassilluni tuniniaanermi aningaasartuutit mm. 1 imaluunniit 2 malillugu pisussaaffeqartumit akilerneqassapput aammalu piunnaasaqatit allat tamaasa sioqqullugit kaattaassilluni tuniniaanerup aningaasartaannit akilerneqarsinnaallutik.

Imm. 8. Kaattaassilluni tuniniaanermut aningaasartuutit akilernissaannut atorineqartussanit, takuuk imm. 7, Naalackersuisut piunnaasaqataannit, takuuk imm. 1 imaluunniit 2, aammalu pigisamut tunngatillugu pisinnaatitaaffinnit allanit, kaattaassilluni tuniniaanermi annertunerusumik tunisineq iluanaaruteqarfiuppat, tunisinermi iluanaarutaasut sinneruttut pigisamit piginnittumut tunniunneqassapput.

Matusinissamut pilersaarut

§ 80. Pisinnaatitsissummik pigisaqartup piiaanissamut akuersissut malillugu aatsitassanik piiaanermi tamatumunngalu atatillugu ingerlataminik unitsitsineranut aamma matusineranut pisinnaatitsissummik pigisaqartup pilersaarutaanik, ilanngullugit isumannaallisaanermut, peqqinnissamut, avatangiisinut tunngasut, matusinissamut pilersaarut imaqassaaq. En matusinissamut pilersaarummi ilaatigut pissutsit makkua ilaatinneqassapput:

- 1) Piiaanerup unitsinneqarnera aamma matuneqarnera, suliareqqiineq, uninngasuuteqarneq, assartuussineq aamma aatsitassanik tuniniaaneq aammalu tamatumunnga atatillugu ingerlatassat.
- 2) Aatsitassarsiorfimmi atortut, atortut allat aamma illut.
- 3) Sumiiffimmi akuersissuteqarfiusumit aamma sumiiffinnit kallarneqartunit allanit pigisat, atortussat, akuutissat eqqagassallu ilaalu ilanngullugit, aatsitassanik piiaanermut, suliareqqiinerneq, uninngasuuteqarnerneq, assartuussinerneq imaluunniit tuniniaanermut imaluunniit piiaanissamut akuersissut malillugu ingerlatanut allanut atatillugu atorineqartut, pilersinneqartut imaluunniit kuutsinneqartut, peerneqarnerat.

- 4) Sumiiffimmi akuersissuteqarfiusumi aamma sumiiffinni kalluarneqartuni allani pinngortitami ilaalu ilanngullugit saliineq aamma attuumassuteqartunik iluarseeqqinneq.
- 5) Piiaanissamut akuersissut ilaalu ilanngullugit malillugu ingerlataqarnerit unitsinneqarnerisa matuneqarnerisalu piviusunngortinneqarnerisa kingorna, piffissami tassani alapernaarsuinissaq naleqqussimappat, pissutsinik attuumassuteqartunik alapernaarsuineq.
- 6) Ingerlataqarnerit unitsinneqarnerat matuneqarnerallu tamatumalu kingorna alapernaarsuineq ilaalu ilanngullugit pillugit matusinissamut pilersaarut malillugu ingerlataqarnerit suliarineqarneranni, nunaqavissunik sulisoqarneq aamma nioqqutissanik sullissinernillu nunaqavissunik pilersuisoqarneq.
- 7) Ingerlataqarnerit unitsinneqarnerat matuneqarnerallu tamatumalu kingorna alapernaarsuineq ilaalu ilanngullugit pillugit Inatsisartut inatsisaat, piiaanissamut akuersissut aamma aatsitassarsiorfimmut pilersaarut ilaalu ilanngullugit malillugu pisinnaatitsissummik pigisaqartup pisussaaffiinik naammassinninnissamut qularnaveeqqusiineq.

Imm. 2. Aatsitassarsiorfimmi sanaartukkanik ataatsimik arlalinnilluunniit, sanaartukkanik imaluunniit illunik allanik allamut tunniussineq imaluunniit qimanneqarnissaat, Naalakkersuisunit akuersissuteqarnikkut aatsaat pisinnaavoq.

Imm. 3. Atortut imaluunniit illut arlallit ilaat ataaseq arlallilluunniit qimanneqassappata, aserfallatsaaliuineq, alapernaarsuineq aamma ingerlatassat allat aamma iliuusissat ilaalu ilanngullugit pillugu aalajangersakkanik matusinissamut pilersaarut imaqassaaq, ilanngullugu isumannaallisaaneq, peqqinnissaq aamma avatangiisit pillugit.

§ 81. Piiaanissamut akuersissut malillugu pisinnaatitsissummik pigisaqartup tamatumunnga piareersarluni imaluunniit tamatumunnga atatillugu piiaanermik imaluunniit ingerlatanik suliaqalinnginnerani, matusinissamut pilersaarut pisinnaatitsissummik pigisaqartumit suliarineqarsimassaaq tunniunneqarsimassallunilu aammalu Naalakkersuisunit akuerineqarsimassalluni.

Imm. 2. Pisinnaatitsissummik pigisaqartup matusinissamut pilersaarut Naalakkersuisunut tunniutissavaa aammalu kingusinnerpaamik pisinnaatitsissummik pigisaqartup aatsitassarsiorfimmut pilersaarummik Naalakkersuisunut tunniussineranut aammalu aatsitassarsiorfimmut pilersaarummik Naalakkersuisut akuersissuteqarnerannik pissarsiarinninneranut peqatigitillugu, matusinissamut pilersaarummut Naalakkersuisut akuersissuteqarnerat pissarsiarisimassallugu.

Imm. 3. Pisinnaatitsissummik pigisaqartup ingerlatassamik imm. 1-imi pineqartunut ilaanngitsumik aallartitsinnginnerani, Naalakkersuisut § 121 naapertorlugu tamatumunnga atugassarititaasunik piumasaqarsimappata, matusinissamut pilersaarut pisinnaatitsissummik pigisaqartumit suliarineqarsimassaaq aammalu tunniunneqarsimassalluni aamma Naalakkersuisunit akuerineqarsimassalluni.

Imm. 4. Matusinissamut pilersaarut nutartersimatinneqassaaq aammalu piiaanermi ingerlatat, matusinermi ingerlatat, tamatumunnga atatillugu aningaasartuutit ineriartornerannut aamma isumannaallisaanermi, peqqinnissami, avatangiisini aammalu pissutsini allani attuumassuteqartuni ineriartornermut allannguutinullu tunngatillugu attuumassuteqarnera malillugu allanngortinneqartassalluni.

Imm. 5. Pissutsit allanngorneranni tamanna pisariaqalerpat, imaluunniit Naalakkersuisut tamatumunnga aalajangiippata, pisinnaatitsissummik pigisaqartoq sapinngisamik piaartumik matusinissamut pilersaarummik nutartikkamik imaluunniit allanngortinneqartumik suliaqassaaq tunniussissallunilu aammalu matusinissamut pilersaarutip nutartikkap imaluunniit allanngortinneqartup taassuma Naalakkersuisunit akuerineqarnera pissarsiarisimassallugu.

Imm. 6. Naalakkersuisut imm. 1-imi, 3-mi aamma 5-imi taaneqartutut § 121 malillugu akuersissuteqarnermut atugassarititaasunik aalajangersaasinnaapput. Naalakkersuisut ilaatigut suliaqarnerup unitsinneqareernerata kingorna isumannaallisaanerup, peqqinnissap, avatangiisit aamma mianerisassat allat attuumassuteqartut isumagineqarnissaat pillugu atugassarititaasunik aalajangersaasinnaapput, ilanngullugu matusinerup kingorna piffissami aalajangersimasumi alapernaarsuinissaq pillugu atugassarititaasut.

§ 82. Pisinnaatitsissummik pigisaqartup matusinissamut pilersaarummik, piviusunngortitsisinnaanera aammalu matusineq, matusinissamut pilersaarutip piviusunngortinneqarnissaa aamma tamatumunnga atatillugu ingerlatassat iliuusissallu pillugit pisussaaffimminik naammassinninnissanaanera qanoq aningaasaqarnikkut qulakkeerreqassanersoq, matusinissamut pilersaarummi allassimassaaq.

Imm. 2. Matusineq, matusinissamut pilersaarutip piviusunngortinneqarnissaa aamma tamatumunnga atatillugu ingerlatassat iliuusissallu pillugit pisussaaffimminik naammassinninnissaanut, takuuk imm. 1, pisinnaatitsissummik pigisaqartoq qanoq qularnaveeqqusiiniarnersoq, matusinissamut pilersaarummi allassimassaaq.

Imm. 3. Pisinnaatitsissummik pigisaqartup matusinissamut pisussaaffimminik naammassinninnissaanut qularnaveeqqusiisarnera pillugu matusinissamut pilersaarummi aalajangersakkat Naalakkersuisunit akuerineqassapput. Pisinnaatitsissummik pigisaqartup matusinissamut pisussaaffimminik naammassinninnissaanut qularnaveeqqusiinera Naalakkersuisunit akuerineqassaaq.

Imm. 4. Pissutsit allanngorneranni tamanna pisariaqalerpat, pisinnaatitsissummik pigisaqartoq sapinngisamik piaartumik pisinnaatitsissummik pigisaqartup matusinissamut pisussaaffimminik naammassinninnissaanut qularnaveeqqusiinera pillugu aalajangersakkat allanngortinneqartut ilaatillugit, takuuk imm. 1, matusinissamut pilersaarummik suliaqassaaq tunniussissallunilu, ilanngullugit qularnaveeqqusiineq naleqquttoq annertunerusoq imaluunniit allanngortinneqartoq pillugu, aammalu qularnaveeqqusiineq pillugu aalajangersakkat allanngortinneqartut Naalakkersuisunit akuerineqarnerat pissarsiarissallugu. Pisinnaatitsissummik pigisaqartup tamatuma kingorna sapinngisamik piaartumik matusinissamut pilersaarummi qularnaveeqqusiineq pillugu aalajangersakkat allanngortinneqartut taakkua malillugit piumasqaatinik naammassinninnissamut qularnaveeqqusiissaaq aammalu qularnaveeqqusiinerup Naalakkersuisunit akuersissuteqarneq pissarsiarissallugu.

Imm. 5. Naalakkersuisut imm. 3-4-mi taaneqartutut § 121 malillugu akuersissuteqarnermut atugassarititaasunik aalajangersaasinnaapput.

Piiaanermi ingerlatat unitsikkallarnejartarnerat

§ 83. Kingusinnerusukkut piiaanermik ingerlataqarnerit aallarteqqinneqarnissaat siunertaralugu piffissamut qaammatisiutit malillugit ullunit 60-init sivisunerusumut piiaanissamut akuersissut malillugu piiaanermik ingerlatanik unitsitsineq, piiaanermik ingerlataqarnerit unitsinneqannginneranni Naalakkersuisunit akuerineqassaaq. Akuersissuteqarneq tamatigut ukiut marluk tikillugit tunniunneqarsinnaavoq. Akuersissuteqarneq nutarterneqarpat, tamanna atugassarititaasut allanngortillugit tunniunneqarsinnaavoq.

Imm. 2. Naalakkersuisut § 121 malillugu imm. 1 malillugu akuersissuteqarnermut atugassarititaasunik aalajangersaasinnaapput.

§ 84. Piiaanermi ingerlatanik unitsitsigallarnermi piffissaq minnerpaamik ukiunik 6-inik sivisussuseqarpat, imaluunniit unitsitsigallarnissamut akuersissuteqarnermut atugassarititaasut naammassineqarsinnaanngippata, Naalakkersuisut § 80-imi taaneqartutut matusinissamut pilersaarutip piviusunngortinnissaanut pisinnaatitsissummik pigisaqartoq peqqusinnaavaat.

Qularnaveeqqusiineq

§ 85. Inatsisartut inatsisaat malillugu akuersissut malillugu pisinnaatitsissummik pigisaqartoq akuersissut aamma akuersissut malillugu ingerlatassat pillugit pisussaaffimminik naammassinninnissamut qularnaveeqqusiissasoq aammalu qularnaveeqqusiisimaannassasoq pillugu aalajangersakkanik aamma atugassarititaasunik Naalakkersuisut aalajangersaasinnaapput. Qularnaveeqqusiinermi ilaatinneqassapput Inatsisartut inatsisaat, aalajangersakkat aamma atugassarititaasut Inatsisartut inatsisaat, akuersissut, aatsitassarsiorfimmuut pilersaarut, matusinissamut pilersaarut, ingerlatassanut pilersaarutit allat, pilersaarutitut akuersissuteqarnerit, ingerlatassanut akuersissuteqarnerit aamma aalajangiinerit Naalakkersuisunit aalajangiiffigineqartut malillugit aalajangersagaasut malillugit pisinnaatitsissummik pigisaqartup pisussaaffii.

Imm. 2. Imm. 1 malillugu qularnaveeqqusiineq pillugu aalajangersakkanik aamma atugassarititaasunik erseqqinnerusunik Naalakkersuisut aalajangersaasinnaapput.

§ 86. § 85, imm. 1 malillugu qularnaveeqqusiineq, akuersissut, tamatumunnga pilersaarutit, taakkununnga akuersissuteqarnerit malillugit ingerlataqarnerit ineriartorneritut allannguuteqarnerinullu, tamatumunnga atatillugu aningaasartuutit aamma isumannaallisaanermi, peqqinnissami, avatangiisini aammalu pissutsini allani attuumassuteqartuni ineriartornermut allannguutinullu tunngatillugu naleqquttumik annertussuseqartumik nutartersimatinneqassapput allanngortinneqartassallutillu.

Imm. 2. Pissutsit allanngorneranni tamanna pisariaqalerpat imaluunniit Naalakkersuisut tamatumunnga aalajangiippata, pisinnaatitsissummik pigisaqartup sapinngisamik piaartumik qularnaveeqqusiineq allanngortissavaa aammalu qularnaveeqqusiinermut allanngortinneqartumut Naalakkersuisut akuersissuteqarnerat pissarsiarissallugu.

Imm. 3. Pisinnaatitsissummik pigisaqartup Inatsisartut inatsisaat, akuersissut, ingerlatassanut pilersaarutit, ingerlatassanut pilersaarutitut aamma ingerlatassanut akuersissuteqarnerit aamma Naalakkersuisut aalajangiineri malillugit qularnaveeqqusiineq pillugu pisussaaffiisa naammassineqarnissaasa qulakkeernissaanut tamanna pisariaqartillugu, imm. 1-2 malillugit qularnaveeqqusiineq allanngortinneqassaaq.

Imm. 4. Naalakkersuisut imm. 1-3 malillugit qularnaveeqqusiinissaq pillugu aalajangersakkanik atugassarititaasunillu erseqqinnerusunik aalajangersaasinnaapput.

Kapitali 13

Avatangiisinik, silap pissusaanik pinngortitamillu allanngutsaaliuineq

§ 87. Inatsisartut inatsisaanni avatangiisinik, silap pissusaanik aamma pinngortitamik allanngutsaaliuinissaq pillugu maleruagassat avatangiisit, silap pissusaata pinngortitallu illersorneqarnerannut iluaqutaassapput, taamaalilluni inuiaqatigiinni ineriartortitsineq, inuit inuuniarnerminni atugaat aammalu uumasut naasullu piujuartinnissaat ataqqillugit piujuartitsiviusumik tunngavilimmik pissalluni.

Imm. 2. Inatsisartut inatsisaanni avatangiisinik, silap pissusaanik aamma pinngortitamik allanngutsaaliuinissaq pillugu maleruagassani siunertarineqarpoq ingerlatassanit:

- 1) inuit peqqissusaannut navianartorsiorsitsisinnaasunit,
- 2) uumasunik, naasunik, imaluunniit nunami imaluunniit imaani imaluunniit nunap iluani pinngortitami naleqartitanik ajoqusiisinnaasunit,
- 3) nunamik, imaanic, nunap iluanik imaluunniit pinngortitami pisuussutinik pisussaataalluni atuinissamut akornusiisinnaasunit,
- 4) inuit inuuniarnerminni atugarisaannik ajornerulersitsisinnaasunit aamma
- 5) naleqartitanik imaluunniit ingerlatassanik sukisaarsaarutissanik ajornerulersitsisinnaasunit, avatangiisinik, silap pissusaanik pinngortitamillu mingutsitsinissamik allatullu sunniinissamik pitsaaliuinissaq, killilersimaarinissaq akiuiniarnissarlu.

Imm. 3. Imm. 2-mi allassimasunut atatillugu pingaartumik siunertarineqarpoq:

- 1) nunami, imaani, immap naqqani, nunap iluani, imermi, silaannarmi mingutsitsinissamik, silap pissusaanut tunngasunut ajoqusiisumik sunniinissamik kiisalu sajukulaartitsinermi ajoqutissartaqalersitsinissamik nipiliornernillu ajoqutissartaqalersitsinissamik pitsaaliuinissaq, killilersimaarinissaq akiuiniarnissarlu,
- 2) aatsitassanik allanillu pisuussusunik atuinerup maangaannartitsinerullu killilersimaarnissaa,
- 3) teknologiimik mingunnerusumik atuinerulernissaq, aamma
- 4) atoqqiisarnernissaq aammalu eqqakkanik igitsinermut atatillugu ajornartorsiuteqartarnerup killilersimaarnissaa.

§ 88. Teknikkip pissarsiarineqarsinnaasup pitsaanerpaap, ilanngullugit sanaartukkat, maskiinat, atortut, sulianik ingerlatitsinerit, teknologiit, nioqutissiassat, akuutissat atortussallu mingutsitsinnginnerusut, aammalu iliussissat mingutsitsinermik akiuiniarnermi sapinngisamik pitsaanerpaat, atornerqarnerani suut anguneqarsinnaanersut, avatangiisinik, silap pissusaanik pinngortitamillu allanngutsaaliuineq pillugu Inatsisartut inatsisaanni

maleruagassat atornerqarneranni allaffissornikkullu aqunneqarneranni pingaartinneqassaaq. Nalilersuinermi tassani pingaartumik teknologiimik minguinnersumik atuinikkut suliniutissat pitsaaliuisussat pingaartumik pingaartinneqassapput.

Imm. 2. Mingutsitsinissamik pitsaaliuinermut pakkersimaarinninnermullu iliuusissat annertussusaannik suussusaannillu naliliinermi, isumalluutinik maangaannartitsinissap sapinngisamik annertunerpaamik killilersimaarneqarnissaa siunertaralugu, avatangiisut silarliit qanoq issusaat aammalu mingutsitsinerup taakkununga aammalu akuutissat atortussallu kuuffiini tamaginni sunniinissaa pingaartinneqassaaq.

§ 89. Kinaluunniit ingerlatassanik Inatsisartut inatsisaanni pineqartunut ilaasumik aammalu mingutsitsinissaasumik aallartitsiniartoq, mingutsitsinissap navianaateqarnera sapinngisamik annertunerpaamik killilersimaarneqartussanngorlugu suliaqarnissamut piffissamik aammalu suliaqarnissap sumiiffissaanik toqqaassaaq. Ingerlatassat ingerlanneqarnissaannut piffissamik sumiiffimmillu toqqaanermi sumiiffimmi pinngortitaq qanorlu issusaa, ilanngullugu maannakkut atuinissaq siunissamilu pilersaarutigineqartoq, aammalu imikoornernik, eqqagassanik allanillu akuutissanik atortussanillu mingutsitsisartunik naapertuuttumik igitsinissamut periarfissat eqqarsaatigineqassapput.

Imm. 2. Kinaluunniit ingerlatassanik mingutsitsinissaasunik aallartitsiniartoq, aallartitsisoq imaluunniit suliaqartoq, iliuusissanik mingutsitsinermut tassunga pitsaaliuisussanik pakkersimaarinnittussanillu aalajangersaassaaq, aammalu ingerlatassat pilersinneqarnissaat, aaqqissuunneqarnerat ingerlanneqarnerallu sapinngisamik annikinnerpaamik mingutsitsinermik malitseqartussanngorlugu aaqqissuutissallugu, takuuk § 88.

Imm. 3. Kialuunniit ingerlatassanik mingutsitsinissaasunik aallartitsiniartup, aallartitsisup imaluunniit suliaqartup, sanaartugaatit ilaalu ilanngullugit, ilanngullugit maskiinat, atortut immaqalu unnuisarfiit, toqqarneqarneranni, pilersinneqarneranni aaqqissuunneqarnerannilu mingutsitsinerup, aniatitsinerit, eqqagassaqaalertarnerit isumalluutinillu atuinerup sapinngisamik pitsaanerpaamik killilersimaarneqarnissaat qulakkiissavaa. Tamanna aamma ingerlatsinerup aaqqissuunneqarnerani qulakkeerneqassaaq, ilanngullugit aatsitassarsiorluni misissuinerup ingerlanissaannik, paaanerup ingerlanissaannik, suliaqarnerit ingerlanissaannik, nioqqutissiassanik, akuutissanik atortussanillu ingerlatsinermut atatillugu atornerqartussanik aammalu upalungaarsimanermut mingutsitsinernillu akiuiniarnernut suleriaasissanik toqqaanermi.

§ 90. Suliffeqarfik imaluunniit inuk avatangiisinik allanngutsaaliuineq imaluunniit mingutsitsinissamik pitsaaliuineq, mingutsitsinermik killilersimaarineq imaluunniit akiuiniarneq pillugit Inatsisartut inatsisaat malillugu pisussaaffeqarpat, tamanna teknikkikkut, suliaqarnikkut aningaasaqarnikkullu pineqartumut periarfissaasimappat, pineqartup pisussaaffiit naammassineqarneranni teknikkimik pissarsiarineqarsinnaasumik pitsaanerpaamik aammalu iliuusissanik mingutsitsinermik akiuiniarnissamut sapinngisamik pitsaanerpaanik atuisoqarnera qulakkiissavaa siuarsassallugulu, takukkit §§ 88 aamma 89.

Imm. 2. Suliffeqarfiup imaluunniit inuup Inatsisartut inatsisaat malillugu avatangiisini aarlerinaataasut paasineqarnissaat, nalilersorneqarnissaat aammalu suliaqarnermi

naapertuuttumik ajornartinnagu sapinngisamik annertunerpaamik annikillisinneqarnissaat isumagisussaappagu, tamanna teknikkikkut, suliaqarnikkut aningaasaqarnikkullu pineqartumut periarfissaasimappat, pineqartup avatangiisinik allanngutsaaliuinissaq eqqarsaatigalugu aammattaaq teknikkimik pissarsiarineqarsinnaasumik pitsaanerpaamik aammalu iliuusissanik mingutsitsinermik akiuiniarnermut sapinngisamik pitsaanerpaanik atuisoqarnera qulakkiissavaa siuarsassallugulu, takukkit imm. 1 aamma §§ 88 aamma 89.

Imm. 3. Imm. 2 malillugu pisussaaffiit aamma pisuni makkunani atuupput:

1) Suleqatigisap allap sulinissaq imaluunniit ingerlatassat allat avatangiisini aarlerinaataasut paasineqartussanngorlugit, nalilersorneqartussanngorlugit imaluunniit suliaqarnermi naapertuuttumik ajornartinnagu sapinngisamik annertunerpaamik annikillineqartussanngorlugit pilersaarusiussagai, suliffeqarfiup imaluunniit inuup isumagisussaappagu.

2) Suleqatigisap allap sulinissaq imaluunniit ingerlatassat allat avatangiisini aarlerinaataasut paasineqartussanngorlugit, nalilersorneqartussanngorlugit imaluunniit suliaqarnermi naapertuuttumik ajornartinnagu sapinngisamik annertunerpaamik annikillineqartussanngorlugit pilersaarusiorsimanerai nakkutigineqarnissaa, suliffeqarfiup imaluunniit inuup isumagisussaappagu.

3) Suliffeqarfik imaluunniit inuk avatangiisini aarlerinaataasut paasineqarnissaanut, nalilersorneqarnissaanut aammalu suliaqarnermi naapertuuttumik sapinngisamik annertunerpaamik annikillisinnissaanut peqataasussaappat.

4) Avatangiisini aarlerinaataasut paasineqartussanngorlugit, nalilersorneqartussanngorlugit imaluunniit suliaqarnermi naapertuuttumik ajornartinnagu sapinngisamik annertunerpaamik annikillineqartussanngorlugit suliaqarnerup ingerlannissaanut pisariaqartumik ilinniartinneqassasoq ilitersorneqassasorlu sulisitsisup imaluunniit suliffeqarfiup allap imaluunniit inuup allap isumagisussaappagu.

5) Avatangiisini aarlerinaataasut aarlerinaataajunnaarnissaat imaluunniit annikillisinnissaat suliffeqarfiup imaluunniit inuup isumagisussaappagu.

6) Sanaartukkat, aaqqissuussinerit, umiarsuit imaluunniit angallatit allat, ilanngullugit pineqartup sannai, aaqqissugaanera atortulersugaanera ilaalu ilanngullugit, avatangiisitigut tamakkiisumik isumannaatsuusut, suliffeqarfiup imaluunniit inuup qulakkeertussaappagu.

§ 91. Ingerlatassamut imaluunniit sanaartukkamik pilersitsinissamut ingerlatsinissamullu, Inatsisartut inatsisaanni pineqartunut ilaasumut, akuersissuteqarnissaq pillugu aalajangiinerni ilaatigut mianerisassat pingaartinneqassapput:

1) Avatangiisinut, silap pissusaanut pinngortitamullu tunngasunut ajorseriartitsinissap imaluunniit allatut sunniinerlunnissap pinngitsoortinnissaa.

2) Nunami namminermi nunanilu tamalaani pinngortitamik allanngutsaaliuiffiusussatut toqqagaasuni pinngortitap aammalu pinngortitami suussutsit uumasullu najortagaasa ajorseriartinnissaasa aammalu uumasut sumiiffiit toqqarneqarneranni pineqartut akornusersorneqarnissaasa pinngitsoortinnissai.

§ 92. Ingerlatassaq imaluunniit sanaartuqaq Inatsisartut inatsisaanni pineqartunut ilaasoq

avatangiisinut, silap pissusaanut pinngortitamullu tunngasunut annertuumik sunniuteqarsinnaassasoq ilimagineqartariaqarpat, akuersissuteqarneq ingerlatassap imaluunniit sanaartukkap avatangiisinut, silap pissusaanut pinngortitamullu tunngasunut sunniutissaannik nalilersuineq tunngavigalugu, aammalu tamat aamma oqartussat kattuffillu kalluarneqartussat tamatumunnga oqaaseqaateqarnissamut periarfissaqareernerisa kingorna, aatsaat akuersissuteqartoqarsinnaavoq. Nalilersuineq kapitali 15-imi avatangiisinut sunniutaasussanik nalilersuinnermut maleruagassat malillugit pissaq.

Imm. 2. Ingerlatassaq imaluunniit sanaartugaq Inatsisartut inatsisaanni pineqartunut ilaasoq sumiiffinnut pinngortitamik illersuiviusunut nunami namminerimi imaluunniit nunani tamalaani toqqagaasunut annertuumik sunniuteqarsinnaasoq ilimagineqartariaqarpat, ingerlatassap imaluunniit sanaartukkap taassuma piujuartinnissaanut siunertaasut eqqarsaatigalugit sumiiffimmi sunniutissaannut nalilersuineq tunngavigalugu aatsaat akuersissuteqarfigineqarsinnaavoq. Tamanna Naalakkersuisut naapertuuttutut isigippassuk, akuersissuteqannginnermi sumiiffimmi sunniutaasussanik nalilersuineq pillugu tamat oqaaseqarnissamut periarfissinneqassapput.

Imm. 3. Pisuni imm. 1-imi aamma 2-mi taaneqartuni, ingerlatassaq imaluunniit sanaartugaq sumiiffiit nunami namminerimi imaluunniit nunani tamalaani pinngortitamik illersuiviusut qanoq issusaannut ajoqusiissanngippat, imaluunniit inuiaqatigiit soqutigisaat annertuut, ilanngullugit inooqatigiinnermut imaluunniit aningaasaqarnermut tunngasut, ingerlatassat suliarineqarnissaat imaluunniit sanaartukkamik pilersitsinissaq ingerlatsinissarlut pisariaqalersippassuk, aatsaat akuersissuteqartoqarsinnaavoq, taamaattoq takuuk imm. 4.

Imm. 4. Ingerlatassat imaluunniit sanaartugaq sumiiffimmut nunami namminerimi imaluunniit nunani tamalaani pinngortitami illersuiviusumi pinngortitap qanoq issusaanik pingaartitsiviusumi imaluunniit suussusaanik pingaartitsiviusumut annertuumik sunniuteqarsinnaassasoq ilimagineqartariaqarpat, inuit peqqissusaat, tamat isumannaatsuunissaat imaluunniit avatangiisinut annertuumik iluaqutaasumik sunniuteqartitsinissaq eqqarsaatigalugu tamanna pisariaqarpat, imaluunniit inuiaqatigiit soqutigisaat allat eqqarsaatigalugit ingerlatassap suliarineqarnissaa imaluunniit sanaartukkap ingerlanneqarnissaa pisariaqarpat, Naalakkersuisut pisuni imm. 3-mi taaneqartuni ingerlatassanut imaluunniit sanaartukkamut aatsaat akuersissuteqarsinnaapput.

Imm. 5. Naalakkersuisut imm. 3-mi imaluunniit 4-mi pineqartunut ilaasunut akuersissuteqarpata, Naalakkersuisut naleqquttunik taartissatut iliuusissanik aalajangersaassapput, ilanngullugit akuersissuteqarnermut atugassarititaasut. Taartissatut iliuusissanut aningaasartuutit akuersissuteqarfigineqarnissamik qinnuteqartumit matussuserneqassapput.

Piginnaatitsissutinut aalajangersakkat

§ 93. Naalakkersuisut avatangiisinik, silap pissusaanik pinngortitamillu allannguusaaliuineq aamma pissutsit §§ 87-92-mi taaneqartut pillugit aalajangersakkanik atugassarititaasunillu erseqqinnerusunik aalajangersaasinnaapput, ilanngullugu avatangiisinik, silap pissusaanik pinngortitamillu allannguusaaliuineq pillugu nunami namminerimi maleruagassat,

isumaqatigiissutit imaluunniit malittarisassat atorneqarnissat pillugu.

§ 94. Sumiiffimmi akuersissuteqarfiusumi avataanilu ingerlatassanik Inatsisartut inatsisaanni pineqartunik ilaasunik aammalu ingerlatassanik allanik suliaqarnermut atatillugu avatangiisit, silap pissusaa pinngortitarlu pillugit aammalu pissutsit Inatsisartut inatsisaanni pineqartunut ilaasut pillugit aalajangersakkanik atugassarititaasunillu Naalackersuisut aalajangersaasinnaapput.

Kapitali 14

Avatangiisinut akisussaaffik

§ 95. § 20, imm. 2 malillugu akisussaasuusooq ingerlatassamut tunngatillugu akuersissut imaluunniit akuersissuteqarneq malillugu pisinnaatitsissummik pigisaqartuunani allaappat, pisinnaatitsissummik pigisaqartoq aamma ingerlatassanut akisussaasuusaaq. Taamaattoqarnerani taakkua marluk ataatsimoorlutik aammalu tamarmik immikkut kapitalimi matumani maleruagassat malillugit tamakkiisumik pisussaaffeqassapput akisussaasuussallutillu.

Imm. 2. Imm. 1 malillugu ingerlatamut, avatangiisinut ajoqusiisimasumut imaluunniit ajoquseeqataasimasumut imaluunniit avatangiisinut ajoqusiinissamik annertuumik navianartorsiortitsisimasumut akisussaasuusooq, avatangiisinut ajoqusiinermut imaluunniit avatangiisinut ajoqusiinissamik annertuumik navianartorsiortitsinermut akisussaasuusooq. Ajoqusiineq imaluunniit ajoqusiinissamik annertuumik navianartorsiorneq pissutsit pisinnaasut malitsigisaannik pilersimagaluarpuunniit, avatangiisinut ajoqusiineq imaluunniit avatangiisinut ajoqusiinissamik annertuumik navianartorsiortitsinerup qanoq pilersimanera apeqqutaatinnagu tamanna atuuppoq.

§ 96. Avatangiisinut ajoqusiinissamik annertuumik navianartorsiortitsinermut akisussaasuusooq pitsaaliuilluni iliuusissanik pisariaqartunik, avatangiisinut ajoqusiinissamut annertuumik navianartorsiortitsinermik pinngitsoortitsinnaasunik, ingerlaannaq aallartitsissaaq, aammalu navianartorsiorneq aamma iliuusissat aallartinneqartut pillugit Naalackersuisut kalerrissallugit.

Imm. 2. Avatangiisinut ajoqusiinermut akisussaasuusooq suliniutinik ajoqusiinerup annertussusaanik killilersimaarinnissinnaasunik aammalu ajoqusiinerup annertunerulernissaanik pinngitsoortitsinnaasunik suliaqarnikkut ingerlanneqarsinnaasunik ingerlaannaq aallartitsissaaq, aammalu Naalackersuisut ajoqusiineq suliniutillu pillugit kalerrissallugit.

Imm. 3. Naalackersuisut imm. 1 aamma 2 malillugit pisussaaffiit naammassineqarnerannut nakkutilliissapput, aammalu naammassinninnissaat aamma tamatumunnga atatillugu iliuusissanik suliaqarnissaaq pillugu peqqusisinnaallutik.

§ 97. Paasissutissanik avatangiisini ajoqusiisooqarsimanersooq imaluunniit avatangiisini ajoqusiinissaaq annertuumik navianaateqarnersooq nalilersuinissamut pingaaruteqartunik

akisussaasuusooq tunniussissasooq Naalakkersuisut peqqusisinnaapput. Avatangiisini ajoqusiinermut imaluunniit avatangiisini ajoqusiinissap annertuumik navianaateqarneranut pissutaasut taakkualu sunniutissaasa paasinarsisinneqarnissaat siunertaralugu, akisussaasuusooq nammineq akilikkaminik misissuinernik, misissueqqissaarnernik, akuutissanik imaluunniit atortussanik uuttortaanernik assigisaannilluunniit suliaqassasooq, Naalakkersuisut ilaatigut peqqusisinnaapput.

Imm. 2. Akisussaasuusup pigisamut aalaakkaasumut imaluunniit sumiiffimmut mingutsinneqarsimasutut paasineqartumut imaluunniit peqqusissuteqarneq malillugu ingerlatassat suliarineqarfissaannut atuisinnaatitaanginnera apeqqutaatinnagu, imm. 1 malillugu peqqusisinnaavoq. Peqqusissuteqarnermi pigisap aalaakkaasup mingutsinneqartup imaluunniit sumiiffiup mingutsinneqartup ilaalu ilanngullugit iluarseqqinneqarnissaanut pisussaaffeqarneq aalajangersarneqarsinnaavoq.

Imm. 3. Akisussaasuusooq pigisamut aalaakkaasumut imaluunniit sumiiffimmut atuisinnaatitaangippat, akisussaasuusup imaluunniit allat misissuinernik imaluunniit iluarseeqqinnernik ilaalu ilanngullugit suliaqarnerat akuereqqullugu Naalakkersuisut pigisamut aalaakkaasumut imaluunniit sumiiffimmut atuisinnaatitaasooq peqqusinnaavaat.

Imm. 4. Imm. 3 malillugu peqqusissuteqarneq pigisamut aalaakkaasumut imaluunniit sumiiffimmut imm. 1 malillugu peqqusissuteqarneq malillugu ingerlatassat suliarineqarfissaannut atuisinnaatitaasumut kimulluunniit pisussaaffiliivoq.

§ 98. Avatangiisini ajoqusiisoqarsimappat imaluunniit avatangiisini ajoqusiinissaq annertuumik navianaateqarpat, kapitalimi matumani maleruagassani pineqartunut ilaasumik, Naalakkersuisut kapitalimi matumani maleruagassat malillugit tamatumunnga immaqalu iliuusissaanik ilaalu ilanngullugit aalajangiissapput.

Imm. 2. Naalakkersuisut imm. 1 malillugu aalajangiineq Naalakkersuisut nittartagaanni imaluunniit allatut naleqquttumik tamanut saqqummiutissavaat. Avatangiisini ajoqusiisoqarsimasooq imaluunniit avatangiisini ajoqusiinissaq annertuumik navianaateqartoq imm. 1 malillugu aalajangiinerup tamanut saqqummiunneqarnera akisussaasuusup akiligassaanik pissaaq.

§ 99. Avatangiisinut akisussaaneq pillugu aalajangersakkanik atugassarititaasunillu erseqqinnerusunik Naalakkersuisut aalajangersaasinnaapput, ilanngullugu aalajangersakkat kapitalimi matumani taaneqartut atuutsinneqarnissaat pillugu.

Kapitali 15

Avatangiisinik nalilersuineq (VVM)

§ 100. Ingerlatassanik suliaqarnermi avatangiisinut sunniutaasussanik nalilersuineq (VVM) suliarineqareerpat, tamatumunngalu nassuiaat (VVM-mut nassuiaat) Naalakkersuisunit akuersissuteqarfigineqareerpat, ingerlatassat makkua arlaannut aatsaat akuersissuteqartoqarsinnaavoq, takuuk kapitali 12:

1) Aatsitassanik piianeq, najukkami aatsitassarsiorluni ingerlataqarneq ilaanani.

- 2) suliaassanut maleruagassiinermi ilaatinneqartoq ilaanani.
- 2) Sanaartukkanik anginerusunik ingerlatassani Inatsisartut inatsisaanni pineqartunut ilaasuni atorneqartussanik pilersitsineq, imaluunniit inissiineq atuinerlu, ilanngullugit aatsitassarsiorfinni suliaqarfiit, nunap iluani suliaqarfiit, nukissiorfiit taakkununga atasut aamma ruujorilersuinerit taakkununga atasut.
- 3) Ingerlatamik imaluunniit suliaqarfimmi ingerlatsinermik ilaalu ilanngullugit nr. 1-2-mi taaneqartumik unitsitsineq imaluunniit suliaqarfimmik ilaalu ilanngullugit nr. 2-mi taaneqartumik matusineq.

Imm. 2. Piianeq avatangiisinut annertuumik sunniuteqartussaangippat, pisinnaatitsissummik pigisaqartup imm. 1, nr. 1-imi piunasaqaatip atuutsinnginnissaa qinnutigisinnaavaa.

Imm. 3. Ingerlatassaq Inatsisartut inatsisaanni pineqartunut ilaasoq aammalu imm. 1-imi pineqartunut ilaanngitsoq, avatangiisinut annertuumik sunniuteqarsinnaassasoq ilimagineqartariaqarpat, avatangiisinut nalilersuineq suliarineqareerpat aammalu VVM-imut nassuiaat Naalackersuisunit akuersissuteqarfigineqareerpat, aatsaat ingerlatassamut akuersissuteqartoqarsinnaavoq.

Imm. 4. Pisuni imm. 2-mi aamma 3-mi taaneqartuni avatangiisinut sunniutaasussanik nalilersuisoqassanersoq aammalu VVM-imut nassuiaat suliarineqassanersoq, Naalackersuisut aalajangissavaat.

Imm. 5. Ingerlatassamut avatangiisinut sunniutaasussanik nalilersuineq suliarineqartussaangippat aammalu VVM-imut nassuiaat suliarineqartussaangippat, takuuk imm. 4, suliniutinik pitsaaliuisussanik nalilersuineq (VFT) tamatumunngalu nassuiaat (VFT-mut nassuiaat) suliarineqassasut Naalackersuisut aalajangersinnaapput.

Imm. 6. Ingerlatassamut imm. 4 naapertorlugu avatangiisinut sunniutaasussanik nalilersuisoqartussaangippat, imaluunniit imm. 5 naapertorlugu suliniutissanik pitsaaliuisussanik nalilersuisoqartussaangippat, ingerlatassaq avatangiisinut akuersissuteqarfigineqassasoq Naalackersuisut aalajangersinnaavaat.

Imm. 7. Tunngavissarititaasut imm. 3 malillugu aalajangiinermi atorneqartussat pillugit aalajangersakkanik erseqqinnerusunik Naalackersuisut aalajangersaasinnaapput. Naalackersuisut aammattaaq suliniutinik pitsaaliuisussanik nalilersuinissaq (VFT) tamatumunngalu tunngavissarititaasut pillugit aalajangersakkanik erseqqinnerusunik aalajangersaasinnaapput, takuuk imm 5. Naalackersuisut tamatuma saniatigut imm. 6 malillugu avatangiisinut akuersissuteqartarnek pillugu aalajangersakkanik erseqqinnerusunik aalajangersaasinnaapput.

§ 101. Pisinnaatitsissummik pigisaqartoq § 100 malillugu VVM-imik pisussaaffeqarfiusumik ingerlatassamik akuersissuteqarfigineqarnissamik qinnuteqartoq,

- 1) avatangiisinik nalilersuinerimik (VVM) suliaqassaaq,
- 2) VVM-imut nassuiaammik suliaqassaaq,
- 3) nr. 2 naapertorlugu VVM-imut nassuiaammik Naalackersuisunut tunniussissaaq
- 4) VVM-imut nassuiaatip tekniskiunngitsumik eqikkarneqarneranik suliaqassaaq aammalu eqikkaaneq Naalackersuisunut tunniutissallugu.

Imm. 2. VVM-imut nassuiaammi ingerlatassap avatangiisini pissutsinut toqqaannartumik aamma toqqaannangitsumik sunniutissai aammalu pissutsit imminnut ataqatigiinnerat, pissutsit imminnut sunneeqatigiinnissaat aammalu ataatsimoortumik sunniutissai (katersuuttut) naapertuuttumik uppersarsitissavai, nassuiassava nalilersussallugillu.

Imm. 3. Najooqutassanik annertunerusunik avatangiisinut sunniutaasussanik nalilersuinermut atugassanik pissarsisitsisoqassasoq, imaluunniit qinnuteqartoq pissutsinik erseqqinnerusumik aalajangerneqartunik, avatangiisinut sunniutaasussanik nalilersuinermut pingaaruteqartunik, annertunerusunik misissuissasoq imaluunniit nalilersuissasoq, Naalackersuisut aalajangersinnaavaat.

Imm. 4. Naalackersuisut avatangiisinut nalilersuinermik suliaqarneq, VVM-imut nassuiaammik suliaqarneq aamma Naalackersuisut VVM-imut nassuiaammik akuersissuteqartarnerat ilaalu ilanngullugit pillugit aalajangersakkanik erseqqinnerusunik atugassarititaasunillu aalajangersaasinnaapput, ilanngullugit misissuinerit nalilersuinerillu ingerlanneqartussat aammalu paasissutissat allakkiattu avatangiisinik nalilersuinermut atorineqartussat pissarsiarineqartussat, VVM-imut nassuiaatip imarisassai aammalu VVM-imut nassuiaatip tunniunneqarnerani Naalackersuisunut tunniunneqartussat pillugit.

§ 102. VVM-imut nassuiaatip inaarutaasup Naalackersuisunut tunniunneqarnera pillugu paasissutissat Naalackersuisut nittartagaanni imaluunniit allatut naleqquttumik tamanut ammasumik nalunaarutigineqassapput.

Imm. 2. VVM-imut nassuiaammut missingiut aamma paasissutissat, allakkiat tamatumunngalu atatillugu paasissutissat nalunaarsukkat Naalackersuisunut tunniunneqartut, isertuussaapput. Piffissami isertuussiviusumi ilaatinneqarpoq, Naalackersuisut nittartagaanni aammalu allatut naleqquttumik tamanut saqqummersinneqarnissaasa, pisinnaatitsissummik pigisaqartup VVM-imut nassuiaammik inaarutaasumik imm. 1 malillugu Naalackersuisunut tunniussinissaata, tungaannut piffissaq.

Imm. 3. Naalackersuisut piffissami isertuussiviusumi VVM-imut nassuiaammut missingiut isertuussaq aamma paasissutissat, allakkiat aamma tamatumunnga atatillugu paasissutissat nalunaarsukkat Naalackersuisunut tunniunneqartut isertuussat pillugit paasissutissat nalinginnaasut tamanut saqqummiussinnaavaat. Naalackersuisut paasissutissanik nalinginnaasunik taamaattunik tamanut saqqummiussinnginnermi paasissutissat pisinnaatitsissummik pigisaqartumut tusarniaassutigalugit nassiutissavaat aammalu pisinnaatitsissummik pigisaqartoq minnerpaamik qaammatsiutit malillugit ulluni 14-ini piffissamut killiliussap naleqquttup aalajangersagaasup iluani, tamatumunnga oqaaseqaateqarsinnaasoq immaqalu paasissutissat tamarmik imaluunniit ilaasa tamanut saqqummiunneqarnissaannut tungavilersukkamik akerliliissuteqarsinnaasoq pisinnaatitsissummik pigisaqartoq paasitissallugu. Pisinnaatitsissummik pigisaqartoq paasissutissat tamarmik imaluunniit ilaasa tamanut saqqummiunneqarnissaannut akerliliissuteqarluni piffissamut killiliussap iluani nassiussippat, aammalu pisinnaatitsissummik pigisaqartup isertuussinissamik soqutigisaqarnerata mianerinissaa, Naalackersuisut paasissutissanik pineqartunik tamanut saqqummiussinissamut

soqutigisaqarnerannit annertunerusorineqarpat, Naalakkersuisut paasissutissat taakkua tamanut saqqummiutissanngilaat.

Imm. 4. Imm. 2 aamma 3 apeqqutaatinnagit Naalakkersuisut pisuni tamaginni avatangiisinut paasissutissat aamma avatangiisinut nalunaarusiat nalinginnaasumik inuiaqatigiinni soqutiginaateqartut nalilerneqartut, tamanut ammasumik saqqummiussinnaavaat.

Imm. 5. Naalakkersuisut pissutsit imm. 1-4-mi taaneqartut pillugit aalajangersakkanik erseqqinnerusunik atugassarititaasunillu aalajangersaasinnaapput.

Kapitali 16

Inuiaqatigiinni piujuaannartitsisumik ingerlatsinermik naliliineq (VSB)

§ 103. Ingerlatassamut, Inatsisartut inatsisaat malillugu akuersissummi pineqartunut ilaasumut, aammalu inuiaqatigiinnut tunngasunut annertuumik sunniuteqarsinnaasussat ilimagineqartariaqartumut, ingerlatassanik suliaqarnermi inuiaqatigiinni piujuaannartitsisumik ingerlatsinermik naliliineq (VSB) suliarineqareerpat, tamatumunngalu nassuiaat (VSB-imut nassuiaat) pisinnaatitsissummik pigisaqartumit suliarineqareerpat aammalu Naalakkersuisunit akuerineqareerpat, aatsaat Naalakkersuisut akuersissuteqarsinnaapput.

Imm. 2. Pisinnaatitsissummik pigisaqartoq akuersissuteqarfigineqarnissamik qinnuteqartoq VSB-imik suliaqartussaalluni, VSB-imut nassuiaammik suliaqartussaalluni aammalu VSB-imut nassuiaammut Naalakkersuisut akuersissuteqarnerannik pissarsisussaalluni, pisoq aalajangersimasoq imm. 1-imi pineqartunut ilaanersoq, Naalakkersuisut aalajangissavaat.

Imm. 3. Naalakkersuisut tunngavissarititaasut aalajangiinnermi atorneqartut pillugit aalajangersakkanik imaluunniit atugassarititaasunik erseqqinnerusunik aalajangersaasinnaapput.

§ 104. Tamanna § 103 malillugu piumasaqaataappat, pisinnaatitsissummik pigisaqartoq ingerlatassamut akuersissuteqarfigineqarnissamik qinnuteqartoq:

- 1) inuiaqatigiinni piujuaannartitsisumik ingerlatsinermik naliliinermik (VSB-mik) suliaqassaaq,
- 2) VSB-imut nassuiaammik suliaqassaaq,
- 3) nr. 2 naapertorlugu VSB-imut nassuiaammik Naalakkersuisunut tunniussissaaq, aamma
- 4) VSB-imut nassuiaatip tekniskiunngitsumik eqikkarneqarneranik suliaqassaaq aammalu eqikkaaneq Naalakkersuisunut tunniutissallugu.

Imm. 2. VSB-imut nassuiaammi ingerlatassap inuiaqatigiinnut tunngasunut toqqaannartumik aamma toqqaannangitsumik sunniuteqarnissaa aammalu pissutsit imminnut ataqatigiinnerat, imminnut sunniivigeqatigiinnerat aammalu ataatsimut katillugu (ataatsimoortut) sunniuteqarnissaat, naleqquttumik paasinarsisinneqassapput, nassuiarneqassallutik nalilersorneqassallutillu, ilanngullugit innuttaasut inooqatigiinnermut, kulturimut, upperisamut anersaakkullu naleqartitaat ileqquila.

Imm. 3. VSB-mut atugassat paasissutissat imaluunniit allakkiat annertunerusut pissarsiarineqassasut, imaluunniit VSB-mut pisussaaffeqartoq pissutsinik erseqqinnerusumik aalajangerneqartunik, inuiaqatigiinni piujuaannartitsisumik ingerlatsinermik naliliinnermut

pingaaruteqartunik, annertunerusunik misissuinerinik imaluunniit nalilersuinerinik suliaqassasoq, Naalakkersuisut aalajangersinnaavaat.

Imm. 4. Naalakkersuisut VSB-mik suliaqartarnek, VSB-imut nassuiaammik suliaqartarnek aamma Naalakkersuisut VSB-imut nassuiaammut akuersissuteqartarnerat ilaalu ilanngullugit pillugit aalajangersakkanik aamma atugassarititaasunik erseqqinnerusunik aalajangersaasinnaapput, ilanngullugit misissuinerit nalilersuinerillu ingerlanneqartussat aammalu paasissutissat allakkiallu VSB-mut atugassatut pissarsiarineqartussat, VSB-imut nassuiaatip imarisassai aammalu VSB-imut nassuiaatip Naalakkersuisunut tunniunneqarnerani tunniunneqartussat pillugit.

§ 105. VSB-imut nassuiaatip inaarutaasup Naalakkersuisunut tunniunneqarnera pillugu paasissutissat Naalakkersuisut nittartagaanni aammalu allatut naleqquttumik tamanut nalunaarutigineqassaaq.

Imm. 2. VSB-imut nassuiaammut missingiut aamma paasissutissat, allakkiallup tamatumunngalu atatillugu paasissutissat nalunaarsukkat Naalakkersuisunut tunniunneqartut, isertuussaapput. Piffissami isertuussiviusumi ilaatinneqarput Naalakkersuisut nittartagaanni aammalu allatut naleqquttumik tamanut saqqummersinneqarnissaasa, pisinnaatitsissummik pigisaqartup VSB-imut nassuiaammik inaarutaasumik imm. 1 malillugu Naalakkersuisunut tunniussinissaata, tungaanut piffissaq.

Imm. 3. Naalakkersuisut piffissami isertuussiviusumi VSB-imut nassuiaammut missingiut isertuussaq aamma paasissutissat, allakkiallup aamma tamatumunnga atatillugu paasissutissat nalunaarsukkat Naalakkersuisunut tunniunneqartut isertuussat pillugit paasissutissat nalinginnaasut tamanut saqqummiussinnaavaat. Naalakkersuisut paasissutissanik nalinginnaasunik taamaattunik tamanut saqqummiussinnginnermi paasissutissat pisinnaatitsissummik pigisaqartumut tusarniaassutigalugit nassutissavaat aammalu pisinnaatitsissummik pigisaqartoq minnerpaamik qaammatisiutit malillugit ulluni 14-ini piffissamat killiliussap naleqquttup aalajangersagaasup iluani, tamatumunnga oqaaseqaateqarsinnaasoq immaqalu paasissutissat tamarmik imaluunniit ilaasa tamanut saqqummiunneqarnissaannut tunngavilersukkamik akerliliissuteqarsinnaasoq pisinnaatitsissummik pigisaqartoq paasitissallugu. Pisinnaatitsissummik pigisaqartoq paasissutissat tamarmik imaluunniit ilaasa tamanut saqqummiunneqarnissaannut akerliliissuteqarluni piffissamat killiliussap iluani nassiussippat, aammalu pisinnaatitsissummik pigisaqartup isertuussinissamik soqutigisaqarnerata mianerinissaa, Naalakkersuisut paasissutissanik pineqartunik tamanut saqqummiussinissamat soqutigisaqarnerannit annertunerusorineqarpat, Naalakkersuisut paasissutissat taakkua tamanut saqqummiutissanngilaat.

Imm. 4. Naalakkersuisut pissutsit imm. 1-3-mi taaneqartut pillugit aalajangersakkanik aamma atugassarititaasunik erseqqinnerusunik aalajangersaasinnaapput.

Kapitali 17

Piareersaataasumik tusarniaaneq aamma tusarniaaneq

§ 106. Inatsisartut inatsisaat malillugu ingerlatassaq Naalakkersuisut naliliinerat malillugu avatangiisinut annertuumik sunniuteqarsinnaasussaappat, takuuk § 100, imaluunniit inuiaqatigiinni pissutsinut annertuumik sunniuteqarsinnaasussaappat, takuuk § 103, qinnuteqartoq imaluunniit pisinnaatitsissummik pigisaqartoq suliassamut nassuiaammik, Naalakkersuisunut nassiunneqartussamik, suliaqassaaq.

Imm. 2. Avatangiisinut sunniutaasussanik nalilersuinerup (VVM) imaluunniit inuiaqatigiinni piujuaannartitsisumik ingerlatsinermik naliliinerup (VSB) imarisassaasa aalajangersarneqannginneranni, suliassamut nassuiaat qaammatisiutit malillugit ulluni 35-ni tamanut ammasumik piareersaataasumik tusarniaassutigalugu nassiunneqassaaq. Avatangiisinut sunniutaasussanik nalilersuinissaq (VVM-imut nassuiaat) pillugu suliassamut nassuiaat aamma inuiaqatigiinni piujuaannartitsisumik ingerlatsinermik naliliinissaq (VSB) pillugu suliassamut nassuiaat tamanut ammasumik piareersaataasumik tusarniaassutigineqartussaasimappata, piareersaataasumik tusarniaanerit ataatsimoortillugit ingerlanneqassapput.

Imm. 3. Naalakkersuisut suliassamut nassuiaatip imarisassai pillugit aalajangersakkanik erseqqinnerusunik aalajangersaasinnaapput.

§ 107. Naalakkersuisut avatangiisinut sunniutaasussanik nalilersuineq pillugu nassuiaat (VVM) aamma inuiaqatigiinni piujuaannartitsisumik ingerlatsinermik naliliineq pillugu nassuiaat (VSB) tamanut ammasumik tusarniaassutigalugit nassitutissavai. Avatangiisinut sunniutaasussanik nalilersuineq pillugu nassuiaat (VVM-imut nassuiaat) aammalu inuiaqatigiinni piujuaannartitsisumik ingerlatsinermik naliliineq pillugu nassuiaat (VSB-imut nassuiaat) tamanut ammasumik tusarniaassutigineqartussaasimappata, tusarniaanerit ataatsimoortillugit ingerlanneqassapput.

Imm. 2. Piffissaq tusarniaaffiusoq sapaatip akunnerini 8-ni pissaaq. Piffissaq tusarniaaffiusoq ulloq Naalakkersuisut tusarniaanermut najoqutassat tamanut ammasumik pissarsiarineqarsinnaasunngortinnerat aallarnerfigalugu, aallartissaaq. Piffissaq tusarniaaffiusoq arfininngornermi, sapaammi imaluunniit ullumi nalliuttumi naappat, piffissaq tusarniaaffiusoq ulluinarmut tullermut sivitsorneqassaaq.

Imm. 3. Tamanut ammasumik tusarniaalluni ataatsimiititsineq naapertuuttumik ingerlanneqarsinnaasimangippat, imaluunniit Naalakkersuisut ataatsimiinnerni peqataasinnaanngippata, piffissaq tusarniaaffiusoq sivitsorneqassaaq.

§ 108. Naalakkersuisut piffissap tusarniaaffiusup ingerlanerani, takuuk § 107, akuersissut malillugu pisinnaatitsissummik pigisaqartoq suleqatigalugu, illoqarfinni nunaqarfinnilu suliassaq pillugu ingerlatassatut pilersaarutigineqartunit immikkut kallarneqartussani, tamanut ammasumik tusarniaalluni ataatsimiititsinernik ingerlatsissapput. Ingerlatassat nunami sumiiffinni illoqarfinnit nunaqarfinniillu ungasissumi imaluunniit kommunit aggornerisa avataanni ingerlanneqartussaappata, illoqarfinni nunaqarfinnilu sorlarni tamanut ammasumik tusarniaalluni ataatsimiititsinerit ingerlanneqassanersut, Naalakkersuisut aalajangiissapput.

§ 109. Tamanut ammasumik tusarniaalluni ataatsimiititsinerit, takuuk § 108, ingerlanneqarnissaat qaammatisiutit malillugit minnerpaamik ullunik 14-inik sioqqullugit Naalackersuisut tusarniaalluni ataatsimiititsinissamut aggersaassapput.

Imm. 2. Tamanut ammasumik tusarniaalluni ataatsimiititsinernut aggersaaneq najukkani aviisini aamma pisortat namminersortullu tusagassiuutaanni naleqquttuni allagarsiissutigineqassaaq.

Imm. 3. Tusarniaalluni ataatsimiititsinermut imaqarniliamik Naalackersuisut suliaqassapput. Naalackersuisut tamatuma kingorna imaqarniliaq tamanut saqqummersissavaat.

Imm. 4. Ataatsimiinnermi peqataasut apeqquteqarnissaannut, oqaaseqaateqarnissaannut, suliassamik oqaluuserinninnissaannut aammalu suliassaq pillugu nalunaarutini atuaanissamut tusarniaalluni ataatsimiititsinermi piffissaliisoqarnissaa aammalu periarfissiisoqarnissaa, Naalackersuisut qulakkiissavaat.

Imm. 5. Naalackersuisut tusarniaalluni ataatsimiititsinermut ataatsimiinnermi aqutsisussamik toqqaassapput.

Kapitali 18

Inuiaqatigiinni piujuaannartitsisumik ingerlatsinissaq pillugu isumaqatigiissut

§ 110. Pisinnaatitsissummik pigisaqartoq ingerlatassamut Inatsisartut inatsisaanni pineqartunut ilaasumut, aammalu inuiaqatigiinni pissutsinut annertuumik sunnuteqarsinnaasussatut naatsorsuutigineqartariaqartumut akuersissuteqarnissamik qinnuteqartoq, inuiaqatigiinni piujuaannartitsisumik ingerlatsinissaq pillugu isumaqatigiissummik aamma inuiaqatigiit aningaasaqarnerannut tunngasunut allanut isumaqatigiissuteqassasoq aammalu taanna naammassissagaa pillugu aalajangersakkanik aamma atugassarititaasunik Naalackersuisut aalajangersaasinnaapput.

Imm. 2. Isumaqatigiissut imm. 1-imi taaneqartoq Naalackersuisut aamma pisinnaatitsissummik pigisaqartup akornanni isumaqatigiissutigineqassaaq.

Imm. 3. Akuersissummi sumiiffik akuersissuteqarfiusoq kommunip sumiiffianiippat, isumaqatigiissut aamma kommunimut isumaqatigiissutigineqassaaq.

Imm. 4. Akuersissummi sumiiffik akuersissuteqarfiusoq kommunip sumiiffianiinngippat, Naalackersuisut tamatumunnga aalajangersakkanik imaluunniit atugassarititaasunik aalajangersaappata imaluunniit tamatuminnga aalajangiippata, isumaqatigiissut aamma kommuninut qanitaaniittunut ataatsimut arlalinnulluunniit isumaqatigiissutigineqassaaq.

Imm. 5. Taamaattoq isumaqatigiissutip isumaqatiginninniutigineqarnera, isumaqatigiissutigineqarnera imaluunniit imarisai pillugit kommunip piumasagaatai Naalackersuisut naliliinerat malillugu § 111-imut imaluunniit aalajangersakkanut imaluunniit atugassarititaasunut § 112 malillugu Naalackersuisunit aalajangersarneqartunut naapertuutinnigippata, isumaqatigiissut kommunimut isumaqatigiissutigineqassanngitsoq pillugu Naalackersuisut aalajangiisinnaapput.

§ 111. § 110 malillugu isumaqatigiissut Inatsisartut inatsisaanni § 1 malillugu siunertamut aamma aalajangersakkanut allanut isumaqatigiissutip siunertaanut aamma § 110 malillugu

siunertamut sammisanullu aamma aalajangersakkanut atugassarititaasunullu § 112 malillugu aalajangersagaasunut, naapertuuttumik isumaqatiginninniutigineqassaaq, isumaqatigiissutigineqassalluni aammalu imaqaassalluni.

Imm. 2. § 110 malillugu isumaqatigiissut ilaatigut pisinnaatitsissummik pigisaqartup nunaqavissunik sulisoqarnissaa pilersuisoqarnissaalu pillugit aamma sulisussat nunaqavissut ilinniartitaanerat ilinniaqqinnissaallu pillugu atugassarititaasunik imaqaassaaq.

Imm. 3. Atugassarititaasut isumaqatigiissummi aalajangersagaasut naammassineqarsimanersut Naalakkersuisut aamma pisinnaatitsissummik pigisaqartup akornanni aaqqiagiinngissuteqarneq eqqartuussivimmuut isumaqatigiissitsiniartartumut suliakkiunneqassasoq, § 110 malillugu isumaqatigiissummi aalajangersarneqarsinnaavoq. Tamatumunnga atugassarititaasut nalinginnaasumik akuersissummi tamatumunnga atugassarititaasunut naapertuutissapput. Taamaattoq isumaqatigiissut aamma kommunimut ataatsimut imaluunniit arlalinnut isumaqatigiissutigineqarsimappat, akuersissummit atugassarititaasut isumaqatigiissummi allanngortinneqassapput, taamaalillutik taakkua kommunip imaluunniit kommunit aamma isumaqatigiissummi peqataanerannut, taamaalillutillu aamma isumaqatigiissut pillugu aaqqiagiinngissuteqarnermi peqataanerannut, tunngasunut naleqqussarneqassallutik.

§ 112. Inatsisartut inatsisaanni § 1 malillugu siunertamut aamma aalajangersakkanut allanut naapertuuttumik, § 110 malillugu isumaqatigiissut pillugu pissutsit attuumassuteqartut tamaasa pillugit akuersissummut aalajangersakkanik aamma atugassarititaasunik erseqqinnerusunik Naalakkersuisut aalajangersaasinnaapput.

Kapitali 19

Sinerissap avataani suliaqarfinnut isumannaallisaaneq aamma peqqinnissaaq

§ 113. Sinerissap avataani suliaqarfinnut, ingerlatanik Inatsisartut inatsisaat malillugu akuersissummi pineqartunut ilaasunik suliaqarnermi atorineqartunut atatillugu isumannaallisaanermut peqqinnissamullu aarlerinaataasut paasineqarnissaat, nalilersorneqarnissaat annikillisinneqarnissaallu, suliaqarnermi naleqquttumik ajornartinnagu, pisinnaatitsissummik pigisaqartup qulakkiissavaa.

Imm. 2. Sinerissap avataani suliaqarfiit ingerlanneqarnerisa Inatsisartut inatsisaannut, inatsisinut allanut, aalajangersakkanut Inatsisartut inatsisaat aamma inatsisit allat malillugit aalajangersagaasunut aamma aalajangersakkanut aamma atugassarititaasunut akuersissummi aalajangersagaasunut naapertuuttumik ingerlanneqarnissaat, taakkualu nakkutilliiviginissaat, pisinnaatitsissummik pigisaqartup qulakkiissavaa.

Imm. 3. Pisinnaatitsissummik pigisaqartup qulakkiissavaa:

1) suliffeqarfiup pisinnaatitsissummik pigisaqartoq sinnerlugu sinerissap avataani suliaqarfiit pillugit akuersissut malillugu ingerlatassanik suliaqartup imaluunniit nakkutiginnittup aammalu suliaqarnermik aqutsisup, isumannaallisaanikkut peqqinnissakkullu pisussaaffiit, taassuma pisussaaffigisaasa, naammassinissaannut periarfissaqarnera,

- 2) isumannaallisaanermut peqqinnissamullu aarlerinaataasut, suliaqarnermi naleqquttumik ajornartinnagu, paasineqarnissaat, nalilersorneqarnissaat annikillisinneqarnissaallu suliffeqarfiup pineqartup qulakkiissagai nakkutigissagaalu, aamma
- 3) akuersissut malillugu ingerlatassat Inatsisartut inatsisaannut, inatsisinut allanut, aalajangersakkanut Inatsisartut inatsisaat aamma inatsisit allat malillugit aalajangersagaasunut aamma aalajangersakkanut aamma atugassarititaasunut akuersissummi aalajangersagaasunut naapertuuttumik ingerlanneqarnissaat.

§ 114. Naalackersuisut sinerissap avataani suliaqarfinnut, ingerlatanik Inatsisartut inatsisaat malillugu akuersissummi pineqartunut ilaasunik suliaqarnermi Inatsisartut inatsisaanni § 1 malillugu siunertamut aamma aalajangersakkanut allanut naapertuuttumik atorpeqartunut atatillugu isumannaallisaaneq peqqinnissarlu pillugit aalajangersakkanik aamma atugassarititaasunik aalajangersaasinnaapput.

Kapitali 20

Sinerissap avataani suliaqarfinni isumannaallisaanermut killeqarfiit

§ 115. Sinerissap avataani suliaqarfiit, suliaqarfik tissiarluni imaluunniit kalitsilluni ingerlaanggipat, isumannaallisaanermut killeqarfinnik ungalusaavoq.

Imm. 2. Sinerissap avataani suliaqarfik, isumannaallisaanermut killeqarfimmik ungalusaasoq, ingerlaannaq immap qaavani ersittanggipat, puttaqummik nalunaaqutsersimassaaq imaluunniit allamik takulertoruminartumik, Naalackersuisunit akuerisaasumik, nalunaaqutserneqarsimassalluni.

Imm. 3. Isumannaallisaanermut killeqarfik sinerissap avataani suliaqarfiup eqqaani, taassuma sinaanit avallermit sorlermilluunniit imaluunniit nalunaaqutsersuutitut atorpeqartumit allamiit uuttorlugu 500 meterinik isorartussuseqarpoq. Napparissuni (napparissut) immap naqqaniit suliaqarfiup portunerpaaffia 500 meterinik qaangerlugu isumannaallisaanermut killeqarfik isorartussuseqarpoq. Makittarissuni (makittarissut) isumannaallisaanermut killeqarfik sinerissap avataani suliaqarfiup sinaaniit silarlermit, taassuma sukkulluunniit sumiiffianit sorlermilluunniit, 500 meterinik isorartussuseqarpoq.

Imm. 4. Sinerissap avataani suliaqarfiup, isumannaallisaanermut killeqarfimmit ungalusimasup, sumiiffia, Imarsiortunut Nalunaarutini tamanut saqqummiunneqassaaq. Imarsiortunut Nalunaarutini tamanut saqqummersitsineq, Naalackersuisut allamik aalajangiisimangippata, pisinnaatitsissummik pigisaqartumit ingerlanneqassaaq.

§ 116. Isumannaallisaanermut killeqarfiup isorartussusissaa § 115, imm. 3-mi aalajangerneqartup saneqqunneqarnissaa pillugu Naalackersuisut aalajangiisinnaapput. Saneqqutsinermi isumannaallisaanermut killeqarfik annertusitinneqarsinnaavoq imaluunniit annikillisinneqarsinnaalluni aammalu piffissamut aalajangersimasumut aalajangersarneqarsinnaalluni. Saneqqutsineq Imarsiortunut Nalunaarutini imaluunniit allatut Naalackersuisunit aalajangerneqartumik tamanut saqqummersinneqassaaq. Imarsiortunut Nalunaarutini imaluunniit allatut Naalackersuisunit aalajangerneqartumi tamanut

saqqummersitsineq, Naalakkersuisut allamik aalajangiisimangippata, pisinnaatitsissummik pigisaqartumit ingerlanneqassaaq.

Imm. 2. Inunnik ajoqusiinermik, inuit inuunerannik annaasaqarnermik, annertuumik mingutsitsinermik, atortunik annertuumik ajoqusiinermik imaluunniit sinerissap avataani suliaqarfimmi ingerlatanik annertuumik akornusiinermik malitseqarsinnaasumik, navianartorsiornartumik pisoqartillugu imaluunniit ajutoortoqarluni pisoqartillugu, tamanna ajoqusiilluni sunniinerit taaneqartut taakkua pitsaaliornissaannut, pinngitsoortinnissaannut imaluunniit killilersimaarnissaannut pisariaqartutut isigineqarpat, Naalakkersuisut isumannaallisaanermut killeqarfik pioreersoq annertusitissinnaavaat imaluunniit isumannaallisaanermut killeqarfimmik nutaamik pilersitsisinnaallutik. Isumannaallisaanermut killeqarfiup pioreersup annertusitinneqarnera imaluunniit isumannaallisaanermut killeqarfimmik nutaamik pilersitsineq, Imarsiortunut Nalunaarutini tamanut saqqummersinneqassaaq. Imarsiortunut Nalunaarutini tamanut saqqummersitsineq, Naalakkersuisut allamik aalajangiisimangippata, pisinnaatitsissummik pigisaqartumit ingerlanneqassaaq.

§ 117. Umiarsuit, prammit, imaatigut angallatit allat, timmisartut, qulimiguullit, dronit aamma silaannakkut angallatit allat, sinerissap avataani suliaqarfiit angallattakkat aamma sanaartukkat aaqqissuussinerillu angallattakkat allat, aalisarnermut atortut, kisat, pituttormut atortut allat, atortut allat aamma pigisat allat, taakkua inatsisit malillugit tamatumunnga siunertaqangippata, sinerissap avataani suliaqarfiup eqqaani isumannaallisaanermut killeqarfimmut eqquteqqusaanngillat imaluunniit tassaneeqqusaanatik.

Imm. 2. Naalakkersuisut pisuni immikkut ittuni imm. 1-imi inerteqquteqarnermi ilaatitsinnginnissaq, ilanngullugu aalisarnerq piniarnerlu eqqarsaatigalugit, pillugu aalajangiisinnaapput aammalu tamatumunnga aalajangersakkanik aamma atugassarititaasunik ersarinnerusunik aalajangersaasinnaallutik.

Kapitali 21

Aalajangersakkat nalinginnaasut

Ingerlatassanik suliarinninnermut piunasaqaatit

§ 118. Ingerlatassat Inatsisartut inatsisaat malillugu akuersissummi pineqartunut ilaatinneqartut, pissutsit taamaaqatai atuutsillugit sumiiffimmi nunani tamalaani suleriaatsinut akuerisaasunut pitsaasunut naapertuuttumik suliarineqassapput.

Imm. 2. Ingerlatassat naapertuuttumik aammalu isumannaallisaanermut, peqqinnissamut, isumalluutinik atuinnermut aamma inuiaqatigiinni piujuartitsinissamut tunngatillugu isumannaatsumik suliarineqassapput, ilanngullugu innuttaasut inooqatigiinnermut, kulturimut, upperisamut anersaakkullu naleqartitaat ileqquilu qajassuullugit.

Nunani tamalaani isumaqatigiissuteqarnerq taakkuningalu atuineq

§ 119. Nunani tamalaani isumaqatigiissutit imaluunniit pissutsit Inatsisartut inatsisaanni ilaasut pillugit maleruagassat Kalaallit Nunaanni piviusunngortinneqarnissaat imaluunniit atuutsinnissaat siunertarlugu, Naalakkersuisut aalajangersakkanik aamma atugassarititaasunik aalajangersaasinnaapput.

Naalakkersuisut ingerlatassanik akuersissuteqartarnerat

§ 120. Ingerlatassat Inatsisartut inatsisaat malillugu akuersissummi pineqartunut ilaasut, ilanngullugit sumiiffimmi akuersissummi ilaatinneqartumi avataanilu illunik, sanaartukkanik ikkussuinernillu ilaalu ilanngullugit pilersitsineq aamma akuersissut malillugu suliaqarnerup ingerlatallu unitsinneqarneranni pisussaaffiit naammassinissaannut iliuusissat ingerlatassallu, aallartinneqannginneranni, atugassarititaasunut akuersissummi aalajangersagaasunut naapertuuttumik Naalakkersuisunit akuersissuteqarfigineqassapput. Taamaattoq Naalakkersuisut akuersissut malillugu ingerlatassat aalajangersimasut akuerineqassanngitsut pillugu aalajangersakkanik aamma atugassarititaasunik aalajangersaasinnaapput.

Imm. 2. Piiaanermik suliaqarnerup unitsikkallarnerqarneranut atatillugu iliuusissat, atugassarititaasunut akuersissummi aalajangersagaasunut naapertuuttumik, aallartinneqannginneranni Naalakkersuisunit akuersissuteqarfigineqassapput.

Imm. 3. Ingerlatassat annertunerusut imaluunniit pingaaruteqartut, akuersissut malillugu ingerlatassanik suliaqarnermut atatillugu suliarineqartut, ilanngullugit qillerinerit, sullut isaariaannik appartitsineq aamma qarusuliernerit ilaalu ilanngullugit, pisuni ataasiakkaani tamaginni aallartinneqannginneranni Naalakkersuisunit akuerineqartassapput.

§ 121. Naalakkersuisut akuersissuteqarnermut, ingerlatassanut imaluunniit ingerlatassanut pilersaarummut aamma ingerlatassanut pilersaarut malillugu ingerlatassanut tunngasut attuumassuteqartut tamaasa pillugit, Inatsisartut inatsisaanni § 1 malillugu siunertanut aamma aalajangersakkanut allanut naapertuuttumik ingerlatassanut akuersissuteqarnermut imaluunniit ingerlatassanut pilersaarummut aalajangersakkanik aamma atugassarititaasunik, aalajangersaasinnaapput.

Nakkutilliineq, peqqusissuteqartarnej aamma paasisutissiisussaataaneq

§ 122. Pisinnaatitsissummik pigisaqartup aamma allat suliaqarnerannut aamma ingerlatassanut Inatsisartut inatsisaanni pineqartunut ilaasunut Naalakkersuisut nakkutilliissapput, ilanngullugit aalajangersakkat aamma atugassarititaasut Inatsisartut inatsisaat malillugu aalajangersagaasut. Nakkutilliinermut oqartussap sulisui, tamanna nakkutilliilluni suliaqarnerup ingerlatassanut pisariaqarpat, sukkulluunniit eqqartuussivimmi aalajangiinertaqanngitsumik, sukumiisumik kinaassutsimut uppersaammik takutitsillutik suliffeqarfiit aamma ingerlatassat Inatsisartut inatsisaanni pineqartunut ilaasut immikkoortuinut tamaginnut isersinnaatitaapput.

§ 123. Naalackersuisut Inatsisartut inatsisaata aamma aalajangersakkat aamma akuersissummut atugassarititaasut Inatsisartut inatsisaat malillugu aalajangersagaasut malinneqarnerisa qulakkeernissaa siunertaralugu peqqusissuteqarsinnaapput inerteqquteqarsinnaallutillu. Peqqusissuteqarneq aamma inerteqquteqarneq pisinnaatitsissummik pigisaqartumut imaluunniit allanut Inatsisartut inatsisaanni pineqartunut ilaasunut nalunaarutigineqarsinnaavoq.

§ 124. Pisinnaatitsissummik pigisaqartut aamma suleqataasut allat Inatsisartut inatsisaanni pineqartunut ilaasut paasissutissanik tamaginnik, suliaqarnerminnut imaluunniit ingerlatassanut Inatsisartut inatsisaanni pineqartunut ilaasunut oqartussat suliarinninnerannut pisariaqartunik, nalunaarutiginnissapput. Naalackersuisut oqartussat suliarinninnerisa Inatsisartut inatsisaanni pineqartunut ilaasup ingerlannissaanut pisinnaatitsissummik pigisaqartut aamma allat paasissutissanik Naalackersuisut pisariaqartitaattut iliorlutik aammalu iluseqartitsillutik tunniussissasut, peqqusisinnaapput.

Suliassanik suliarinninnernik unitsitsisarneq

§ 125. Pisinnaatitsissummik pigisaqartoq Inatsisartut inatsisaanni pineqartunut ilaasoq Naalackersuisut suliassanik suliarinninnermut aamma Inatsisartut inatsisaat malillugu oqartussat suliarinninnerannut allanut aningaasartuutaannut matussutissanik, takuuk tamatumunnga § 31, imm. 3, 38, imm. 4, aamma § 51, imm. 5, 100.000 koruuninik imaluunniit amerlanerusunik aningaasartalinnik akilerneqartussanik akiliisimangippat, pisinnaatitsissummik pigisaqartup Naalackersuisunut aningaasat akilerneqanngitsut suulluunniit akilernissaasa tungaanut, pisinnaatitsissummik pigisaqartoq pillugit suliassap suulluunniit suliarineqarnera aalajangiiffigineqarnissaalu Naalackersuisut unitsissinnaavaat. Taamatut pisoqartillugu, pisinnaatitsissummik pigisaqartup Naalackersuisunut aningaasat akilerneqanngitsut suulluunniit akilernissaasa tungaanut, pisinnaatitsissummik pigisaqartumut Inatsisartut inatsisaanni pineqartunut ilaasumut, akuersissut malillugu ingerlatani unitseqqullugit aamma Naalackersuisut peqqusisinnaapput. Naalackersuisut tamatumunnga aalajangersakkanik erseqqinnerusunik atugassarititaasunillu aalajangersaasinnaapput.

Inatsisit allat malillugit akuersissutit aamma akuersissuteqarnerit

§ 126. Inatsisartut inatsisaat naapertorlugu oqartussat suliarinninneranni, ilanngullugit akuersissutit aamma akuersissuteqarnerit, pisinnaatitsissummik pigisaqartut aamma suleqataasut allat Inatsisartut inatsisaanni pineqartunut ilaasut, inatsisit allat malillugit pisariaqartunik akuersissuteqarnernik imaluunniit akuersissutitik piniarnissamut, pisussaaffeerutsinneqanngillat, taamaattoq takuuk imm. 2.

Imm. 2. Taamaattoq Inatsisartut inatsisaat malillugu akuersissummi sumiiffimmi akuersissuteqarfiusumi avataanilu illutanut sanaartukkanullu nunaminertamik atugassiiinissaq pillugu piunarsaatit naammassinninnissamut pisussaatinneqanngilaq.

Pigisanik nalilinnik pinngitsaaliissummik taarsiissutitalimmik piginnikkunnaarsitsisarneq

§ 127. Inatsisartut inatsisaat malillugu ingerlatassanik suliarinnissinnaanissamut pigisanik nalilinnik pinngitsaaliissummik taarsiissutitalimmik piginnikkunnaarsitsineq ingerlanneqassasoq, Naalakkersuisut pisariaqartillugu akuerisinnaavaat.

Imm. 2. Imm. 1 malillugu pinngitsaaliissummik taarsiissutitalimmik piginnikkunnaarsitsineq pinngitsaaliissummik taarsiissutitalimmik piginnikkunnaarsitsisarneq pillugu Inatsisartut inatsisaanni maleruagassat malillugit ingerlanneqassaaq.

*Sumiiffinnik aalajangersimasunik eqqissisimatitsineq
aammalu killeqarfinnik atuutsitsilerneq*

§ 128. Nunap sannaanut tunngasut taakkualu piujuartinnissaasa mianerinissaannik isumaginninnissamut sumiiffik ataaseq arlallilluunniit aalajangersimasut eqqissisimatinneqarnissaat pillugu aalajangersakkanik Naalakkersuisut aalajangersaasinnaapput. Ingerlatassaq ataaseq arlallilluunniit suliareqqusaasoq pillugu aalajangersakkanik imaluunniit atugassarititaasunik Naalakkersuisut aalajangersaasimangippata, sumiiffimmi nunap sannaatigut eqqissisimatitami ingerlatassanik sunilluunniit suliaqartoqaqqusaanngilaq.

Imm. 2. Nalinginnaasumik soqutigisanik mianerinninnissaq isumaginarlugu sumiiffimmik ataatsimik arlalinnilluunniit Inatsisartut inatsisaat malillugu ingerlatassanik inerteqquteqarnissaq imaluunniit killilersuinissaq pillugu aalajangersakkanik Naalakkersuisut aalajangersaasinnaapput.

Pisortani oqartussat allat oqartussat suliassaannik isumaginninnerat

§ 129. Inatsisartut inatsisaat malillugu oqartussat suliassai pisortani oqartussanit allanit imaluunniit namminersortunit suleqatigisanit erseqqinnerusumik aalajangerneqartumik annertussusilimmik isumagineqassasut pillugu aalajangersakkanik Naalakkersuisut aalajangersaasinnaapput.

Imm. 2. Piginnaatitsissummi allatut aalajangertoqarsimangippat, pisortani oqartussat imaluunniit namminersortut suleqatigisat piginnaatinneqartut, taakkualu sulisui, Naalakkersuisut aamma Naalakkersuisut sulisuisa suliassanik pineqartunik isumaginninnermi piginnaatitaaffigisassaasa assinginik piginnaatitaaffeqassapput.

*Innuttaasunut, najukkami inuiaqatigiinnut aamma kattuffinnut attuumassuteqartunut
misissuinernut aamma siunnersuinernut ilaalu ilanngullugit aningaasassanik
ataatsimoortunik pilersitsineq*

§ 130. Naalakkersuisut aningaasassanik ataatsimoortunik pilersitsissapput, tassunga innuttaasut, najukkami inuiaqatigiit aamma Kalaallit Nunaanni kattuffiit attuumassuteqartut kallarneqartut, Kalaallit Nunaanni aatsitassanut suliassanut aalajangersimasunut

attuumassuteqartunik ajornartorsiutinik immikkuullarissunik qulaajaanissamut misissuinernik aallartitsinissamut aammalu siunnersortissarsiornermut aammalu suliassap inuiaqatigiinni sunniinissaa pillugu ataatsimiinnernik ingerlatsinissamut, aningaasassanik qinnuteqarsinnaassallutik.

Imm. 2. Qinnuteqaatip, suliakkiissutinut najoqqutassap imaluunniit suliassamut nassuiaatip piareersaataasumik tusarniaassutigalugu imaluunniit tusarniaassutigalugu nassiunneqareernerata kingorna, takuuk §§ 35, 44 aamma 107, aningaasassanik qinnuteqarneq aatsaat pisinnaavoq.

Imm. 3. Naalackersuisut imm. 1 malillugu aningasassat ataatsimoortut pillugit aalajangersakkanik erseqqinnerusunik aalajangersaasinnaapput.

Kapitali 22

Taarsiinissamut akisussaasuuneq aamma sillimmasiinerit

§ 131. Ajoqusiinerit suliaqarnerni imaluunniit ingerlatassanit akuersissummi pineqartunut ilaasunit ajoquserneqartut, aamma ajoqusiinerit pisinnaagaluartut, akuersissut malillugu pisinnaatitsissummik pigisaqartup taarsiivigissavai.

Imm. 2. Ajoquserneqartoq piaaraluni imaluunniit mianersuaalliorujussuarluni ajoqusiinermi peqataasimappat, imm. 1 malillugu taarsiissutissaq annikillisinneqarsinnaavoq imaluunniit atorunnaarsinnaalluni.

§ 132. Pisinnaatitsissummik pigisaqartup taarsiinissamut akisussaasuunera sillimmasiissummi imaluunniit allatut ilusilimmik qularnaveeqqusiinermi pineqartunut ilaatinneqassasoq, aamma pisinnaatitsissummik pigisaqartup ingerlatassai aamma pissutsit tamatumunnga atasut sillimmasiinerit attuumassuteqartuni allani pineqartunut ilaatinneqassasut, pillugu akuersissummi aalajangersakkanik aamma atugassarititaasunik Naalackersuisut aalajangersaasinnaapput.

§ 133. Isumaqatigiissuteqarfigineqartut sullissineri aamma ingerlatai akuersissut malillugu ingerlatassanik suliarinninnermi atorneqarsimappata, pisinnaatitsissummik pigisaqartup isumaqatigiissuteqarfigisaasa taarsiinissamut akisussaasuunerat sillimmasiissummi imaluunniit allatut ilusilimmik qularnaveeqqusiinermi pineqartunut ilaatinneqassasut, pillugu akuersissummi aalajangersakkanik aamma atugassarititaasunik Naalackersuisut aalajangersaasinnaapput.

Avatangiisini ajoqusiinernut taarsiisarneq

§ 134. Ingerlatassanut Inatsisartut inatsisaanni pineqartunut ilaatillugu ajoqusiinernut nunamik, imaani, immap naqqanik, nunap iluanik, imermik imaluunniit silaannarmik mingutsitsinermeersunut, avatangiisinut ajoqusiinernut taarsiisarneq pillugu Inatsisartut inatsisaanni maleruagassat atuupput.

Imm. 2. Avatangiisinut ajoqusiinernut taarsiisarneq pillugu Inatsisartut inatsisaanni

maleruagassat, taamaaqataanik mingutsitsinernut aammalu silap pissusaanut tunngasunut imaluunniit pinngortitamut allatut pitsaangitsumik sunniinernut aamma nipiliornernit, sajuppillatsitsinernit, qaammaqqutinit assigisaanniillu akornusersuinernut, atuupput.

§ 135. § 134-mi aamma §§ 136-139-mi maleruagassat malillugit ajoqusiinerit makkua taarsiivigineqassapput:

- 1) Inummut ajoqusiineq aamma pilersuisumik annaasaqarneq.
- 2) Pigisanut ajoqusiineq.
- 3) Allatut pisuussutininik annaasaqarneq.
- 4) Aningaasartuutit naapertuuttut:
 - a) pitsaaliuinerimut ajoqusiinissamillu pitsaaliuinerimut iliuusissanut,
 - b) avatangiisinik pinngortitamillu iluarseeqqinnerimut aamma
 - c) mingutsitsinerup allatullu avatangiisinut, silap pissusaanut tunngasunut pinngortitamullu pitsaangitsumik sunniinerit pitsaaliornissaannut ajoqusiinnaarsinnissaannullu.

§ 136. § 95, malillugu avatangiisini ajoqusiinerimut akisussaasuusoq, aammalu ingerlatassamut Inatsisartut inatsisaanni pineqartunut ilaasumut atatillugu mingutsitsisimasoq, ajoqusiineq pisinnaagaluarpalluunniit, ajoqusiinerimut mingutsitsinerup malitsigisaanut taarsiissaaq. Pineqartoq akuersissut imaluunniit akuersissuteqarneq malillugu pisinnaatitsissummik pigisaqartuunani allaappat, pisinnaatitsissummik pigisaqartoq aamma ingerlatassamut akisussaasuvoq. Taamaattoqarnerani taakkua marluk ataatsimoorlutik aammalu tamarnik immikkut imm. 2-4-mi aamma §§ 137-139-mi maleruagassat malillugit pisussaaffeqarput aammalu tamakkiisumik akisussaasuullutik.

Imm. 2. Avatangiisini ajoqusiineq mingutsitsinerlu taamaallaat ingerlatassat peqqussutitut saneqqunneqarsinnaanngitsunut pisortani oqartussanit aalajangersagaasunut naapertuuttumik suliarineqarneranni pilersimasut akisussaasuusup uppersarpagu, tassani akisussaasuusup nammineq ingerlatassaannik imaluunniit pissutsinik tassunga tunngasunik pissuteqartumik peqqussuteqarneq, ilitsersuinerit, aalajangiinerit imaluunniit atugassarititaasut malillugit peqqussutaanngippata, imm. 1 malillugu akisussaasuuneq atuutilissanngilaq.

Imm. 3. Ajoquseritoq imaluunniit toqusoq piaaraluni ajoqusiinerimut peqataasimappat, inunnut ajoqusiinerimut imaluunniit pilersuisumik annaasaqarnerimut taarsiissutissaq annikillisinneqarsinnaavoq. Aammattaaq ajoquseritoq imaluunniit toqusoq mianersuaalliorujussuarluni ajoqusiinerimut peqataasimappat, taarsiissutissaq annikillisinneqarsinnaavoq pisunilu immikkut ittuni atorunnaarsinnaalluni.

Imm. 4. Ajoquseritoq piaaraluni imaluunniit mianersuaalliorujussuarluni ajoqusiinerimut peqataasimappat, pisuni allani taasiissutissaq annikillisinneqarsinnaavoq imaluunniit atorunnaarsinnaalluni.

§ 137. Ajoqusiinerup pinissaa sioqqullugu isumaqatigiissuteqartoqarsimappat, aammalu saneqqutsinissaq ajoquseritumut iluaqutaassanngippat, avatangiisinut ajoqusiinerimut taarsiisarneq pillugu Inatsisartut inatsisaanni maleruagassat saneqqunneqarnissaat pillugu isumaqatigiissut atuutissanngilaq.

Imm. 2. Isumaqatigiissut isumaqatigiissuteqartut akornanni pisunut tunngassuteqarpat, imm. 1-imi maleruagassat akisussaasuusup aamma inuussutissarsiortup inuussutissarsiornerminut ilaatillugu iliuseqartup akornanni isumaqatigiissummut atuutinnngillat. Isumaqatigiissut taamaattoq toqqaannartumik imaluunniit toqqaannangitsumik isumaqatigiissuteqartut allanut attaveqarnerannut tunngassuteqarpat, imm. 1-imi maleruagassat atuutissapput.

§ 138. Kapitalimi matumani avatangiisinut ajoqusiinernut taarsiisarneq pillugu maleruagassat, ajoqusertup isumaqatigiissutip iluani imaluunniit avataani taarsiisarneq pillugu maleruagassat nalinginnaasut imaluunniit Inatsisartut inatsisaanni imaluunniit inatsisini allani maleruagassat allat malillugit taarsiivigineqarsinnaaneranut killiliinngillat.

§ 139. Naalakkersuisut avatangiisinut ajoqusiinernut taarsiisarneq pissutsillu kapitalimi matumani taaneqartut pillugit aalajangersakkanik erseqqinnerusunik aalajangersaasinnaapput, ilanngullugu avatangiisinut ajoqusiinernut taarsiisarneq pillugu nunami namminermi imaluunniit nunani tamalaani maleruagassat, isumaqatigiissutit imaluunniit malittarisassat atorineqarnissaat pillugu.

Kapitali 23

Pineqaatissiisutit, arsaarinnittarneq aamma atuutilerana

Pineqaatissiisutit

§ 140. Naalakkersuisut makkununga ullut tamaasa imaluunniit sapaatit akunnikkaartumik pinngitsaaliissummik akileeqqusisarsinnaapput:

- 1) Paasissutissanik taassuma tunniussassaannik imaluunniit § 32, imm. 1, § 39, imm. 1, § 50, imm. 2, takuuk § 39, imm. 1, § 55, imm. 1, § 63, imm. 1, § 68, imm. 1, § 68, imm. 2, § 77, imm. 4, § 81, imm. 5, § 82, imm. 4, § 101, imm. 1, § 101, imm. 3 aamma 4, § 104, imm. 1, § 104, imm. 3 aamma 4 imaluunniit § 124 malillugit Naalakkersuisut piumasarisinnaasaannik, piffissaq eqqorlugu tunniussinngitsoq.
- 2) § 68, imm. 3, § 123 imaluunniit § 125 malillugit peqqusissuteqarnermik imaluunniit inerteqquteqarnermik malinninngitsoq.
- 3) § 82, imm. 4 malillugu piffissaq eqqorlugu qularnaveeqqusiinngitsoq.

§ 141. Inatsisit allat malillugit sukannernerusumik pineqaatissiineq nammineq pisuussutigineqanngippat, § 22, imm. 2-mi imaluunniit 3-mi taaneqartumik tamatumunnga akuersissummik peqarani imaluunniit tamatumunnga Inatsisartut inatsisaanni aalajangersakkat malillugit akuersissuteqarfigineqarani ingerlatassamik suliarinnittoq, akiliisitsinermik pineqaatissinneqassaaq.

Imm. 2. Inatsisit allat malillugit sukannernerusumik pineqaatissiineq nammineq pisuussutigineqanngippat, ingerlataqarnerit tamatumunnga aalajangersakkat Naalakkersuisunit aalajangersarneqartut malillugit ingerlateqqusaanatik, nunap sanaanut sumiiffimmi eqqissisimatitami ingerlataqarnermik suliaqartoq, takuuk § 128, akiliisitsinermik

pineqaatissinneqassaaq.

Imm. 3. Inatsisit allat malillugit sukannernerusumik pineqaatissiineq nammineq pisuussutigineqanngippat, akiliisitsinermik pineqaatissinneqassaaq, piaaraluni imaluunniit mianersuaalliorujussuarluni:

- 1) Paasissutissanik eqqunngitsunik imaluunniit paatsoortitsisinnaasunik tunniussisoq imaluunniit paasissutissanik Inatsisartut inatsisaat imaluunniit aalajangersakkat imaluunniit atugassarititaasut Inatsisartut inatsisaat malillugu aalajangersagaasut malillugit oqartussamit piumasarineqartunik, nipangiussiinnartoq.
- 2) Aalajangersakkanik imaluunniit akuersissutinut atugassarititaasunik imaluunniit Inatsisartut inatsisaat malillugu akuersissuteqarnernik imaluunniit aalajangersakkanik Inatsisartut inatsisaat malillugu aalajangersagaasunik unioqutitsisoq.
- 3) § 123 imaluunniit § 125 imaluunniit aalajangersakkat imaluunniit akuersissutinut atugassarititaasut imaluunniit Inatsisartut inatsisaat malillugu akuersissuteqarnerit imaluunniit aalajangersakkat Inatsisartut inatsisaat malillugu aalajangersagaasut malillugit Naalakkersuisut peqqusissuteqarnerannik imaluunniit inerteqquteqarnerannik malinninngitsoq.

Imm. 4. Aalajangersakkanik unioqutitsisoq Kalaallit Nunaannut pinerluttulerinermut inatsit malillugu akiliisitsinermik imaluunniit allatut pineqaatissiinermik pineqaatissinneqarsinnaasooq, aalajangersakkanni Inatsisartut inatsisaat malillugu aalajangersagaasuni aalajangerneqarsinnaavoq.

Imm. 5. Unioqutitsineq suliffeqarfimmit tamakkiisumik ilaannaasumilluunniit Namminersorlutik Oqartussanit pigineqartumit, naalagaaffimmit, kommunimit imaluunniit kommunit ataatsimooqatigiiffiannit kommunit aqunneqarnerat pillugu Inatsisartut inatsisaanni pineqartunut ilaasumit, aktiaatileqatigiiffimmit, piginneqatigiilluni ingerlatseqatigiiffimmit, piginneqatigiiffimmit assigisaannilluunniit piliarineqarpat, suliffeqarfik ilaalu ilanngullugit taamatut pinerluttulerinermut inatsisitigut akisussaatinneqarsinnaapput. Taamaaqataanik unioqutitsisoq tassaappat Namminersorlutik Oqartussat, kommuni imaluunniit kommunit ataatsimooqatigiiffiat kommunit aqunneqarnerat pillugu Inatsisartut inatsisaanni pineqartunut ilaasoq, tamanna atuutissaaq.

Imm. 6. Unioqutitsineq ersarippat, pisariunngippat aammalu annertuunik uppersaatitigut nalornissutaasunik apeqqutissaqanngippat, imm. 1-3 imaluunniit aalajangersakkat imaluunniit atugassarititaasut imm. 4 malillugu aalajangersagaasut malillugit akiliisitsilluni pineqaatissinissaq pillugu suliaq allaffissornikkut akiliisitsinikkut aalajangiiffiniarneqarsinnaavoq. Suliassani unnerluussutit imaannut piunasaqaatit pillugit, aammalu pasineqartoq oqaaseqarnissamut pisussaaffeqanngitsoq pillugu eqqartuussisarnermut inatsimmi maleruagassat, Inatsisartut inatsisaat malillugu allaffissornikkut akiliisitsinernut taamaaqataanik atuupput.

Imm. 7. Akiliisitsinerit, Inatsisartut inatsisaat imaluunniit aalajangersakkat Inatsisartut inatsisaat malillugu aalajangersagaasut malillugit pisussaatinneqartut, nunap karsianut tutsinneqassapput.

Arsaarinnittarneq

§ 142. Naalakkersuisut aatsitassanik, § 22, imm. 2, nr. 1-4-mik unioqquitsilluni, imaluunniit aalajangersakkanik imaluunniit atugassarititaasunik akuersissummut imaluunniit akuersissuteqarnermut aalajangersagaasunik imaluunniit aalajangersakkanik Inatsisartut inatsisaat malillugu aalajangersagaasunik unioqquitsisumik akuersissummik peqarani katersorneqartunik, piiarneqartunik imaluunniit atorineqartunik, arsaarinnissinnaapput.

Imm. 2. Naalakkersuisut aatsitassanik, § 22, imm. 3, nr. 1-imik unioqquitsilluni, imaluunniit aalajangersakkanik imaluunniit atugassarititaasunik akuersissummut imaluunniit akuersissuteqarnermut aalajangersagaasunik imaluunniit aalajangersakkanik Inatsisartut inatsisaat malillugu aalajangersagaasunik unioqquitsilluni, tamatumunnga akuersissuteqarfigineqarani, Kalaallit Nunaanniit anniseriarneqaraluartunik imaluunniit anninneqartunik, arsaarinnissinnaapput.

Imm. 3. Aatsitassanik § 22, imm. 2, nr. 1-4-mut unioqquitsilluni, imaluunniit aalajangersakkanut imaluunniit atugassarititaasunut akuersissummi aalajangersagaasumut imaluunniit akuersissuteqarnermut imaluunniit aalajangersakkanut Inatsisartut inatsisaat malillugu tunniussisoqarpat, imaluunniit taakkununnga pisinnaatitaaffinnut unioqquitsisumik katersorneqartunut, piiarneqartunut imaluunniit atorluarniarneqartunut atugassiisoqarsimappat, aatsitassat tunniunneqartut imaluunniit taakkua nalingi pissarsisumiit arsaarinnissutigineqarsinnaapput, taassuma tunniunneqartut pinerluttuliornermut attuumassuteqartut ilisimareersimappagu imaluunniit tassunga tunngatillugu mianersuaalliorujussuarsimappat, imaluunniit tunniussineq tunissutitut pisimappat.

Imm. 4. Naalakkersuisut imm. 1-imi, 2-mi imaluunniit 3-mi pineqartunut ilaasunik ingerlataqarnerni pissarsianik imaluunniit aningaasanik tamatumunnga naapertuuttunik arsaarinnissuteqarsinnaapput. Aningaasartaasa annertussusaasa aalajangernissaanut naammattumik tunngavissaqanngikkaanni, aningaasat pissarsiarineqartunut naapertuuttutut missiliorneqartut, Naalakkersuisut arsaarinnissutigisinnaavaat.

Imm. 5. Pinerlunnikkut pissarsianik imaluunniit aningaasanik tamatumunnga naapertuuttunik arsaarinnittarneq pillugu Kalaallit Nunaannut pinerluttulerinermut inatsimmi maleruagassat Naalakkersuisut imm. 1-4 malillugit arsaarinninnerannut taamaaqataanik atuutissapput.

Imm. 6. Imm. 1, 2 aamma 3 malillugu arsaarinninneq Naalakkersuisunit imaluunniit pinerluttulerinermut suliaassani Kalaallit Nunaannut pinerluttulerinermut inatsit malillugu oqartussamit attuumassuteqartumit, ingerlanneqassaaq.

Imm. 7. Aatsitassat arsaarinnissutigineqartut Naalakkersuisunit tuniniarneqassapput. Tunisinermit iluanaarutit nunap karsianut tutsinneqassapput.

Atuutilerneranut, allannguutinut aamma atorunnaarsitsinermut aalajangersakkat

§ 143. Inatsisartut inatsisaat ulloq 1. januar 2024 atuutilerpoq.

Imm. 2. Kalaallit Nunaanni misissueqqaarnissamut, aatsitassarsiorluni misissuinissamut imaluunniit aatsitassanik piiiaanissamut akuersissutit imaluunniit Kalaallit Nunaanni aatsitassanut tunngatillugu ilisimatuussutsikkut misissuinerit, Inatsisartut inatsisaata

atuutilernerani tunniunneqareersimasut, atuuttussaaginnassapput. Inatsisartut inatsisaata atuutilernerani akuersissutitut taamaattunut, akuersissutitut taamaattut malillugit pisinnaatitsissummik pigisaqartunut aamma ingerlatassanut akuersissutitut taamaattut malillugit suliarineqartunut, Inatsisartut inatsisaat aamma atuuppoq. Inatsisartut inatsisaata atuuffissaasa iluanni aammattaaq aatsitassat pillugit ingerlataqarnernut taanna atuuppoq, ilanngullugit katersineq, piianeq aamma aatsitassanik piianeq, aatsitassat pillugit ingerlatallu tamatumunnga pingaarutillit pillugit inatsisartut inatsisaanni (aatsitassanut ikummatissanullu inatsit) pineqartunut ilaasut aammalu Inatsisartut inatsisaata atuutilernissaa sioqqullugu suliarineqartut. Tamatuma saniatigut ingerlatani taamaattuni aatsitassanut katersorneqartunut, piiarneqartunut imaluunniit atorineqartunut, Inatsisartut inatsisaata atuuffissaasa iluanni taanna atuuppoq. Aammattaaq Inatsisartut inatsisaata atuuffissaanni aatsitassat aatsitassanut ikummatissanullu inatsimmi pineqartunut ilaasut pillugit ingerlataqarnerit aamma pissutsit pillugit aalajangiinernut aammalu Inatsisartut inatsisaata atuutilernissaa sioqqullugu aalajangiiffiqineqartunut, taanna atuutissaaq, piffissamut killiliussaq §§ 25-mi aamma § 73-mi taaneqarluni, taamaattoq Inatsisartut inatsisaata atuutilerneraniit piffissaq naatsorsorlugu.

Imm. 3. Inatsisartut inatsisaanni § 29 misissueqqaarnissamut akuersissutitut Inatsisartut inatsisaata atuutilinnginnerani tunniunneqartunut atuutinngilaq.

Imm. 4. Pisinnaatitsissummik pigisaqartup aatsitassanut ikummatissanullu inatsimmi § 87a malillugu suliaasamut nassuiaatip piareersaataasumik tusarniaassutigineqarnissaa Inatsisartut inatsisaata atuutilinnginnerani akuersissuteqarfigitissimappagu, Inatsisartut inatsisaanni § 44 atuutissanngilaq.

Imm. 5. Pisinnaatitsissummik pigisaqartut Inatsisartut inatsisaata atuutilernerata nalaani piiaanissamut akuersissummik tunineqarsimasut, Inatsisartut inatsisaata atuutilernerata kingorna kingusinnerpaamik qaammatit 24-t qaangiunneranni Inatsisartut inatsisaanni § 45, imm. 2-mi piumasagaat naammassereersimassavaat.

Imm. 6. Aatsitassarsiorluni ingerlataqarnernut aamma qinnuteqaatinut suleriaatsinut, atugassarititaasunut nalinginnaasunut aamma aatsitassat pillugit akuersissutitut atugassarititaasunut, Inatsisartut inatsisaata atuuffissaanni pineqartunut ilaasunut, aalajangersakkat ulloq 1. januar 2024 atuuttut, aalajangersakkat ilaalu ilanngullugit atorunnaarsinneqarnissaasa imaluunniit aalajangersakkanit Inatsisartut inatsisaat malillugu aalajangersagaasunit taarserneqarnissaasa tungaanut, Inatsisartut inatsisaat malillugu allannguuteqartillugit, atuutiinnassapput.

Namminersorlutik Oqartussat, ulloq xx. xxx 2023

Naalackersuisut Siulittaasuat